

萬 有 文 庫

第一集一千種

王雲五主編

蘇 東 坡 集

(四)

蘇 軾 著

商 務 印 書 館 發 行

蘇東坡集

(四)

蘇軾著

國學基本叢書

萬有文庫

第一集一千種

編者
魏 雲 五

商務印書館發行

蘇東坡集

卷十三

詩八十一首

蜜酒歌并敘

西蜀道士楊世昌善作蜜酒絕醇醖余既得其方作此歌遺之

眞珠爲漿玉爲醴六月田夫汗流泚不如春甕自生香蜂爲耕耘花作米一日小沸魚吐沫二日眩轉清光活三日開甕香滿城快瀉銀餅不須撥百錢一斗濃無聲甘露微濁醖醱清君不見高園採花蜂似兩天教釀酒醉先生先生年來窮到骨問人乞米何曾得世間萬事眞悠悠蜜蜂大勝鹽河侯

又一首答二猶子與王郎見和

脯青苔炙青蒲爛蒸鵝鴨乃瓠壺煮豆作乳脂爲酥高燒油燭斟蜜酒貧家百物初何有古來百巧出窮人搜羅假合亂天眞詩書與我爲麴糵醞釀老夫成搢紳質非文是終難久脫冠還作扶犁叟不如蜜酒無燥寒冬不加甜夏不酸老夫作詩殊少味愛此三篇如酒美封胡羯末已可憐不知更有王郎子

謝陳季常惠一掬巾

夫子胸中萬斛寬此巾何事小團團半升僅漉淵明酒二寸纔容子夏冠好帶黃金雙得勝可憐白紵一生酸臂弓腰箭何時去直上陰山取可汗

贈黃山人

面頰照人元自赤，眉毛覆眼見來烏。倦遊不擬談玄牝，示病何妨出白須。絕學已生真定惠，說禪長笑老浮屠。東坡若肯三年住，親與先生看藥爐。

問大治長老乞桃花茶栽東坡

周詩記茶苦，茗飲出近世。初緣厭梁肉，假此雪昏滯。嗟我五畝園，桑麥苦蒙翳。不令寸地閑，更乞茶子藝。飢寒未知免，已作太飽計。庶將通有無，農末不相戾。春來凍地裂，紫符森已銳。牛羊煩呵叱，篋篋未敢睨。江南老道人，齒髮日夜逝。他年雪堂品，空記桃花裔。

魚蠻子

江淮水爲田，舟楫爲室居。魚蝦以爲糧，不耕自有餘。異哉魚蠻子，本非左衽徒。連排入江住，竹瓦三尺廬。於焉長子孫，戚施且侏儒。擘水取魴鯉，易如拾諸途。破釜不着鹽，雪鱗老青蔬。一飽便甘寢，何異獮與狙。人間行路難，踏地出賦租。不如魚蠻子，駕浪浮空虛。空虛未可知，會當算舟車。蠻子叩頭泣，勿語桑大夫。

弔李臺卿并敘

李臺卿字明仲，廬州人。貌陋甚，性介不羣。而博學強記，罕見其比。好左氏，有史學，考正同異，多所發明。知天文律歷千載之日，可坐數也。賦謫居黃州，臺卿爲麻城主簿，始識之。旣罷，居於廬。而曹光州演甫以書報其亡。臺卿，光州之妻黨也。

我初未識君，人以君爲笑。垂頭若病鶴，煙雨靈七竅。弊衣來過我，危坐若持釣。褚裋半面新，醜蔑一語妙。

徐徐涉其瀾，極望不得微。却觀元嫵媚，士固難輕料。看書眼如月，罅隙靡不照。我老多遺忘，得君如再少。縱橫通雜藝，甚博且知要。所恨言無文，至老幽不耀。其生世莫識，已死誰復弔。作詩遺故人，庶解俗子譏。曹旣見和復次其韻

造物本兒戲，風噓雷電笑。誰令妄驚怪，失匕號萬竅。人人走江湖，一一操網釣。偶然連六鰲，便謂此手妙。空令任公子，三歲蹲海徼。長貧固不辭，一死實未料。難將善草算，除用佛眼照。何人嗣家學，恨子兒尚少。嗟我與曹公，衰老世不要。空言今無救，奇志後必耀。吟君五字詩，義重千金弔。收藏慎勿出，免使羣兒譏。次韻孔毅甫集古人句見贈五首

羨君戲集他人詩，指呼市人如使兒。天邊鴻鵠不易得，便令作對隨家雞。退之驚笑子美泣，問君久假何時歸。世間好句世人共，明月自滿千家輝。繁駘之峯人莫識，雜以雞豚真可惜。今君坐致五侯鯖，盡是猩唇與熊白。路傍拾得半斷槍，何必開爐鑄矛戟。用之如何在我耳，入手當令君喪魄。天下幾人學杜甫，誰得其皮與其骨。割如太華當我前，跛躄欲上驚曠崢。名章俊語紛交衡，無人巧會當時情。前生子美只君是，信手拈得俱天成。詩人雕刻閔草木，搜抉肝腎神應哭。不如默誦千萬首，左袖右取談笑足。夜吟石鼎聲悲秋，可憐好事劉與侯。何當一醉百不問，我欲眠矣君歸休。

青明蘭臭俱自焚，象牙翠羽戕其身。多言自古爲數窮，微中有時堪解紛。癡人但數羊羔兒，不知何者是

左慈千章萬句卒非我，急走投君應已遲。

六年正月二十日復出東門仍用前韻

亂山環合水侵門，身在淮南盡處村。五畝漸成終老計，九重新掃舊巢痕。豈惟見慣沙鷗熟，已覺來多釣石溫。長與東風約今日，暗香先返玉梅魂。

食柑

一雙羅帕未分珍，林下先嘗愧逐臣。露葉霜枝翦寒碧，金盤玉指破芳辛。清泉蔌蔌先流齒，香霧霏霏欲噀人。坐客慙慙爲收子，千奴一掬奈吾貧。

大寒步至東坡贈巢三

春雨如階塵，春風吹倒人。東坡數間屋，巢子誰與鄰。空床斂敗絮，破甕鬱生薪。相對不言寒，哀哉知我貧。我有一瓢酒，獨飲良不仁。未能頰我頰，聊復濡子唇。故人千鍾祿，馭吏醉吐茵。那知我與子，坐作寒蟻呻。努力莫怨天，我爾皆天民。行看花柳動，共享無邊春。

元脩菜并敘

菜之美者，有吾鄉之巢。故人巢元脩嗜之，余亦嗜之。元脩云：使孔北海見，當復云吾家菜邪？因謂之元脩菜。余去鄉十有五年，思而不可得。元脩適自蜀來，見余於黃，乃作是詩，使歸致其子，而種之東坡之下。云：彼美君家菜，鋪田綠茸茸。豆莢圓且小，槐芽細而豐。種之秋雨餘，擢秀繁霜中。欲花而未萼，一一如青蟲。是時青裙女，採擷何怱怱。烝之復湘之，香色蔚其饒。點酒下鹽豉，縷橙芼薑蔥。那知雞與豚，但恐放箸空。

春盡苗葉老，耕翻煙雨叢。潤隨甘澤化，暖作青泥融。始終不我負，力與糞壤同。我老忘家舍，楚音變兒童。此物獨嫵媚，終年繫余胸。君歸致其子，囊盛勿函封。張翥移首看，適用如葵葍。馬援載薏苡，羅生等蒿蓬。懸知東坡下，培塿化千鍾。長使齊安人，指此說兩翁。

二月三日點燈會客

江上東風浪接天，苦寒無賴破春妍。試開雲夢羔兒酒，快瀉錢塘藥玉船。蠶市光陰非故國，馬行燈火記當年。冷煙濕雪梅花在，留得新春作上元。

上巳日與二三子攜酒出游隨所見輒作數句明日集之爲詩故詞無倫次

薄雲霏霏不成雨，杖藜曉入千花塢。柯丘海棠吾有詩，獨笑深林誰敢侮。三杯卯酒人徑醉，一枕春睡日亭午。竹間老人不讀書，留我閉門誰教汝。出簷蘂積十圍大，寫眞素壁千蛟舞。東坡作塘今幾尺，攜酒一勞農工苦。却尋流水出東門，壞垣古甃花無主。臥開桃李爲誰妍，對立鸚鵡相媚嫵。開耕藉草勸行路，不惜春衫汗泥土。囊裳共過春草亭，扣門却入韓家圃。轆轤繩斷井深碧，鞦韆索挂人何所。映籬空復小桃枝，乞漿不見磨門女。南上古臺臨斷岸，雪陣翻空迷仰俯。故人餽我玉葉羹，火冷煙消誰爲煮。崎嶇東廬下荒徑，姪姪隔花聞好語。更隨落景盡餘樽，却傍孤城得僧宇。主人勸我洗足眠，倒床不復聞鐘鼓。明朝門外泥一尺，始悟三更雨如許。平生所向無一遂，茲遊何事天不阻。固知我友不終窮，豈弟君子神所予。

日日出東門

日日出東門，步尋東城遊。城門抱關卒，笑我此何求。我亦無所求，覩言寫我憂。意適忽忘返，路窮乃歸休。

懸知百歲後，父老說故侯。古來賢達人，此路誰不由。百年寓華屋，千載歸山丘。何事羊公子，不肯過西州。

南堂五首

江上西山半隱堤，此邦臺館一時西。南堂獨白西南向，臥看千帆落淺溪。莫年眼力嗟猶在，多病顛毛却未華。故作明窗書小字，更開幽室養丹砂。他時夜雨困移床，坐厭愁聲點客腸。一聽南堂新瓦響，似聞東塢小荷香。山家爲割千房蜜，稚子新畦五畝蔬。更有南堂堪著客，不憂門外故人車。掃地焚香閉閣眠，簾紋如水帳如煙。客來夢覺知何處，挂起西窗浪接天。

次韻子由種杉竹

吏散庭空雀噪簷，閉門獨宿夜厭厭。似聞梨棗同時種，應與杉篁刻日添。糟麴有神驚不醉，雪霜誇健巧相沾。先生坐待清陰滿，空使人人歎滯淹。

孔毅甫妻挽詞

結襦記初歡，同穴期晚歲。擇夫得溫嶠，生子勝王濟。高風相賓友，古義仍兄弟。從君處隱中，窮達初不計。云何抱沉疾，俯仰便一世。幽陰棲房櫳，芳澤在巾袂。百年縱得滿，此路行亦逝。那將有限身，長瀉無益涕。君文照今古，不比山石脆。當觀千字誄，寧用百金瘞。

次韻孔毅甫久旱已而甚雨三首

飢人忽夢飯甑溢，夢中一飽百憂失。只知夢飽本來空，未悟真飢定何物。我生無田食破硯，爾來硯枯麪

不出。去年太歲空在酉，榜舍壺漿不容乞。今年旱勢復如此，歲晚何以贍吾突。青天蕩蕩呼不聞，况欲稽首號泥佛。甕中蝸蝓尤可笑，跂跂脉脉何等秩。陰陽有時雨有數，民是天民天白卹。我雖窮苦不如人，要亦自是民之一。形容雖似喪家狗，未肯弭耳爭投骨。倒冠落幘謝朋友，獨與蚊雷共圭華。故人曠我不開門，君視我門誰肯屈。可憐明月如潑水，夜半清光翻我室。風從南來非雨候，且爲疲人洗蒸鬱。囊裏一和快哉謠，未暇飢寒念明日。

去年東坡拾瓦礫，自種黃桑三百尺。今年刈草蓋雪堂，日炙風吹面如墨。平生懶惰今始悔，老大勤農天所直。沛然例賜三尺雨，造化無心悅難測。四方上下同一雲，甘澀不爲龍所隔。俗石分蓬蒿下濕迎曉未，燈火新涼催夜織。老夫作罷得甘寢，以聽牆東人響屐。奔流未已坑谷平，折草枯荷恣漂溺。腐儒籠籠支百年，力耕不受衆目憐。破陂漏水不耐旱，人力未至求天全。會當作塘徑千步，橫斷西北遮山泉。四鄰相率助舉杵，人人知我囊無錢。明年共看決渠雨，飢飽在我寧關天。誰能伴我田間飲，醉倒惟有支頭甌。天公號令不再出，十日愁霖併爲一。君家有田水冒田，我家無田憂入室。不如西州楊道士，萬里隨身惟兩膝。溪流不惡泝亦佳，一葉扁舟任漂突。山芎麥麩都不用，泥行露宿終無疾。夜來飢腸如轉雷，旅愁非酒不可開。楊生自言識普律，洞簫入手清且哀。不須更待秋井塌，見人白骨方銜盃。

初秋寄子由

百川日夜逝，物我相隨去。惟有宿昔心，依然守故處。憶在懷遠驛，閉門秋暑中。藜藿對書史，揮汗與子同。西風忽淒厲，落葉穿戶牖。子起尋袂衣，感歎執我手。朱顏不可恃，此語君勿疑。別離恐不免，功名定難期。

當時已悽斷。况此兩衰老。失塗既難追。學道恨不早。買田秋已議。築室春當成。雪堂風雨夜。已作對床聲。

和黃魯直食筍次韻

飽食有殘肉。飢食無餘菜。紛然生喜怒。似被狙公賣。爾來誰獨覺。凜凜白下宰。太和古白下。一飯在家僧。至樂甘不壞。多生味蘊簡。食筍乃餘憤。蕭然映樽俎。未肯雜蕪芥。君著霜雪姿。童稚已耿介。胡爲遭暴橫。三喚不忍噉。朝來忽解縛。勢迫風雷噉。尙可餉三閔。飯筒纏五采。

開子由爲郡僚所捐恐當去官

少學不爲身。宿志固有在。雖然敢自必。用舍置度外。天初若相我。發迹造宏大。豈敢負所付。捐軀欲投會。寧知事大繆。舉步得狼狽。我已無可言。墜甌難追悔。子雖僅自免。難肋安足賴。低回畏罪罟。黽俛敢言退。若人疑或使。爲子得微罪。時哉歸去來。共抱東坡來。

次韻王鞏南遷初歸二首

問君謫南賓。野葛食幾尺。逢人瘵髮黃。入市胡眼碧。三年不易過。坐睨倚天壁。歸來貌如故。妙語仍破齷。那能廢詩酒。亦未妨禪寂。願爲尙書郎。還賜尙方鳥。江家舊池臺。脩竹圍一尺。歸來萬事非。惟見秦淮碧。平生痛飲處。遺墨鴉棲壁。西來故父客。金印雜鳴鑼。三槐老更茂。花絮春寂寂。中微未可料。家廟藏赤烏。

孔毅甫以詩戒飲酒問買田且乞墨竹次其韻

酒中真復有何好。孟生雖賢未聞道。醉時萬慮一掃空。醒後紛紛如宿草。十年措洗見真妄。石女無兒蕉穀稿。此身何異貯酒瓶。滿瓢子人空自倒。武昌痛飲豈吾意。性不達人遭客惱。君家長松十畝陰。惜我一

庵聊洗心。我田方寸耕不盡。何用百頃糜千金。枕書熟睡呼不起。好學憐君工雜擬。且將墨竹換新詩。調色何須待東里。

任師中挽詞

大任剛烈世無有。疾惡如風朱伯厚。小任溫毅老更文。聰明慈愛小馮君。兩任才行不須說。疇昔並友吾先人。相看半作晨星沒。可憐太白與殘月。大任先去家未乾。小任相繼呼不還。強寄一樽生死別。樽中有淚酒應酸。貴賤賢愚同盡耳。君家不盡緣賢子。人間得喪了無憑。只有天公終可倚。

子由作二頌頌石臺長老問公手寫蓮經字如黑蟻且誦萬遍脅不至席二十餘年子亦作二首眼前擾擾黑蚍蜉。口角霏霏白唾珠。要識吾師無礙處。試將燒却看嗔無。眼睛心地兩虛圓。脅不密床二十年。誰信吾師非不睡。睡她已死得安眠。

鄧忠臣母周挽詞

微生真草木。無處謝天力。慈顏如春風。不見桃李實。古今把此恨。有志俯仰失。公子豈先知。戰戰常惜日。吾君日月照。委曲到肝膈。哀哉人子心。吾何愛一邑。家庭拜前後。粲然發笑色。豈比黃壤下。焚瘞千金璧。若人道德人。視此亦戲劇。聊愜會閔意。遽與仙佛寂。孤疊臥江渚。永望墳墓隔。作詩相楚挽。感慟淚載滴。

徐君猷挽詞

一舸南遊遂不歸。清江赤壁照人悲。請看行路無從涕。盡是當年不忍欺。雪後獨來栽柳處。竹間行復探茶時。山城散盡樽前客。舊恨新愁只自知。

和蔡景繁海州石室

芙蓉仙人石曼卿也。舊遊處蒼藤翠壁初無路。戲將桃核裹黃泥。石間散擲如風雨。坐令空山出錦繡。倚天照海花無數。花間石室可容車。流蘇寶蓋窺靈宇。何年霹靂起神物。玉棺飛出王喬墓。當時醉臥動千日。至今石縫餘糟醕。仙人一去五十年。花老室空誰作主。手植數松今偃蓋。蒼髯白甲低瓊戶。我來取酒酌先生。後車仍載胡琴女。一聲冰鐵散巖谷。海爲瀾翻松爲舞。爾來心賞復何人。持節中郎醉無伍。獨臨斷岸呼日出。紅波碧巖相吞吐。徑尋我語覓餘聲。拄杖彭鏗叩銅鼓。長篇小字遠相寄。一唱三歎神淒楚。江風海雨入牙頰。似聽石室胡琴語。我今老病不出門。海山巖洞知何許。門外桃花自開落。床頭酒甕生塵土。前年開閣放柳枝。今年洗心參佛祖。夢中舊事時一笑。坐覺俯仰成今古。願君不用刻此詩。東海桑田真且莫。

和秦太虛梅花

西湖處士骨應槁。只有此詩君壓倒。東坡先生心已灰。爲愛君詩被花惱。多情立馬待黃昏。殘雪消遲月出早。江頭千樹春欲開。竹外一枝斜更好。孤山下醉眠處。點綴裙腰粉不掃。萬里春隨逐客來。十年花送佳人老。去年花開我已病。今年對花還草草。不如風雨卷春歸。收拾餘香還畀昊。

再和潛師

化工未議蘇羣槁。先向寒梅一傾倒。江南無雪春瘴生。爲散冰花除熱惱。風清月落無人見。洗粧自趁霜鐘早。惟有飛來雙白鷺。玉羽瓊枝鬪清好。吳山道人心似水。眼淨塵空無可掃。故將妙語寄多情。橫機欲

試東坡老東坡習氣除未盡。時復長篇書小草。且撼長條殞落英。忍飢未擬窮呼昊。

橄欖

紛紛青子落紅鹽。正味森森苦且嚴。待得微甘回齒頰。已輸崖蜜十分甜。

海棠

東風媚媚泛崇光。香霧霏霏月轉廊。只恐夜深花睡去。更燒高燭照紅粧。

東坡

雨洗東坡月色清。市人行盡野人行。莫嫌榮確坡頭路。自愛鏗然曳杖聲。

生日王郎以詩見慶次其韻并寄茶二十一斤

折揚新曲萬人趨。獨和先生于蔦于。但信積藏終自售。豈知盤脫本無樵。竭從冰叟來游宦。肯伴羅仙亦號儒。棠棣並爲天下士。芙蓉曾到海邊鄩。不嫌霧谷蠶松柏。終恐虹梁荷棟桴。高論無窮如鋸屑。小詩有味似連珠。感君生日遙稱壽。祝我餘年老不枯。未辦報君青玉案。建溪新餅截雲腴。

別黃州

病瘡老馬不任韉。猶向君王得敵帷。桑下豈無三宿戀。樽前聊與一身歸。長腰尙載撐腸米。闊領先裁蓋瓊衣。投老江湖終不失。來時莫遣故人非。

過江夜行武昌山上聞黃州鼓角

清風弄水月銜山。幽人夜渡吳王峴。黃州鼓角亦多情。送我南來不辭遠。江南又聞出塞曲。半雜江聲作

悲健誰言萬方聲一概。豈憤龍愁爲余變。我記江邊枯柳樹。未死相逢真識面。他年一葉沂江來。還吹此曲相迎餞。

自輿國往筠宿石田驛南二十五里野人舍

溪上青山三百疊。快馬輕衫來一抹。倚山脩竹有人家。橫道清泉知我渴。芒鞋竹杖自輕軟。蒲薦松床亦香滑。夜深風露滿中庭。惟見孤螢白開闔。

將至筠先寄遲适遠三猶子

露宿風飈六百里。明朝飲馬南江水。未見豐盈犀角兒。先逢玉雪王郎子。時道逢王郎於建昌方北行也。對床欲作連夜語。念汝還須戴星起。夜來夢見小於菟。菟小名兔兒。猶是鬢髦垂兩耳。憶過濟南春未動。三子出迎殘雪裏。我時移守古河東。酒肉淋漓渾舍喜。而今憔悴一羸馬。逆旅擔夫相汝爾。出城見我定驚嗟。身健窮愁不須恥。我爲乃翁留十日。掣電一欵何足恃。惟當火急作新詩。一醉兩翁勝酒美。

端午游真如遲适遠從子由在酒局

一與子由別。却數七端午。身隨綵絲繫。心與昌歌苦。今年匹馬來。佳節日夜數。兒童喜我至。典衣具雞黍。水餅既懷鄉。飯筒仍愍楚。謂言必一醉。快作西川語。寧知是官身。糟麴困薰煮。獨攜三子出。古剎訪禪祖。高談付梁羅。詩律到阿虎。歸來一調笑。慰此長齟齬。梁羅遲适小名。

別子由三首兼別遲

知君念我欲別難。我今此別非他日。風裏楊花雖未定。雨中荷葉終不濕。三年磨我費百書。一見何止得

雙璧。願君亦莫歎留滯。六十小劫風雨疾。

先君昔愛洛城居。我今亦過嵩山麓。水南卜宅吾豈敢。試向伊川買脩竹。又聞綠山好泉眼。傍市穿林瀉冰玉。遙想茆軒照水開。兩翁相對清如鶴。

兩翁歸隱非難事。惟要傳家好兒子。憶昔汝翁如汝長。筆頭一落三千字。世人聞此皆大笑。慎勿生兒兩翁似。不知栲櫟薦明堂。何似鹽車壓千里。

初別子由至奉新作

雙鶴先我來。飛上東軒背。書隨好夢到。人與佳節會。一歡難把玩。回首了無在。却渡來時溪。斷橋號淺瀨。茫茫暑天闊。藹藹孤城背。青山眊矂中。落日淒涼外。盛衰豈吾意。離合非所礙。何以解我憂。相了一事大。同年程筠德林求先墳二詩

思成堂

宰樹連山谷。祠堂照路隅。養松無觸鹿。助祭有馴烏。歸夢先寒食。兒啼到白須。遙知鄰里化。醉叟道爭扶。歸真亭

舊笑桓司馬。今師鄭大夫。不知徂歲月。空覺老楸梧。祭禮傳家法。阡名載版圖。會君千字誄。木抄見龜趺。過建昌李野夫公擇故居

彭蠡東北源。廬阜西南麓。何人脩水上。種此一雙玉。思之不可見。破宅餘脩竹。四鄰戒莫犯。十畝森似束。我來仲夏初。解箨呈新綠。幽鳥向我鳴。野人留我宿。裴回不忍去。微月挂喬木。遙想他年歸。解組巾一幅。

對床老兄弟，夜雨鳴竹屋。臥聽鄰寺鐘，齋窗耿殘燭。

初入廬山三首

青山若無素，假蹇不相親。要識廬山面，他年是故人。山南山面也。

自昔懷清賞，神游杳藹間。如今不是夢，真箇在廬山。

芒屨青竹杖，自挂百錢游。可怪深山裏，人人識故侯。

圓通禪院先君舊游也。四月二十四日晚至宿焉。明日忌日也。乃手寫寶積懺蓋頌佛一偈以贈。

長老僊公憇公拊掌笑曰：昨夜夢寶蓋飛下著處，輒出火。豈此祥乎？乃作是詩。院有蜀僧宜逮事。

訥長老識先君云

石耳峯頭路，接天梵音堂。下月臨泉，此生初飲廬山水。他日徒參雪竇禪，袖裏寶書猶未出。夢中飛蓋已

先傳，何人更識嵇中散。野鶴昂藏未是仙。

子由在筇作東軒記或戲之爲東軒長老其壻曹煥往筇余作一絕句送曹以戲子由曹過廬山

出以示圓通，慎長老慎欣然亦作一絕送客出門歸入室，趺坐化去。子由聞之乃作二絕一以答

予一以答慎。明年余過圓通始得其詩，乃追次慎韻。

君到高安幾日回，一時斗擻舊塵埃。贈君一籠牢收取，盛取東軒長老來。余送曹詩。

東軒長老未相逢，已見黃州一信通。何必揚眉資目擊，須知千里事同風。慎老和余韻。

東軒只似虛空樣，何處人家籠解盛。縱使盛來無處著，雪堂自有老師兄。子由答予詩。

攔頭挑得黃州籠，行過圓通一笑開。却到山前人已寂，亦無一物可擔回。子由答靈詩。

大士何曾有生死，小儒底處覓窮通。偶留一映千山上，散作人間萬竅風。余和懷詩。

余過溫泉壁上有詩云：直待衆生總無垢，我方清冷混常流。問人云：長老可遵作遵已，退居圓通亦作一絕。

石龍有口口無根，自在流泉誰吐吞。若信衆生本無垢，此泉何處覓寒溫。

世傳徐凝瀑布詩云：一條界破青山色，至爲塵陌又僞作樂天詩稱美此句有養不得之語。樂天雖涉淺易，然豈至是哉。乃戲作一絕。

帝遺銀河一派垂，古來惟有謫仙詞。飛流濺沫知多少，不與徐凝洗惡詩。

書李公擇白石山房

偶尋流水上崔嵬，五老蒼顏一笑開。若見謫仙煩寄語，匡山頭白早歸來。

贈東林總長老

溪聲便是廣長舌，山色豈非清淨身。夜來八萬四千偈，他日如何舉似人。

題西林壁

橫看成嶺側成峯，遠近高低無一同。不識廬山真面目，只緣身在此山中。

廬山二勝并跋

余游廬山南北得十五六奇勝，殆不可勝紀。而懶不作詩，獨擇其尤佳者作二首。

開先漱玉亭

高巖下赤日，深谷來悲風。擘開青山峽，飛出兩白龍。亂沫散霜雪，古潭搖清空。餘流滑無聲，快瀉雙石罅。我來不忍去，月出飛橋東。蕩蕩白銀闕，沉沉水精宮。願隨琴高生，脚踏赤鯉公。手持白芙蓉，跳下清冷中。

栖賢三峽橋

吾聞太山石，積日穿綫溜。况此百雷靈，萬世與石鬪。深行九地底，險出三峽右。長輪不盡溪，欲滿無底竇。跳波翻潛魚，震響落飛狄。清寒入山骨，草木盡堅瘦。空濛煙靄間，瀕洞金石奏。鸞鶴飛橋出，漱漱半月貌。玉淵神龍近，雨雹亂晴晝。垂餅得清甘，可噉不可漱。

陶驥子駿佚老堂二首

文舉與元禮，尙得稱世舊。淵明吾所師，夫子乃其後。挂冠不待年，亦豈爲五斗。我歌歸來引，余增損淵明。歸去來以就樂律，謂之歸來引。千載信尙友，相逢黃卷中。何似一盃酒，君醉我且歸。明朝許來否。

我從廬山來，目送孤飛雲。路逢陸道士，知是千歲人。試問當時友，虎溪已埃塵。似聞佚老堂，知是幾世孫。能爲五字詩，仍戴漉酒巾。人呼小靖節，自號葛天民。

和李太白并敘

李太白有潯陽紫極宮感秋詩，紫極宮今天慶觀也。道士胡洞微以石本示予，蓋其師卓玘之所刻。玘有道術，節義過人，今亡矣。太白詩云：四十九年非，一往不可復。今子亦四十九，感之次其韻。玉芝一名瓊田草，洞微種之七八年矣。云更數年可食，許以遺余，故并記之。

何處聞秋聲。簾簾北窗竹。回薄萬古心。覽之不盈掬。靜坐觀衆妙。浩然媚幽獨。白雲南山來。就我簷下宿。懶從唐生決。差訪季主卜。四十九年非。一往不可復。野情轉蕭散。世道有翻覆。陶令歸去來。田家酒應熟。寄臥虛寂堂。月明浸疎竹。冷然洗我心。欲飲不可掬。流光發永歎。自昔非予獨。行年四十九。還此北窗宿。緬懷卓道人。白首寓醫卜。謫仙固遠矣。此士亦難復。世道如奕棋。變化不容覆。惟應玉芝老。待得蟠桃熟。

次韻道潛留別

爲聞盧岳多真隱。故就高人斷宿攀。已喜禪心無別語。尙嫌剃髮有詩斑。異同更莫疑三語。物我終當付八還。到後與君開北戶。舉頭三十六青山。

卷十四

詩七十九首

岐亭五首并敘

元豐三年正月。余始謫黃州。至岐亭北二十五里。山上有白馬青蓋來迎者。則余故人陳慥季常也。爲留五日。賦詩一篇而去。明年正月復往見之。季常使人勞余於中途。余久不殺。恐季常之爲余殺也。則以前韻作詩。爲殺戒。以遺季常。季常自爾不復殺。而岐亭之人多化之。有不食肉者。其後數往見之。往必作詩。詩必以前韻。凡余在黃四年。三往見季常。而季常七來見余。蓋相從百餘日也。七年四月。余量移汝州。自江淮徂維。送者皆止慈湖。而季常獨至九江。乃復用前韻通爲五篇以贈之。

昨日雲陰重，東風融雪汁。遠林草木暗，近舍煙火溼。下有隱君子，嘯歌方自得。知我犯寒來，呼酒意頗急。拊掌動鄰里，遠村捉鵝鴨。房櫺鏘器聲，蔬果照巾幘。久聞羹蒿美，初見新芽赤。洗盞酌鵝黃，磨刀削熊白。須臾我徑醉，坐睡落巾幘。醒時夜向闌，唧唧銅餅泣。黃州豈云遠，但恐朋友缺。我當安所主，君亦無此客。朝來靜庵中，惟見峯巒集。

我哀籃中蛤，閉口護殘汁。又哀網中魚，開口吐微溼。刳腸彼交病，過分我何得。相逢未寒溫，相勸此最急。不見盧懷慎，烝壺似烝鴨。坐客皆忍笑，髡然發其羸。不見王武子，每食刀几赤。琉璃載烝豚，中有人乳白。盧公信寒陋，衰髮得滿積。武子雖豪華，未死神已泣。先生萬金壁，護此一蟻缺。一年如一夢，百歲真過客。君無廢此篇，嚴詩編杜集。

君家蜂作窠，歲歲添漆汁。我身牛穿鼻，卷舌聊自溼。二年三過君，此行真得得。愛君似劇孟，叩門知緩急。家有紅頰兒，能唱綠頭鴨。行當隔簾見，花霧輕窸窣。爲我取黃封，親拆官泥赤。仍須煩素手，自點葉家白。樂哉無一事，十年不蓄幘。閉門弄添丁，哇笑雜嗚泣。西方正苦戰，誰補將帥缺。披圖見八陣，合散更平聲。主客不須親戎行，坐論教君集。

酸酒如蠶湯，甜酒如蜜汁。三年黃州城，飲酒但飲溼。我如更揀擇，一醉豈易得。幾思壓茅柴，禁網日夜急。西鄰推蠶盎，醉倒豬與鴨。君家大如掌，破屋無遮靠。何從得此酒，冷面妬君赤。定應好事人，千石供李白。爲君三日醉蓬髮，不暇梳。夜深欲逾垣，臥想春蠶泣。君奴亦笑我，鬢齒行禿缺。三年已四至，歲歲遭惡客。人生幾兩屐，莫厭頻來集。

枯松強鑽膏。槁竹欲灑汁。兩窮相值遇。相哀莫相溼。不知我與君。交遊竟何得。心法幸相語。頭然未爲急。願爲穿雲鶴。莫作將雛鴨。我行及初夏。煮酒映疏簾。故鄉在何許。西望千山赤。茲遊定安歸。東泛萬頃白。一歎寧復再。起舞花墮幘。將行出苦語。不用兒女泣。吾非固多矣。君豈無一缺。各念別時言。閉戶謝衆客。空堂淨掃地。虛白道所集。

郭祥正家醉畫竹石壁上郭作詩爲謝且遺古銅劍二

空腸得酒芒角出。肝肺槎牙生竹石。森然欲作不可回。吐向君家雪色壁。平生好詩仍好畫。書牆澆壁長遭罵。不嗔不罵喜有餘。世間誰復如君者。一雙銅劍秋水光。兩首新詩爭劍筴。劍在床頭詩在手。不知誰作蛟龍吼。

龍尾硯歌并引

余舊作鳳唼石硯銘。其略云。蘇子一見名鳳唼。坐令龍尾羞牛後。已而求硯於歙。歙人云。子自有鳳唼。何以此爲。蓋不能平也。奉議郎方君彥德有龍尾大硯。奇甚。謂余若能作詩少解前語者。當奉餉。乃作此詩。黃琮白琥天不惜。顧恐貪夫死懷璧。君看龍尾豈石材。玉德金聲寓於石。與天作石來幾時。與人作硯初不辭。詩成鮑謝石何與。筆落鍾王硯不知。錦茵玉匣俱塵垢。擣練支床亦何有。況曠蘇子鳳唼銘。戲語相嘲作牛後。碧天照水風吹雲。明窗大几清無塵。我生天地一閒物。蘇子亦是支離人。麤言細語都不擇。春蚓秋蛇隨意畫。願從蘇子老東坡。仁者不用生分別。

張近幾仲有龍尾子石硯以銅劍易之

我家銅劍如赤蛇，君家石硯蒼壁橢而窪。君持我劍向何許，大明宮裏玉佩鳴銜牙。我得君硯亦安用，雪堂窗下爾雅箋蟲蝦。二物與人初不異，飄落高下隨風花。剡藤玉具皆外物，視草草玄無等差。君不見秦趙城易壁，指圖睨柱相矜誇。又不見二生妾換馬，驕鳴啜泣思其家。不如無情兩相與，永以爲好譬之桃李與瓊華。

張作詩送硯反劍乃和其詩卒以劍歸之

贈君長鈇君當歌，每食無魚歎委蛇。一朝得見暴公子，櫛具欲與冠爭峨。豈比杜陵貧病叟，終日長鑱隨短蓑。斬蛟刺虎老無力，帶牛佩犢吏所訶。故將換硯豈無意，恐君瑠瑤傷天和。作詩反劍亦何謂，知君欲以詩相磨。報章苦恨無好語，試向君硯求餘波。詩成劍往硯應笑，那將屋漏供懸河。

去歲九月二十七日在黃州生子名邁小名幹兒頥然穎異至今年七月二十八日病亡於金陵
作二詩哭之

吾年四十九，羈旅失幼子。幼子真吾兒，眉角生已似。末期觀所好，踴躍逐書史。搖頭却梨栗，似識非分恥。吾老常鮮歡，賴此一笑喜。忽然遭奪去，惡業我累爾。衣薪那免俗，變滅須臾耳。歸來懷抱空，老淚如瀉水。我淚猶可拭，日遠當日忘。母哭不可聞，欲與汝俱亡。故衣尚懸架，漲乳已流床。感此欲忘生，一臥終日僵。中年忝聞道，夢幻講已詳。儲藥如丘山，臨病更求方。仍將恩愛刃，割此衰老腸。知迷欲自反，一慟送餘傷。

葉濤致遠見和二詩復次其韻 韻例元韻

平生無一女，誰復歎耳耳。滯留生此兒，足慰周南史。那知非真實，造物聊戲爾。煩惱初無根，恩愛爲種子。

煩公爲假說，反復相指似。欲除苦海浪，先乾愛河水。弃置一寸鱗，悠然笑侯喜。爲公寫餘習，餅彘一時恥。聞公少已悟，拄杖久倚牀。笑我老而癡，負鼓欲求亡。庶幾東門子，柱史安敢望。嗜毒戲猛獸，慮患先不詳。囊破蛇已走，尙未省齧傷。妙哉兩篇詩，洗我千結腸。黯黯不作鱗，未老輒自僵。永謝湯火厄，冷然超無方。

次荆公韻四絕

青李扶疏禽自來，清真逸少手親栽。深紅淺紫從爭發，雪白鵝黃也鬪開。斫竹穿花破綠苔，小詩端爲覓橙栽。細看造物初無物，春到江南花自開。騎驢渺渺入荒陂，想見先生未病時。勸我試求三畝宅，從公已覺十年遲。甲第非真有，閑花亦偶栽。聊爲清淨供，却對道人開。公病後捨宅作寺。

張庖民挽詞

東晉巾車令，西京執戟郎。甘心向山水，結髮事文章。故自輕千戶，何曾羨一囊。天高鬼神惡，骨朽姓名芳。廣嶽銘旌暗，秦淮舊宅荒。吾詩不用刻，妙語有黃香。黃香直作哀詞。

次韻葉致遠見贈

欲求五畝寄樵蘇，所至遲留似買胡。信命不須歌去汝，逢人未免歎猶吾。人皆勸我杯中物，我獨憐君屋上烏。一技文章何足道，要言磨却是文殊。

次韻杭人裴維甫

餘杭門外葉飛秋，尙記居人挽去舟。一別臨平山上塔，五年雲夢澤南州。淒涼楚些緣吾發，邂逅秦淮爲

子留寄謝西湖舊風月，故應時許夢中游。

次韻段縫見贈

季子東周負郭田，須知力穡是家傳。細思種莖五十本，大勝取禾三百廛。若得與君連北巷，故應終老忘西川。短衣疋馬非吾事，只擬關門不問天。

題孫思邈真

先生一去五百載，猶在峨眉西嶼中。自爲天仙足官府，不應尸解坐蟲蟲。

戲作鮑魚一絕

粉紅石首仍無骨，雪白河豚不藥人。寄語天公與河伯，何妨乞與水精鱗。

同王勝之游蔣山

到郡席不暖，居民空惘然。好山無十里，遺恨恐他年。欲款南朝寺，同登北郭船。朱門收畫戟，紺宇出青蓮。荆公宅已爲寺，夾路蒼髯古。迎人翠麓偏，龍腰蟠故國。烏爪寄層巔，竹杪飛華屋。松根滋細泉，峯多巧障日。江遠欲浮天，略約橫秋水。浮屠插暮煙，歸來踏人影。雲細月娟娟。

至真州再和二首

老手王摩詰，窮交孟浩然。論詩曾伴直，話舊已忘年。北上難陪驥，東行且趁船。離亭花映肉，醉眼鷺窺蓮。拖轉三山沒，風回五兩偏。荒祠過瓜步，古甃墮松顛。聞道清香閣，新鑿白玉泉。莫教門掩夜，坐待月流天。小院檀槽闌，空庭棹燭煙。公詩便堪唱，爲付小嬋娟。公顏如雪柏，千載故依然。笑我無根柳，空中不待年。

肯留歸闕旆。坐待逆風船。特許門傳籥。那知箭起蓮。相逢月上後。小語坐西偏。流落千帆側。追思百尺巖。躬耕懷谷口。水石羨平泉。茅屋歸元亮。霓裳醉樂天。行聞宣室召。歸近御爐煙。未用歌池上。隨宜教李娟。

次韻答寶覺

芒屨竹杖布行纏。遮莫千山更萬山。從來無脚不解滑。誰信石頭行路難。

眉子石硯歌贈胡鬧

君不見成都畫手開十眉。橫雲却月爭新奇。游人指點小鬟處。中有漁陽胡馬嘶。又不見王孫青瑣橫雙碧。腸斷浮空遠山色。書生性命何足論。坐費千金買清渴。爾來喪亂愁天公。謫向君家青硯中。小窗虛幌相嫵媚。令君曉夢生春紅。毗耶居士談空處。結習已空花不住。試教天女爲磨鉢。千偈濶翻無一語。

以玉帶施元長老。以衲裙相報次韻

病骨難堪玉帶圍。鈍根仍落箭鋒機。欲教乞食歌姬院。故與雲山衲衲衣。此帶閱人如傳舍。流傳到我亦悠哉。錦袍錯落真相稱。乞與伴狂老萬回。

次韻滕元發許仲塗秦少遊

二公詩格老彌新。醉後狂吟許野人。坐石青丘吞澤芥。自慚黃潦薦溪蘋。兩邦旌纛光相照。十畝鋤犁手自親。何似秦郎妙天下。明年獻頌請東巡。

送金山鄉僧歸蜀開堂

撞鐘浮玉山。迎我三千指。衆中聞警欸。未語知鄉里。我非箇中人。何以默識子。振衣忽歸去。隻影千山裏。

涪江與中冷共此一味水。冰盤薦琥珀。何似糖霜美。

送沈遠赴廣南

嗟我與君皆丙子。四十九年窮不死。君隨幕府戰西羌。夜渡冰河斫雲壘。飛塵漲天箭酒甲。歸對妻孥真夢耳。我謫黃岡四五年。孤舟出沒煙波裏。故人不復通問訊。疾病飢寒疑死矣。相逢握手一大笑。白髮蒼顏略相似。我方北渡脫重江。君復南行輕萬里。功名如幻何足計。學道有涯真可喜。勾漏丹砂已付君。汝陽麪盎吾何恥。君歸赴我雞黍約。買田築室從今始。

豆粥

君不見呼沱流漸車折軸。公孫倉皇奉豆粥。溼薪破竈自煨衣。飢寒頓解劉文叔。又不見金谷敲冰草木春。輟下烹煎皆美人。萍蘖豆粥不傳法。咄嗟而辦石季倫。干戈未解身如寄。聲色相纏心已醉。身心顛倒自不知。更識人間有真味。豈如江頭千頃雪。色蘆茆簷出沒晨煙。孤地確脊。杭光似玉。沙餅煮豆軟如酥。我老此身無着處。賣書來問東家住。臥聽鷄鳴粥熟時。蓬頭曳履君家去。

秦少游夢發殯而葬之者云是劉發之柩是歲發首薦秦以詩賀之劉溼亦作因次其韻

君看三代士執雉。本以殺身為小補。居官死職戰死綏。夢尸得官真古語。五行勝己斯爲官。官如草木吾如土。仕而未祿猶賓客。待以純臣蓋非古。餽焉曰獻稱寡君。豈比公卿相爾汝。世衰道微士失己。得喪悲憤反其故。草袍蘆箠相嫖娼。飲食嬉遊事羣聚。曲江舩舫月燈毬。是謂舞殯而歌墓。看花走馬到東野。餘子紛紛何足數。二生年少兩豪逸。詩酒不知軒冕苦。故令將仕夢發棺。勸子勿爲官所腐。塗車芻蕘皆眼

殷著眼細看君勿誤。時來聊復一飛鳴。進隱不須煩伍舉。

金山夢中作

江東賈客木絲裘。會散金山月滿樓。夜半潮來風又熱。臥吹簫管到揚州。

次韻周禮惠石銚

銅腥鐵澀不宜泉。愛此蒼然深且寬。蟹眼翻波湯已作。龍頭拒火柄猶寒。薑新鹽少茶初熟。水漬雲蒸蘇未乾。自古函牛多折足。要知無脚是輕安。

次韻蔣穎叔

月明鷺鷥未安枝。一棹飄然影自隨。江上秋風無限浪。枕中春夢不多時。瓊林花草聞前語。罨畫溪山指後期。豈敢便爲難黍約。玉堂金殿要論思。蔣詩記及第時瓊林宴坐中所言且約同卜居陽羨。

龜山辯才師

此生念念浮雲改。寄語長淮今好在。故人宴坐虹梁南。新河巧出龜山背。木魚呼客振林莽。鐵鳳橫空飛綵繪。忽驚堂宇變雄深。坐覺風雷生鬢歛。羨師遊戲浮漚間。笑我榮枯彈指內。嘗茶看畫亦不惡。問法求詩了無礙。千里孤帆又獨來。五年一夢誰相對。何當來世結香火。永與名山躬井磴。

贈潘谷

潘郎曉踏河陽春。明珠白璧驚市人。那知望拜馬蹄下。胸中一斛泥與塵。何似墨潘穿破褐。琅琅翠餅敲玄笏。布衫漆黑手如龜。未害冰壺貯秋月。世人重耳輕目前。區區張李爭嬾妍。一朝入海尋李白。空看人

聞畫墨仙

徐大正閑軒

冰蠶不知寒。火鼠不知暑。知閑見閑地。已覺非閑侶。君看東坡翁。懶散誰比數。形骸墮醉夢。生事委塵土。早眠不見燈。晚食或欺午。臥看盜取鼯。坐視麥漂雨。語希舌頰強。行少腰脚僂。五年黃州城。不踏黃州鼓。人言我閑客。置此閑處所。問閑作何味。如眼不自覩。頗訝徐孝廉。得閑能幾許。介子願奉使。翁歸備文武。應緣不耐閑。名字挂庭宇。我詩爲閑作。更得不閑語。君如汗血駒。轉盼略燕楚。莫嫌鑿絡重。終勝鹽車苦。

蒜山松林中可卜居余欲傲其地地屬金山故作此詩與金山元長老

魏王大瓠無人識。種成何翅實五石。不辭破作兩大尊。只憂水淺江湖窄。我材濩落本無用。虛名驚世終何益。東方先生好自譽。孟賁子路并爲一。杜陵布衣老且愚。信口自比契與稷。莫年欲學柳下惠。嗜好酸臠不相入。金山也是不羈人。早歲聞名晚相得。我醉而嬉欲仙去。旁人笑倒山謂實。問我此生何所歸。笑指浮休百年宅。蒜山幸有閑田地。招此無家一房客。

王中父哀詞并敘

仁宗朝以制策登科者十五人。軾忝冒時。尙有富彥國。張安道。錢子飛。吳長文。夏公酉。陳令舉。錢醇。老王中父。并軾與家弟轍。九人存焉。其後十有五年。哭中父於密州。作詩吊之。則子飛。長文。令舉沒矣。又八年。軾自黃州量移汝海。與中父之子沈之。相遇於京口。相持而泣。則十五人者。獨三人存耳。蓋安道及軾與家弟而已。嗚呼。悲夫。乃復次前韻。以遺沈之。時沈之亦以罪謫家于錢塘云。

生獨不獨比前人。東菴端能廢謝鯤。子達想無身後念。吾衰不復夢中論。已知毅豹爲均死。未識荆凡定孰存。堪笑東坡癡鈍老。區區猶記刻舟痕。

蔡景繁官舍小閣

使君不獨東南美。典刑長記先君子。戲嘲王叟短轅車。肯爲徐郎書紙尾。三年引節江湖上。千首放懷風月裏。手開東閣坐虛明。目淨東溪照清泚。素琴濁酒容一榻。落霞孤鶩供千里。大舫何時繫門柳。小詩屢欲書牋紙。文昌新構滿鷓鴣。都邑正喧收杞梓。相逢一醉豈有命。南來寂寞君歸矣。

高郵陳直躬處士畫鴈二首

野鴈見人時。未起意先改。君從何處看。得此無人態。無乃橋木形。人禽兩自在。北風振枯葦。微雪落瑾瑰。慘淡雲水昏。晶瑩沙礫碎。戈人悵何慕。一舉渺江海。衆禽事紛爭。野鴈獨閑絮。徐行意自得。俯仰老有節。我衰寄江湖。老伴雜鶉鴉。作書問陳子。曉景畫蒼鬢。依依聚圓沙。稍稍動斜月。先鳴獨鼓翅。吹亂蘆花雪。

和王旂二首并平父子

異時長怪謫仙人。舌有風雷筆有神。聞道騎鯨遊汗漫。億嘗捫蝨話悲辛。氣吞餘子無全目。詩到諸郎尙絕倫。白髮故交空掩卷。淚河東注問蒼旻。嫋嫋春風送渡關。娟娟霜月照生還。遲留歲莫江淮上。來往君家伯仲間。未厭冰灘吼新洛。且看松雪媚南山。野梅官柳何時動。飛蓋長橋待子閑。

次韻張晚

新洛霜餘兩岸隆，塵埃舉袂識西風。臨淮自古多名士，樽酒相從樂寓公。半日偷閑歌嘯裏，百年待盡往來中。知君不向窮愁老，尚有清詩氣吐虹。

次韻王定國南邊回見寄

土埭銅花蝕秋水，要須悍石相磨砥。十年冰燄戰膏粱，萬里煙波濯紈綺。歸來詩思轉清激，百丈空潭數魴鯉。逝將桂浦插蘭蓀，不記槐堂收劍履。卻思庾嶺今何在，更說彭城真夢耳。來詩述彭城舊游，君知先謁是甘井，我願得全如苦李。安心不復九回腸，至道終當三洗髓。廣陵羨何足較，只有無何真我里。余實田陽獎，來詩以爲不知廣陵，樂全老子今禪伯。張安道也。定國其婿。掣電機鋒不容擬，心通豈復問云何。印可聊須答如是，相逢爲我話留滯。桃花春漲孤舟起。

贈梁道人

採藥壺公處處過，笑看金狄手摩挲。老人大父識君久，造物小兒如子何。寒盡山中無歷日，雨斜江上一漁翁。神仙護短多官府，未厭人間醉踏歌。

題雍秀才畫草蟲八物

促織

月叢號耿耿，露葉泣漙漙。夜長不自暖，那憂公子寒。

蟬

蛻形濁汗中，羽翼便翾好。秋來問何闕，已抱寒莖槁。

蝦蟆

惺目知誰賊。睛腹空自脹。慎勿困蜈蚣。飢螻不汝放。

蝮娘

洪鍾起暗室。飄瓦落空庭。誰言轉丸手。能作殷牀聲。

天水牛

兩角徒自長。空飛不服箱。爲牛竟何事。利吻穴枯桑。

蝟虎

跂跂有足蛇。脈脈無角龍。爲虎君勿笑。食盡蠶尾蟲。

蝸牛

腥涎不滿殼。聊足以自濡。升高不知回。竟作黏壁枯。

鬼蝶

雙眉卷鐵絲。兩翅暈金碧。初來花爭妍。忽去鬼無迹。

泗州南山監倉蕭淵東軒二首

偶隨樵父探都梁。南山名都梁山。山出都梁香故也。竹屋松扉試乞漿。但見東軒堪隱几。不知公子是監倉。溪中亂石牆垣古。山下寒蔬七箸香。我是江南舊游客。挂冠知有老蕭郎。

北望飛塵苦畫纈。洗心聊復寄東齋。珍禽聲好猶思越。野橘香清未過淮。有信微泉來遠嶺。無心明月轉

空塔一官倉，庾真堪老坐。看松根絡斷崖。

泗州除夜雪中黃師是送酥酒二首

莫雪紛紛投碎米，春流咽咽走黃沙。舊游似夢徒能說，逐客如僧豈有家。冷硯欲書先自凍，孤燈何事獨成花。使君半夜分酥酒，驚起妻孥一笑譁。

關右土酥黃似酒，揚州雲液卻如酥。欲從元放覓拄杖，忽有麴生來座隅。對雪不堪令飽煖，隔船應已厭歌呼。明朝積玉深三尺，高枕床頭尙一壺。

章錢二君見和復次韻答之

黃昏已作風翻絮，半夜猶驚月在沙。照汴玉峯明佛剎，隔淮雲海暗人家。來麴有信迎三白，蘼蔔無香散六花。蘼蔔，繩子花也。與雪花皆六出。欲喚阿咸來守歲，林鳥樞馬鬪喧譁。

分無纖手裁春勝，况有新詩點蜀酥。醉裏冰髭失纓絡，夢回布被起廉隅。君應旅睫寒生暈，我亦飢腸夜自呼。明日南山春色動，不知誰佩紫微壺。

正月一日雪中過淮謁客回作二首

十里清淮上，長堤轉雪龍。冰崖落屐齒，風葉亂裘茸。萬頃穿銀海，千尋渡玉峯。從來修月手，合在廣寒宮。攢眉有底恨，得句不妨清。霧霧開寒谷，飢雅舞雪城。橋聲春市散，塔影莫淮平。不用殘燈火，船窗夜自明。

劉乙新作射亭乙新嘗知眉州

關玉當年刺史家，雙隄馳射笑穿花。而今白首閑聽馬，只有清樽照畫蛇。寂寂小軒蛛網遍，陰陰垂柳鴈

行斜手柔弓燥春風後。置酒看君中戟牙。

孫莘老寄墨四首

徂徠無老松。易水無良工。珍材取樂浪。妙手惟潘翁。潘谷作墨。雅用高麗煤。魚胞熟萬杵。犀角盤雙龍。墨成不敢用。進入蓬萊宮。蓬萊春晝永。三殿明房櫺。金箋酒飛白。瑞霧縈長虹。遙憐醉常侍。一笑開天容。谿石琢馬肝。剡藤開玉版。噓噓雲霧出。奕奕龍蛇縮。此中有何好。秀色紛滿眼。故人歸天祿。古漆窺蠹簡。隄塵給尙方。老手擅編剡。分餘幸見及。流落一歎報。

我貧如飢鼠。長夜空敲齧。瓦池研竈煤。葦管書柿葉。近者唐夫子。遠致烏玉玦。唐林夫寄張道墨半丸。先生又繼之。毛壁爛箱篋。清窈洗硯坐。蠅蚓稍蟠結。便有好事人。敲門求醉帖。

吾窮本坐詩。久服朋友戒。五年江湖上。閉口洗殘債。今來復稍稍。快癢如爬疥。先生不護呵。又復寄詩械。幽光發奇思。點黠出荒怪。詩成一自笑。故疾逢蝦蟹。

留題蘭泉亭

雪後東風未肯和。扣門遷客夜經過。不知舊竹生新筍。但見清伊換濁河。無復往來乘下澤。聊同笑語說東坡。明年我亦開三徑。寂寂兼無雀可羅。

和人見贈

只寫東坡不著名。此身已是一長亭。壯心無復春流起。衰鬢從教病葉零。知有雪兒供筆硯。應嗔竈婦洗盆餅。回來索酒公應厭。京口新傳作客經。

和田仲宣見贈

頭白江南醉司馬，寬心時復喚殷兄。寒潮不應淮無信，客起相隨月有情。未許低頭拜東野，徒言飲酒勝公榮。好詩惡韻那容和，刻燭應須便置觥。

和王勝之三首

城上湖光暖欲波，美人唱我踏春歌。魯公賓客皆詩酒，誰是神仙張志和。齋釀如瀉漲綠波，公詩句句可弦歌。流觴曲水無多日，更作新詩繼永和。要知太守憐孤客，不惜陽春和俚歌。坐睡樽前呼不應，爲公雕琢損天和。

記夢并敘

樂全先生夢人以詩三篇示之，字皆旁行而不可識，旁有人道衣古貌，爲讀其中一篇云：人事且常在，留費悟圓間。凡四句覺而忘其二，以告其客蘇軾，軾以私意廣之云：圓間有物物間空，豈有圓空入井中。不信天形真箇樣，故應眼力自先窮。連環已解如神手，萬竅猶號未濟風。稽首問公公大笑，本來誰礙更求通。

卷十五

詩七十二首

寄新豐與蒲傳正

蘭溪美箭不成筓，離離玉筋排霜脊。千溝萬縷自生風，入手未開先慘慄。公家列屋閑蛾眉，珠簾不動花陰移。霧帳銀牀初破睡，牙籤玉局坐彈棋。東坡病叟長羈旅，凍臥飢吟似飢鼠。倚賴春風洗破衾，一夜雪寒披故絮。火冷燈青誰復知，孤舟兒女自憂吟。皇天何時反炎燠，愧此八尺黃琉璃。願公淨掃清香閣，臥聽風濤聲滿榻。習習還從兩腋生，請公乘此朝圓闕。

寄怪石石斛與魯元翰

山骨裁方斛，江珍拾淺灘。清池上几案，碎月落盃盤。老去懷三友，平生困一簞。堅姿聊自傲，秀色亦堪餐。好去髯聊舍，憑將道眼看。東坡最後供，霜雪照人寒。

漁父四首

漁父飲，誰家去。魚蟹一時分付，酒無多少醉爲期。彼此不論錢數。
漁父醉，簑衣舞。醉裏卻尋歸路，輕舟短棹任斜橫。醒後不知何處。
漁父醒，春江午。夢斷落花飛絮，酒醒還醉醉還醒。一笑人間今古。
漁父笑，輕鷗舉。漠漠一江風雨，江邊騎馬是官人。借我孤舟南渡。

李憲仲哀詞并敘

同年友李君諱惇字憲仲，賢而有文，不幸早世，賦不及與之游也。而識其子廌有年矣。廌自陽翟見余於南京，泣曰：吾祖母邊母，馬前母張與君之喪，皆未葬。貧不敢以飢寒爲戚，願四喪未舉，死不瞑目矣。適會故人梁先吉老聞余當歸耕陽羨，以絹十匹、絲百兩爲贖辭之，不可。乃以遺屬曰：此亦仁人之餽也。既又

作詩以告知君與鷹者。庶幾皆有以助之。鷹年二十五。其文燁然。氣節不凡。此豈終窮者哉。
大夢行當覺。百年特未滿。遑哀已逝人。長眠寄孤館。念我同年生。意長日月短。鹽車因騏驎。烈火廢圭瓊。
後生有奇骨。出語已精悍。蕭然野鶴姿。誰復識中散。有生寓大塊。死者誰不歎。嗟君獨久客。不識黃土暖。
推衣助孝子。一溉滋湯旱。誰能脫左驂。大事不可緩。

贈眼醫王生彥若

鍼頭如麥芒。氣出如車軸。開關絡脈中。性命寄毛粟。而况清淨眼。內景含天燭。琉璃貯沆瀣。輕脆不任觸。
而子於其間。來往施鋒鏃。笑談紛白若。觀者頭爲縮。運鍼如運斤。去翳如拆屋。常疑子善幻。他技雜符祝。
子言吾有道。此理君未覩。形骸一塵垢。貴賤兩草木。世人方重外。妄見友與玉。而我初不知。刺眼如刺肉。
君君曰與翳。是翳要非目。目翳苟二物。易分如麥菽。寧聞老農夫。去草更傷穀。鼻端有餘地。肝膽分楚蜀。
吾於五輪間。蕩蕩見空曲。如行九軌道。並驅無擊轂。空花誰開落。明月自臍胸。請問樂全堂。忘言老尊宿。
應若樂全先生門下醫也。

與歐育等六人飲酒

忽驚春色二分空。且看樽前半丈紅。苦戰知君便白羽。倦遊憐我憶黃封。年來齒髮老未老。此去江淮東。
復束。記取六人相會處。引杯看劍坐生風。

觀杭州鈴轄歐育刀劍戰袍

青綾衲衫暖。襯甲紅線勒。帛光遠。看禿襟小袖。鵬鵠盤。大刀長劍龍蛇插。兩軍鼓噪屋瓦墜。紅塵白羽紛

相覓將軍恩重此身輕，笑履鋒鏑如一捏。寄生只肯坐帷幄，談笑毫端弄生殺。叫呼擊鼓催上竿，猛士應憐小兒黠。試問黃河夜偷渡，掠面驚沙寒淅淅。何如大艦日高眠，一枕清風過荻鶻。

王伯敬所藏趙昌畫四首

梅花

南行渡關山，沙水清練練。行人已愁絕，日暮集微霰。殷勤小梅花，鬢髻吳姬面。暗香隨我去，回首驚千片。至今開畫闥，老眼淒欲泣。幽懷不可寫，歸夢君家倩。

芙蓉

弱質困夏永，奇姿蘇曉涼。低昂黃金杯，照耀初日光。檀心繫成暈，翠葉森有芒。古來寫生人，妙絕誰似昌。晨粧與午醉，真態含陰陽。君看此花枝，中有風露香。

芙蓉

清颺已拂林，積水漸收潦。谿邊野芙蓉，花水相媚好。坐看池蓮盡，獨伴霜菊槁。幽姿強一笑，莫景迫摧倒。淒涼似貧女，嫁晚驚衰早。誰寫少年容，樵人劍南老。

山茶

蕭蕭南山松，黃葉阻勁風。誰憐兒女花，散火冰雪中。能傳歲寒姿，古來惟丘翁。趙叟得其妙，一洗膠粉空。掌中調丹砂，染此鶴頂紅。何須誇落墨，獨賞江南工。

寄吳德仁兼簡陳季常

東坡先生無一錢，十年家火燒凡鈔。黃金可成河可塞，只有霜鬢無由玄。龍丘居士亦可憐，談空說有夜不眠。忽聞河東獅子吼，拄杖落手心茫然。誰似濩陽公子賢，飲酒食肉自得仙。平生寓物不留物，在家學得忘家禪。門前罷亞十頃田，清溪遠屋花連天。溪堂醉臥呼不醒，落花如雪春風顛。我遊蘭溪訪清泉，已辦布襪青行纏。稽山不是無賀老，我自興盡回酒船。恨君不識顏平原，恨我不識元魯山。銅駝陌上會相見，握手一笑三千年。

題王逸少帖

顛張醉素兩禿翁，追逐世好稱書工。何曾夢見王與鍾，妄自粉飾欺盲聾。有如市倡抹青紅，妖歌嫖舞眩兒童。謝家夫人淡丰容，蕭然自有林下風。天門蕩蕩驚跳龍，出林飛鳥一掃空。爲君草書續其終，待我他日不怱怱。

書林逋詩後

吳儂生長湖山曲，呼吸湖光飲山淥。不論世外隱君子，傭兒販婦皆冰玉。先生可事絕俗人，神清骨冷無由俗。我不識君曾夢見，瞳子瞭然光可燭。遺篇妙字處處有，步繞西湖看不足。詩如東野不言寒，書似西臺差少肉。平生高節已難繼，將死微言猶可錄。自言不作封禪書，更君悲吟白頭曲。逋臨終詩云：茂陵吳日來遺草，猶存初無封禪書。我笑吳人不好事，好作祠堂傍修竹。不然配食水仙王，一盞寒泉薦秋菊。

和仲伯達

歸山歲月苦無多，尚有丹砂奈老何。繡谷只應花自染，鏡潭長與月相磨。君方傍海看初日，我已橫江擊

素波人不我知斯我貴，不須雷雨起龍梭。

春日

鳴鳩乳燕寂無聲，日射西窗潑眼明。午醉醒來無一事，只將春睡賞春晴。

贈袁陟

是身如虛空，萬物皆我儲。胡爲強分別，百金買田廬。不見袁夫子，神馬載尻輿。游於無何有，一飯不願餘。官湖爲我池，學舍爲我居。何以遺子孫，此身自遷陟。薰風暗楊柳，秋水淨芙蓉。應觀我知子，不怪子知魚。

蘇子容母陳夫人挽詞

蘇陳甥舅真冰玉，正始風流起頽俗。夫人高節稱其家，凜凜寒松映修竹。雞鳴爲善日日新，八十三年如一晨。豈惟家室宜壽母，實與朝廷生異人。忘軀殉國乃吾子，三仕何曾知慍喜。不煩擁笏強垂魚，我視去來皆夢耳。誦詩相挽賤區區，墓碑千字多遺餘。他年太史取家傳，知有班昭續漢書。

歸宜興留題竹西寺

十年歸夢寄西風，此去真爲田舍翁。剩覓蜀岡新井水，要攜鄉味過江東。道人勸飲雞蘇水，童子能煎鸞粟湯。暫借藤牀與瓦枕，莫教孤負竹風涼。此生已覺都無事，今歲仍逢大有年。山寺歸來聞好語，野花啼鳥亦欣然。

與孟震同遊常州僧舍

年來轉覺此生浮，又作三吳浪漫遊。忽見東平孟君子，夢中相對說黃州。

湛湛清池五月寒，小山無數碧巒峴。釋杉戢戢三千本，且作凌雲合抱石。知君此去便歸耕，笑指孤舟一葉輕。待向三茆乞靈雨，半篙流水贈君行。

贈常州報恩長老

碧玉碗盞紅碼瑙，井花水養石菖蒲。也知法供無窮盡，試問禪師得飽無。薦福老懷真巧便，淨慈兩本更尖新。憑師爲作鐵門限，準備人間請話人。

次韻答賈耘老

五年一夢南司州，飢寒疾病爲子憂。東來六月井無水，仰看古堰橫奔牛。平生管鮑我知子，今日陳蔡誰從丘。夜航爭路泥水澁，牽挽直欲來瓜洲。自言嗜酒得風痺，故鄉不敢居溫柔。空將汎愛救溝壑，衰病不復從前樂。今年太守真臥甞，笑語炎天出冰雹。時低九尺蒼須髻，過我三間小池閣。故人改觀爭來賀，小兒不信猶疑錯。爲君置酒飲且哦，草間秋蟲亦能歌。可憐老驥真老矣，無心更秣天山禾。

墨花卉敘

世多以墨畫山水竹石人物者，未有以畫花者也。汴人尹白能之，爲賦一首。

造物本無物，忽然非所難。花心超墨暈，春色散毫端。縹渺形縱具，扶疎態自完。遠風盡傾倒，杏雨半披殘。獨有狂居士，求爲黑牡丹。兼書平子賦，歸向雪堂看。

送竹几與謝秀才

平生長物擾天真，老去歸田只此身。留我同行木上坐，贈君無語竹夫人。但隨秋扇年年在，莫鬪瓊枝夜

夜新堪笑荒唐玉川子，莫年家口若爲親。

溪陰堂

白水滿時雙鷺下，綠槐高處一蟬吟。酒醒門外三竿日，臥看巖南十畝陰。

次韻許遵

蒜山渡口挽歸艎，朱雀橋邊看道裝。供帳已應煩百兩，盤鮮無久溷諸郎。問禪時到長干寺，載酒閑過綠野堂。此味只憂兒輩覺，逢人休道北窗涼。

贈章默井敘

章默居士字志明，生公侯家，才性高爽，棄家求道，不蓄妻子，與世無累，而父母與兄之喪，貧不能舉，以是眷眷世間，不能無求於人，余深哀其志，既有以少助之，又取其言爲詩以贈其行，庶幾有哀之者。

章子親未葬，餘生抱羸疾，朝吟噫隣里，夜淚腐茵席。前年黑花生，今歲白髮出，身隨日月逝，恨與天地畢。願求不毛田，視築長夜室，難從王孫裸，未忍夏后聖。五陵多豪士，百萬付一擲，心知義財難，甘就貧友乞。不謂毛粟施行，白丘山積，此志苟朝途，夕死真不戚。誓求無生理，不踐有爲迹，棄身屍陋林，烏鳥任狼藉。

送穆越州

江海相忘十五年，羨君松柏蔚蒼顏。四朝耆舊冰霜後，兩郡風流水石間。舊政猶傳蜀父老，先聲已振越溪山。樽前俱是蓬萊守，莫放高樓雪月閑。

贈葛章

竹緣茆屋半摧傾，肯向蜂窠寄此生。長恐波頭卷室去，欲將舡尾載君行。小詩試擬孟東野，大草閑臨張伯英。消遣百年須底物，故應憐我不歸耕。

贈王寂

與君暫別不須嗟，俯仰歸來鬢未華。記取江南煙雨裏，青山斷處是君家。

南都妙峯亭

千尋挂雲闕，十頃含風灣。開門弄清泚，照見雙銅環。池臺半禾黍，桃李餘榛菅。無人肯回首，日暮車班班。史君非世人，心與古佛閑。時邀聲利客，來洗塵埃顏。新亭在東阜，飛宇凌通闕。古甃磨翠壁，霜林散煙鬢。孤雲抱商丘，芳草連杏山。俯仰盡法界，逍遙寄人寰。亭亭妙高峯，了了蓬艾間。五老壓彭蠡，三峯照瀟關。均爲拳石小，配此一掬慳。煩公爲標指，免使勸躋攀。

神宗皇帝挽詞三首

文武固天縱，欽明又日新。化民何止聖，妙物獨稱神。政已三王上，言皆六籍醇。巍巍本無象，刻畫愧孤臣。未易名堯德，何須數舜功。小心仍致孝，餘事及平戎。典禮從周舊，官儀與漢隆。誰知本無作，千古自承風。接統真千歲，膺期止一章。周南稍留滯，宣室送淒涼。病馬空嘶櫪，枯葵已泣霜。餘生臥江海，歸夢泣嵩邙。

金山妙高臺

我欲乘飛車，東訪赤松子。蓬萊不可到，弱水三萬里。不如金山去，清風半帆耳。中有妙高臺，雲峯自孤起。仰觀初無路，誰信平如砥。臺中老比丘，碧眼照窗几。巉巖玉爲骨，凜凜霜入齒。機鋒不可觸，千偈如翻水。

何須尋德雲。卽此比丘是。長生未暇學。請學長不死。

贈杜介并敘

元豐八年七月二十五日。杜幾先自浙東還。與余相遇於金山。話天台之異。以詩贈之。

我夢遊天台。橫空石橋小。松風吹茵露。翠溼香娟娟。應真飛錫過。絕澗度雲鳥。舉意欲從之。愴然已松杪。微言粲珠玉。未說意先了。覺來如墮空。耿耿窗戶曉。羣生陷迷網。獨達從古少。杜叟子何人。長歎萬物表。妻孥空四壁。振策念輕矯。遂爲赤城遊。飛步凌縹渺。問禪不歸舍。屢爲瓠壺繞。何人識此志。佛眼自照燦。我夢君見之。卓爾非虛媿。仙葩發茗碗。翦刻分葵蔕。從今更不出。閉戶閑驪鬣。時從佛頂巖。馳下雙蓮沼。

次韻孫莘老斗野亭寄子由在邵伯堰

落帆謝公渚。日脚東西平。孤亭得小憩。莫景含餘清。坐待斗與牛。錯落挂南甍。老僧如夙昔。一笑意已傾。新詩出故人。舊事疑前生。吾生七往來。送老海上城。逢人輒自哂。得魚不忍烹。似聞續溪老。復作東都行。小詩如秋菊。豔豔霜中明。過此感我言。長篇發春榮。

送楊傑并敘

無爲子嘗奉使。登泰山絕頂。雞一鳴見日出。又嘗以事過華山。重九日飲酒蓮花峯上。今乃奉詔與高麗僧統遊錢塘。皆以王事而從。方外之樂。善哉未曾有也。作是詩以送之。

天門夜上賓。出日萬里紅。波半天亦赤。歸來平地石。跳丸一點黃金鑄。秋橘太華峯頭作。重九天風吹。灑黃花酒。浩然馳下腰帶鞵。醉舞崩崖一揮手。神遊八極萬緣虛。下視蚊雷隱汗渠。大千一息八十返。笑厲東

海騎鯨魚三韓王子西求法，鑿齒彌天兩勅敵。過江風急浪如山，寄語舟人好看客。

次韻送徐大正

別時酒盞照燈花，知我歸期漸有涯。去歲渡江萍似斗，今年並海棗如瓜。多情明月邀君共，無價青山爲我賒。千首新詩一竿竹，不應空釣漢江槎。

楊康功有石狀如醉道士爲賦此詩

楚山固多猿，青者黠如壽。化爲狂道士，山谷恣騰蹂。誤入華陽洞，竊飲茆君酒。君命囚巖間，巖石爲械紐。松根絡其足，藤蔓縛其肘。蒼苔眯其目，叢棘哽其口。三年化爲石，堅瘦敵瓊玖。無復號雲聲，空餘舞杯手。樵夫見之笑，抱賣易升斗。楊公海中仙，世俗那得友。海邊逢姑射，一笑微俛首。胡不載之歸，用此頑且醜。求詩紀其異，本末得細剖。吾言豈妄云，得之亡是叟。

迨作瀨口遇風詩戲用其韻

我詩如病驥，悲鳴向衰草。有兒真驥子，一噴羣馬倒。養氣勿吟哦，聲名忌太早。風濤借筆力，勢逐孤雲掃。何如陶家兒，遠舍覓梨棗。君看押強韻，已勝郊與島。

次韻徐積

殺雞未肯邀季路，裹飯先須問子來。但見中年隱槐市，豈知平日賦蘭臺。海山入夢方東去，風雨留人得暫陪。若說蛾眉眼前是，故鄉何處不堪回。

元豐七年有詔京東淮南築高麗亭館密海二州騷然有逃亡者明年軾過之歎其壯麗留一絕

云

簷櫺飛舞垣牆外，桑柘蕭條斤斧餘。盡賜昆耶作奴婢，不知償得此人無。

過密州次韻趙明叔喬禹功

先生依舊廣文貧，老守時遭醉尉曠。汝輩何曾堪一笑，吾儕相對復三人。黃鸝催曉淒涼曲，白髮驚秋見在身。一別膠西舉朋友，扁舟歸釣五湖春。

再過常山和昔年留別詩

個儂山前叟，迎我如迎新。那知夢幻軀，念念非昔人。江湖久放浪，朝市誰相親。卻尋泉源去，桃花逢避秦。

再過超然臺贈太守霍翔

昔飲零泉別常山，天寒歲在龍蛇間。山中童兒拍手笑，問我西去何當還。十年不赴竹馬約，扁舟獨與漁簑閑。重來父老喜我在，扶挈老幼相遮攀。當時襤褸皆七尺，而我安得留朱顏。問今太守爲誰歟，護光充國鬢未斑。翔自言在燕河作屯田有功，躬持牛酒勞行役，無使杞菊嘲寒慄。超然置酒尋舊迹，尙有詩賦鑱堅頑。孤雲落日在馬耳，照耀金碧開煙鬟。邦淇自古北流水，跳波下瀨鳴玦環。願公談笑作石埭，坐使城郭生溪灣。

海市井敘

予聞登州海市舊矣，父老云常出於春夏，今歲晚不復見矣。予到官五日而去，以不見爲恨，禱於海神廣德王之廟，明日見焉，乃作此詩。

東方雲海空復空。羣仙出沒空明中。蕩搖浮世生萬象。豈有貝闕藏珠宮。心知所見皆幻影。敢以耳目煩神工。歲寒水泠天地閉。爲我起墊轅魚龍。重樓翠阜出霜曉。異事驚倒百歲翁。人間所得容力取。世外無物誰爲雄。率然有請不我拒。信我人厄非天窮。潮陽太守南遷歸。喜見石廩堆祝融。自言正直動山鬼。豈知造物哀龍鍾。仲眉一笑豈易得。神之報汝亦已豐。斜陽萬里孤鳥沒。但見碧海磨青銅。新詩綺語亦安用。相與變滅隨東風。

登州孫氏萬松堂

萬松誰種已摧攢。半嶺蒼雲映此邦。露重珠纓蒙翠蓋。風來石齒碎寒江。浮空兩竹橫南閣。倒影扶桑射北窗。坐待夕烽傳海嶠。重城歸去踏蓬蓬。

過萊州雪後望三山

東海如碧環。西北卷登萊。雲光與天色。直到三山回。我行適冬仲。薄雪收浮埃。黃昏風絮定。半夜扶桑開。參差太華頂。出沒雲濤堆。安期與羨門。乘龍安在哉。茂陵秋風客。勸爾麾一杯。帝鄉不可期。楚些招歸來。

遺直坊并敘

富鄭公之客李君諱常。登人也。故太守李公諱師中。榜其閭曰遺直。而其子大方求詩於軾。爲賦一首。使君不浪出。羔鴈親扣門。先生但清坐。薤水已多言。當時邦人化。市無晨飲豚。歲月曾幾何。客主皆九原。魯經有餘歎。楚些無歸魂。我作遺直詩。過者式其藩。

次韻趙令鑠

東坡已報六年穰。惆悵紅塵白首郎。枕上溪山猶可見。門前冠蓋已相望。故人年少真瓊樹。落筆風生戰
堵牆。端向甕間尋吏部。老來專以醉爲鄉。

次韻王定國得穎倅二首

仙風入骨已凌雲。秋水爲文不受塵。一噫固應號地穎。餘波猶足掛天紳。買牛但自捐三尺。射鼠何勞挽
六鈞。莫向百花潭上去。醉翁不見與誰春。
滔滔四海我知津。每愧先生植杖芸。自少多言晚聞道。從今閉口不論文。澀翻白獸樽中酒。歸煮青泥坊
底芹。要識老僧無盡處。牀前牛蟻不曾聞。

次韻趙令鑠惠酒

神仙無石髓。生世悲鬢寓。坐待玉膏流。千載真旦暮。青州老從事。海上非所部。惠然肯見從。知我憎市酤。
開餅自洗盞。肴核誰與具。門前聽剝啄。烹魚得尺素。

送范純粹守慶州

才大古難用。論高常近迂。君看趙魏老。乃爲滕大夫。浮雲無根蒂。黃潦能須臾。知經幾成敗。得見眞賢愚。
羽旄照城闕。談笑安邊隅。當年老使君。赤手降於菟。諸郎更何事。折筆覆其雛。吾知鄧平叔。不關月支胡。

次韻王震

攜文過我治平間。霧豹當時始一班。聞道吹噓借餘論。故教流落得生還。清篇帶月來霜夜。妙語先春發
病顏。詩酒暮年猶足用。竹林高會許時攀。

次韻王定國謝韓子華過飲

楚有孫叔敖，長城隱千里。哀哉練裙子，負薪躡破履。豈無故交親，逝去如覆水。不如老優孟，談笑託諸美。世家不可恃，如倚折足几。祥符有賢相，手握天下砥。懿敏亦名公，三貴德爵齒。蓋棺今幾日，公子誰料理。雖要卿料理，欲說且止止。宅相開府公，久爲蒼生起。如何垂老別，冰盤餽蒼耳。親嫌妨鴉鵲，相對發微訛。新詩如彈丸，脫手不移晷。我亦老賓客，苦語落紈綺。莫詞三上章，有道貧賤恥。

惠崇春江曉景二首

竹外桃花三兩枝，春江水暖鴨先知。蘆蒿滿地蘆芽短，正是河豚欲上時。兩兩歸鴻欲破羣，依依還似北歸人。遙知朔漠多風雪，更待江南半月春。

次韻周邠

南遷欲舉力田科，三徑初成樂事多。豈意殘年踏朝市，有如疲馬畏陵坡。羨君同甲心方壯，笑我無聊鬢已皤。何日西湖尋舊賞，淡煙疎雨暗漁蓑。

次韻胡完夫

青山別淚尚爛斑，十載江湖困抱關。老去上書還北闕，朝來拄笏望西山。相從盃酒形骸外，笑說平生醉夢間。萬事會須齊伯始，白頭容我占清閑。

次韻錢穆父

老入明光踏舊班，染須那復唱陽關。故人飛上金鑾殿，遷客來從飯顆山。大筆推君西漢手，一言置我二

劉間便須置酒呼同舍，看賜飛龍出帝閤。

再次韻答完夫穆父二公自曹先世同在西掖

掖垣老吏識郎君，並轡天街兩絕塵。汗血固應生有種，夜光那復困無因。豈知西省深嚴地，也著東坡病瘦身。免使謫仙明月下，狂歌對影只三人。

次韻答滿思復

自甘茅屋老三間，豈意彤廷綴兩班。紙落雲煙供醉後，詩成珠玉看朝還。誰言載酒山無賀，記取啼烏巷有顏。但恐跛鞋隨赤驥，青雲飛步不容攀。

卷十六

詩八十八首

送戴蒙赴成郡玉局覲將老焉

拾遺被酒行歌處，野梅官柳西郊路。開道華陽版籍中，至今尚有城南杜。我欲歸尋萬里橋，水花風葉暮蕭蕭。芋魁徑尺誰能盡，椹木三年已足燒。百歲風狂定何有，羨君今作峨眉叟。縱未家生執戟郎，也應世出埋輪守。莫歎老病未歸身，玉局他年第幾人。會待子猷清興發，還須雪夜去尋君。

送陳睦知潭州

華清縹渺浮高棟，上有纈林藏石甕。一杯此地初識君，千巖夜上同飛鞚。君時年少面如玉，一飲百觚嫌

未痛白鹿泉頭山月出。寒光潑眼如流汞。朝元關上酒醒時。臥聽風鸞鳴鐵鳳。舊遊空在人何處。二十三年真一夢。我得生還雪髯滿。君亦老嫌金帶重。有如社燕與秋鴻。相逢未穩還相送。洞庭青草渺無際。天柱紫蓋森欲動。湖南萬古一長嗟。付與騷人發嘲弄。

用前韻答西掖諸公見和

雙貌蟠礎龍纏棟。金井漉轆鳴曉甕。小殿垂簾白玉鉤。大宛立仗朱絲鞵。風馭賓天雲雨隔。孤臣忍淚肝腸痛。羨君意氣風生坐。落筆縱橫驚走汞。上樽日日寫黃封。賜茗時時開小鳳。閉門憐我老太玄。給札看君賦雲夢。金奏不知江海眩。木瓜屢費瑤瓊重。豈惟塞步困追攀。已覺侍史疲轟送。春還宮柳腰支活。雨入御溝鱗甲動。借君妙語發春容。願我風琴不成弄。

次韻王觀正言喜雪

聖人與天通。有詔寬獄市。好語夜喧街。溼雪朝覆砌。紛然退朝後。色映宮槐媚。欲夸翦刻工。故上朱藍袂。我方執筆待。未敢書上瑞。君猶伏閣爭。高論亦少慰。罪霏止還作。盎盎風與氣。神龍久潛伏。一怒勢必倍。行當見三白。拜舞謹萬歲。歸來飲君家。酣詠追既醉。

和蔣發運

夜雨飄千偈。書來又一言。此身真佛祖。何處不羲軒。鏐穩江吹坐。樓空月入樽。遙知思我處。醉墨在頰垣。

送表弟程六知楚州

烟烟明珠照雙燈。當年三老蘇。程石里人下道避鳩杖。刺史迎門倒烏鳥。我時與子皆兒童。狂走從人覓

梨栗健如黃犢不可恃。隙過白駒那暇惜。醴泉寺古垂橘柚。石頭山高闌松栢。諸孫相逢萬里外。一笑未解千憂集。子方得郡古山陽。老手生風謝刀筆。我正含毫紫微閣。病眼昏花困書檄。莫教印綬繫餘年。去掃墳墓常有日。功成頭白早歸來。共藉梨花作寒食。

和人假山

上黨據天碧玉環。絕河千里抱商顏。試觀煙雨三峯外。都在靈仙一掌間。造物何如童子戲。寫真聊發使君閑。何當挈取西征去。畫作圍床六曲山。

送王伯敷守虢

華山東麓秦遺民。當時依山來避秦。至今風俗含古意。柔桑淥水招行人。行人掉臂不回首。爭入蟠函土囊口。惟有使君千里來。欲飲三堂無事酒。三堂本來一事無。日長睡起聞投壺。牀頭硯石開雲月。澗底松根斲雪腴。山棚盜散人安寢。勸買耕牛發陳廩。歸來只作水衡卿。我欲攜壺就君飲。

道者院池上作

下馬逢佳客。攜壺傍小池。清風亂荷葉。細雨出魚兒。井好能冰齒。茶甘不上眉。歸塗更蕭瑟。真箇解催詩。

次韻子由送千之姪

江上松楠深復深。滿山風雨作龍吟。年來老幹都生菌。下有孫枝欲出林。白髮未成歸隱計。青衫僅有濟時心。閉門試草三千牘。仄席求人少似今。

書文與可墨竹并敘

亡友文與可有四絕詩一楚詞二草書三畫四與可嘗云世無知我者惟子瞻一見識吾妙處既沒七年觀其遺迹而作是詩

筆與子皆逝詩今誰爲新空遺運斤質卻吊斷絃人

次韻錢舍人病起

牀下龜寒且耐支。杯中她去未應衰。殿門明日逢王傅。樞具爭先看不疑。坐覺香煙攜袖少。獨愁花影上廊遲。何妨一笑千痾散。絕勝倉公飲上池。

次韻和王鞏

謫仙竄夜郎。子美耕東屯。造物豈不惜。要令工語言。王郎年少日。文如餅水翻。爭鋒雖剽甚。聞鼓或驚奔。天欲成就之。使觸羝羊藩。孤光照微陋。耿如月在盆。歸來千首詩。傾寫五石樽。卻疑彭澤在。頗覺蘇州煩。君看都忌子。廉折配春溫。知音必無人。壞壁掛桐孫。

用王鞏韻送其姪震知蔡州

九門插天開。萬馬先朝屯。舉鞭紅塵中。相見不得言。夜走清虛宿。扣門驚鶴翻。君家汾陽家。永巷車雷轟。夕郎方不夕。列戟以自藩。相逢開月閣。畫簷低金盆。至今夢中語。猶舉燈前樽。阿戎脩玉牒。未憚筆削煩。君歸助獻納。坐纒岑與溫。我客二子間。不復尋諸孫。子美詩云。樞門多噂。且復尋諸孫。

號國夫人夜遊圖

佳人自銜玉花驄。翩如驚燕踏飛龍。金鞭爭道寶釵落。何人先入明光宮。宮中羯鼓催花柳。玉奴絃索花

奴手坐中八姨真貴人。走馬來看不動塵。明眸皓齒誰復見。只有丹青餘淚痕。人間俯仰成今古。吳公臺下雷塘路。當時亦笑張麗華。不知門外韓擒虎。

用舊韻送魯元翰知洛州

我在東坡下躬耕三畝園。君爲尚書郎坐擁百吏繁。鳴蛙與鼓吹。等是俗物喧。永謝十年舊。老死三家村。惟君綈袍信。到我雀羅門。緬懷故人意。欲使薄夫敦。新年對宣室。白首代堯言。相逢開前輩。所見多後昆。道館雖云樂。冷卿當復溫。還持刺史節。卻駕朱輪軒。黃髮方用事。白須宜少存。嗣聖眞生知。拯民如救燔。初囚羽淵魄。盡返湘江魂。坐憂東郡決。老守恩王尊。北流桑柘沒。故道塵埃翻。知君一寸心。可敵千步壇。流云自栖止。老幼忘崩奔。得閑閉閣坐。勿使道眼渾。聊乘應捨棧。直溯無生源。歸來成二老。夜榻當重論。

次韻朱光庭初夏

朝罷人人識鄭崇。直聲如在履聲中。臥聞疎簾梧桐雨。獨詠微涼殿閣風。諫苑君方續承業。醉鄉我欲訪無功。陶然一枕誰呼覺。牛蟻新除病後聰。

次韻朱光庭喜雨

久苦趙盾日欣逢。傳說霖坐知千里足。初覺兩河深。破屋常持傘。無薪欲爨琴。清詩似庭燎。雖美未忘箴。

奉敕祭西太一和韓川韻四首

聖生新除祕祀。侍臣來乞豐年。壽宮神君欲至。半夜靈風肅然。玉繩親題御筆。金童來侍天香。禮罷祝融參乘。前驅已過衡湘。

解劍獨行殘月，披衣困臥清風。夢蝶猶飛旅枕，粥魚已響枯桐。陂水初含曉綠，稻花半作秋香。早蓋卻迎朝日，紅雲正遶宮牆。

西太一見王荊公舊詩偶次其韻二首

秋早川原淨麗，雨餘風日清酣。從此歸耕劍外，何人送我池南。但有樽中若下，何須菜上征西。聞道烏衣巷口，而今煙草萋迷。

次韻子由送陳侗知陝州

誰能如鐵牛，橫身負黃河。滔天不能沒，尺箠未易呵。世俗自無常，徐公故逶迤。別來不可說，事與浮雲多。當時無限人，毀譽卽墨阿。虛聲了無實，夜蟲鳴機梭。相逢一笑外，奈此白髮何。天驥皆齟齬，長鳴飽芻禾。王庭旅百寶，大具隨弓戈。君獨一麾去，欲廣五袴歌。甘棠古樂國，白酒金叵羅。知君不久留，治行中新科。過客足噴喜，東堂記分醵。此外但坐歎，後生工揣摩。

送賈訥倅眉二首

當年入蜀歎空回，未見峨眉肯再來。童子遙知頰襦袴，使君先已洗樽罍。李大夫眉之賢守也。鹿頭北望應逢鴈，人日東郊尚有梅。人日出東郊，渡江游鱓頤山，眉之故事也。我老不堪歌樂職，後生試覓子淵才。老翁山下玉淵回，手植青松三萬栽。父老得書知我在，小軒臨水爲君開。試看一一龍蛇活，更聽蕭蕭風雨哀。便與甘棠同不剪，蒼髯白甲待歸來。先君葬於鱓頤山之東，二十餘里，地名老翁泉，君許爲一往，感歎之深，故及。

送程建用

先生本吾耕，文字浩千頃。空倉付公子，坐待發若穎。十年困新說，兒女爭捕影。鑿垣種蒿蓬，嘉穀誰復省。空餘南陔意，太息北堂冷。緘屨隨方進，採薪教草逞。辛勤守一經，菽水賢五鼎。今年聞起廢，魯史復光景。公子亦改官，三就繁馬頸。歸來一笑粲，素髮颯垂領。會看金花詔，湯沐奉朝請。天公不吾欺，壽與龜鶴永。

次韻李修孺留別二首

十年流落敢言歸，魚鳥江湖只自知。豈意青天掃雲霧，盡呼黃髮寄安危。風流吾子真前輩，人物他年記一時。我欲折繻留此老，緇衣誰作好賢詩。

此生別袖幾回塵，夢裏黃州空自疑。何處青山不堪老，當年明月巧相隨。窮通等是思家意，衰病難堪送客悲。好去江魚煮江水，劍南歸路有姜詩。

次韻黃魯直亦目

誦詩得非子夏學，袖史正作丘明書。天公戲人亦薄相，略遣幻醫生明珠。賴君年來屏鮮腴，百千燈光同一如。書成自寫蠅頭表，端就君王覓鏡湖。

和周正孺墜馬傷手

平生學道已神完，豈復兒童私自憐。醉墜何曾傷內守，色憂當爲念先傳。書空漸覺新詩健，把盃行看樂事全。賣卻老驄爲酒直，大呼鄉友作新年。

戲周正孺二絕

折臂三公未可知，會當千鎰訪權奇。
勸君暫略閑閑事，腸斷閑中楊柳枝。
天廡新頒玉鼻驂，故人共敵亦常情。
相如雖老猶能賦，換馬還應繼二生。

題文與可墨竹并敘

故人文與可爲道師王執中作墨竹，且謂執中勿使他人書字，待蘇子瞻來合作詩其側，與可既沒八年，而軾始還朝見之，乃賦一首。

斯人定何人，游戲得自在。詩鳴草聖餘，兼入竹三昧。
時時出木石，荒怪軼象外。舉世知珍之，賞會獨余最。
知音古難合，奄忽不少待。誰云死生隔，相見如飛魄。

潘推官母李氏挽詞

南浦淒涼老逐臣，東坡還往盡幽人。
杯盤慣作陶家客，弦誦常叨孟母鄰。
尙有升堂他日約，豈知負土一阡新。
今年我欲江湖去，莫雨連山宰樹春。

玉堂栽花周正孺有詩次韻

故山桃李半荒榛，粗報君恩便乞身。
竹簟暑風招我老，玉堂花蕊爲誰春。
纖纖翠蔓詩催發，皎皎霜葩髮鬢新。
只有來禽寄李帖，他年留與學書人。

杜介送魚

新年已賜黃封酒，舊老仍分頰尾魚。
陋巷關門負朝日，小園除雪得春蔬。
病妻起斫銀絲鱸，稚子誦尋尺素書。
醉眼矇矓覺歸路，松江煙雨晚疎疎。

送杜介歸揚州

再入都門萬事空，閑看清洛漾東風。當年幃幄幾人在，回首觚稜一夢中。採藥會須逢蒟子，問禪何處識龐翁。歸來鄰里應迎笑，新長淮南舊桂叢。

秋詠石屏

霏霏點輕素，眇眇開重陰。風花亂繁翠，雪外有煙林。雪近勢方壯，林遠意殊深。會有無事人，支頤識此心。

和黃魯直燒香二首

四句燒香偈子，隨香遍滿東南。不是聞思所及，且令鼻觀先參。萬卷明窗小字，眼花只有爛斑。一炷煙消火冷，半生身老心閑。

再和二首來詩言飲酒畫竹石草書

置酒未逢休沐，便同越北燕南。且復歌呼相和，隔籬知是曹參。丹青已自前世，竹石時窺一斑。五字當還靜節，數行誰似高閑。

武昌西山并敘

嘉祐中翰林學士承旨鄧公聖求爲武昌令，常遊寒溪西山，山中人至今能言之。軾謫居黃岡，與武昌相望，亦常往來溪山間。元祐元年十一月二十九日，考試館職，與聖求會宿玉堂，偶話舊事，聖求嘗作元次山謠樽銘，刻之巖石，因爲此詩，請聖求同賦，當以遺邑人，使刻之銘側。

春江淥溼葡萄醅，武昌官柳知誰栽。憶從樊口載春酒，步上西山尋野梅。西山一上十五里，風駕兩掖飛

崔嵬同遊困臥九曲嶺。褰衣獨到吳王臺。中原北望在何許。但見落日低黃埃。歸來解劍亭前路。蒼崖半入雲濤堆。浪翁醉處今尚在。石臼杯飲無樽罍。爾來古意誰復嗣。公有妙語留山隈。至今好事除草棘。常恐野火燒蒼苔。當時相望不可見。玉堂正對金鑾開。豈知白首同夜直。臥看椽燭高花摧。江邊曉夢忽驚斷。銅環玉鎖鳴春雷。山人帳空猿鶴怨。江湖水生鴻鴈來。請公作詩寄父老。往和萬壑松風哀。

西山詩和者三十餘人再用前韻爲謝

朱顏發過如春醕。胸中梨棗初未栽。丹砂未易掃白髮。赤松卻欲參黃梅。寒溪本自遠公社。白蓮翠竹依崔嵬。當時石泉照金像。神光夜發如五臺。飲泉鑿面得真意。坐視萬物皆浮埃。欲收暮景返田里。遠泝江水窮離堆。還朝豈獨羞老病。自歎才盡傾空罍。諸公渠渠若夏屋。吞吐風月清隅隈。我如廢井久不食。古甃缺落生陰苔。數詩往復相感發。汲新除舊寒光開。遙知二月春江闊。雲浪倒卷雲峯摧。石中無聲水亦靜。云何解轉空山雷。欲就諸公評此語。要識憂喜何從來。願求南宗一勺水。往與屈賈滿餘哀。章應物詩云。水性本云靜。石中固無聲。如何兩相激。雷轉空山驚。

送楊孟容

我家峨眉陰。與子同一邦。相望六十里。共飲玻璃江。江山不逢人。遍滿千家窗。但苦窗中人。寸心不自降。子歸治小國。洪鐘噓微撞。我留侍玉坐。弱步敢豐扛。後生多高才。名與黃童雙。不肯入州府。故人餘老龐。慙慙與問訊。愛惜霜眉厖。何以待我歸。寒醅發春缸。

見子由與孔常父唱和詩。輒次其韻。余昔在館中。同舍出入輒相聚。飲酒賦詩。近歲不復講。故終

籍及之庶幾諸公稍復其舊亦太平盛事也

君先魯東家門戶照千古文章固應爾須鬣餘似處雖非蒙俱狀尙有歷國苦誦書口瀾翻布穀雜杜宇十年困奔走櫛沐飽風雨吾道其非耶野處豈兇虎濤陵閑老將拍直口尙乳自君兄弟遺鼎立知有補蓬山者舊散故事誰刪去來迎馮聖傳出錢會稽組吾猶及前輩詩酒盛册府願君唱此風揚鱗斯杜舉

趙令晏崔白大圖幅徑三丈

扶桑大壘如甕盎天女織綃雲漢上往來不遺鳳啣梭誰能鼓臂投三丈人間刀尺不敢裁丹青付與濠梁崔風蒲半折寒鴈起竹間的蹀橫江梅畫堂粉壁翻雲幕十里江天無處着好臥元龍百尺樓笑看江水拍天流

次韻張昌言給事省宿

馮顛久已歛殘雪戎眼何曾眩落暉朔野按行猶雀躍東臺瞑坐覺鳥飛道家有鳥飛入菟宮之說漫誇年少容吾在樂天詩云猶有誇張少年處笑呼張文喚股兄若關樽前舉世稀待向崧陽求水竹一犁煙雨伴公歸

和三舍人省上三月二十九日作明日駕幸景靈宮

紛紛榮瘁何能久雲雨從來翻覆手恍如一夢墮枕中卻見三賢起江右曾子開劉賈父孔經父皆江西人嗟君妙質皆瑚璉顧我虛名但箕斗明朝冠蓋蔭相望共處翠蓋朝宣光武皇已老白雲鄉正與羣帝騎龍翔獨留杞梓扶明堂

送錢承制赴廣西路分都監

當年我作表忠碑，坐覺江山氣未衰。舞鳳尚從天目下，收駒時有渥洼姿。據床到處堪吹笛，橫槊何人解賦詩。知是丹霞破佛手，先應應已憐羣夷。廣西僧寺頃有佛勳之異，錢君碎而投之江中。

次韻曾子開從駕二首

街槐綠閣雨初勻，瑞霧香風滿後塵。清廟幸同觀濟濟，豐年喜復接陳陳。雍容已歷天庖賜，俯伏初嘗貢茗新。輦路歸來聞好語，共驚堯顙類高辛。

入仗魂驚槐草萊，一聲清蹕九門開。暉暉日榜金輿轉，習習風從玉宇來。流落生還真一芥，周章危立近三槐。學士班近執政道傍儻有山中舊，問我收身早晚回。

再和

眼花錯莫鬢霜勻，病馬羸驄只自塵。奉引拾遺叨侍從，思歸少傅羨朱陳。衰年壯觀空驚目，嶮韻清詩苦鬪新。最後數篇君莫厭，擣殘椒桂有餘辛。

憶觀滄海過東萊，日照三山迤邐開。挂觀飛樓凌霧起，仙幢寶蓋拂天來。不聞宮漏催晨箭，但覺簷陰轉古槐。供奉清班非老處，會稽何日乞方回。時方開會稽守

次韻劉賈父省上

密雲今日破郊西，疎雨脩脩未作泥。妻及清閑同笑語，行看衰病費扶攜。花前白酒傾雲液，戶外青鸞響月題。不用臨風苦揮淚，君家自與竹林齊。賈父詩中有不及與其兄原父同時之歎，然其兄子仲溫今爲

魏居舍人。

再和

當年曹守我膠西，共厭舖糟與汨泥。自古赤丸成習俗，因公黃積免提攜。生還各有青山興，病起猶能小字題。莫怪歌吁數相和，曾將獄市寄全齊。買父爲曹州監賊，皆奔秦境，蓋嘗有詩云：從來曹監稍奔秦。

送顧子敦奉使河朔

我友顧子敦，軀膽兩俊偉。便便十圍腹，不但貯書史。容君數百人，一笑萬事已。十年臥江海，了不見愷喜。磨刀向豬羊，醜酒會鄰里。歸來如一夢，豐頰愈茂美。平生批救手，濃墨寫黃紙。會當勸燕然，廊廟登劍履。翻然向河朔，坐念東郡水。河來屹不去，如尊乃勇耳。

次韻子由送家退翁知懷安軍

吾州同年友，粲若琴上星。當時功名意，豈止拾紫青。事既與願違，天或不假齡。今如關中鶴，俛仰在一庭。吾州同年友十三人，今存者六人而已。故有琴上星、關中鶴之語。西南正春早，廢沼黏枯萍。翩然一塵去，想見靈雨零。我無謫仙句，待詔沉香亭。空騎內廐馬，天仗隨雲耕。竟無絲毫補，春焉誰汝令。永懷舊山叟，憑君寄丁寧。

諸公餞子敦賦以病不往復次前韻

君爲江南英，面作河朔偉。人間一好漢，誰似張長史。上書苦留君，言拙輒報已。置之勿復道，出處俱可喜。攀輿共六尺，食肉飛萬里。誰言遠近殊，等是朝廷美。遙知送別處，醉墨爭淋紙。我以病杜門，商頤空振履。

後會知何日。一歡如覆水。善保千金軀。前言戲之耳。

和張昌言喜雨

二聖憂勤忘寢食。百神奔走會風雲。禁林夜直鳴江潮。清洛朝回起縠紋。夢覺酒醒聞好句。帳空簾冷發餘薰。秋來定有豐年喜。剩作新詩準備君。

次韻劉貢父西省種竹

要知西掖承平事。記取劉郎種竹初。舊德終呼名字外。後生誰續笑談餘。昔李公擇種竹館中。戲語同會。後人指此竹必云。李文正手植。貢父笑曰。文正不獨繫筆。亦知種竹耶。時有筆工李文正。成陰障日行當見。取筍供庖計已疎。白首林間望天上。平安時報故人書。李衛公北都童子寺竹。寺僧日報平安。

偶與客飲孔常父見訪方設席延請忽上馬馳去已而有詩戲用其韻答之

揚雄他文不皆奇。獨稱觀餅居井眉。酒客法士兩小兒。陳遵張棟曾何知。主人有酒君獨辭。蟹螯何不左手持。豈復見吾橫氣機。遣人追君君絕馳。盡力去花君自癡。醜醜與酒同一卮。請君更問文殊師。

次韻子由書李伯時所藏韓幹馬

潭潭古屋雲幕垂。省中文書如亂絲。忽見伯時畫天馬。朔風胡沙生落錐。天馬西來從西極。勢與落日爭分馳。龍膺豹股頭八尺。奮迅不受人間羈。元狩虎脊聊可友。開元玉花何足奇。伯時有道真吏隱。飲啄不羨山梁雌。丹青弄筆聊爾耳。意在萬里誰知之。幹惟畫肉不畫骨。而况失實空餘皮。煩君巧說腹中事。妙語欲遣黃泉知。君不見韓生自言無所學。廐馬萬匹皆吾師。

次韻劉貢父獨直省中

明窗畏日曉先曠，高柳鳴蜩午更喧。筆老新詩疑有物，心空客疾本無根。隔牆我亦眠風榻，上馬君先環月軒。共喜早歸三伏近，解衣盤礴亦君恩。

軾以去歲春夏侍立邇英而秋冬之交子由相繼入侍次韻絕句四首各述所懷

曠日脚曉猶清，細細槐花暖自零。坐閱諸公半廊廟，時看黃色起天庭。僕射呂公門下，韓公左丞，劉公，皆自諫席大用。

上尊初破早朝寒，茗盞仍沾講舌乾。陛楯諸郎空雨立，故應漸悔不儒冠。兩鶴摧頽病不言，年來相繼亦乘軒。誤聞九奏聊飛舞，可得裴回爲啄吞。

微生偶脫風波地，晚歲猶存鐵石心。定似香山老居士，世緣終淺道根深。樂天自江州司馬，除忠州刺史，旋以主客郎中知制誥，遂拜中書舍人，軾雖不敢自比，然謫居黃州，起知文登，召爲儀曹，遂忤倖從出，處寒少，大略相與庶幾，復享此翁晚節閑適之樂焉。

送宋朝散知彭州迎侍二親

東來誰迎使君車，知是丈人屋上烏。丈人今年二毛初，登樓上馬不用扶。使君負弩爲前驅，蜀人不復談相如。老幼化服一事無，有鞭不施安用蒲。春波如天漲平湖，鞵紅照坐香生膚。希鱗上壽白玉壺，公堂登歌鳳將雛。諸孫懽笑爭挽須，蜀人畫作西湖圖。

郭熙畫秋山平遠文潞公爲跋尾

玉堂晝掩春日閑，中有郭熙畫春山。鳴鳩乳燕初睡起，白波青嶂非人間。離離短幅開平遠，漠漠疎林寄秋晚。恰似江南送客時，中流回頭望雲巘。伊川佚老髯如霜，臥看秋山思洛陽。爲君紙尾作行草，爛如嵩洛浮秋光。我從公遊如一日，不覺青山映黃髮。爲畫龍門八節灘，待向伊川買泉石。

次韻張昌言喜雨

千里黃流失故居，年來赤地到青徐。遙聞爭誦十行語，無異親巡六尺輿。精貫天人一言足，雲興嶽瀆萬靈趨。愛君誰似元和老，賀雨詩成卽諫書。

書晁補之所藏與可畫竹三首

與可畫竹時，見竹不見人。豈獨不見人，嗒然遺其身。其身與竹化，無窮出清新。莊周世無有，誰知此疑神。若人今已無，此竹寧復有。那將春蚓筆，畫作風中柳。君看斷崖上，瘦節蛟蛇走。何時此霜竿，復入江湖手。晁子拙生事，舉家聞食粥。朝來又絕倒，諛墓得霜竹。可憐先生槃，朝日照苜蓿。吾詩固云爾，可使食無肉。晉書詩云：可使食無肉，不可居無竹。

戲用晁補之韻

昔我嘗陪醉翁醉，今君但吟詩老詩。清詩咀嚼那得飲，瘦竹瀟灑令人飢。試問鳳凰飢食竹，何如鶩馬肥苜蓿。知君忍飢空誦詩，口頰瀾翻如布穀。

書皇親畫扇

十年江海寄浮沈，夢遶江南黃叢林。誰謂風流貴公子，筆端還有五湖心。

書李世南所畫秋景

野木參差落漲痕，疎林欹倒出霜根。扁舟一棹歸何處，家在江南黃葉村。
人間斤斧日創夷，誰見龍蛇百尺姿。不是溪山曾獨往，何人解作掛猿枝。

書鄆陵王主簿所畫折枝二首

論畫以形似，見與兒童鄰。賦詩必此詩，定非知詩人。詩畫本一律，天工與清新。邊鸞雀寫生，趙昌花傳神。何如此兩幅，疎澹含精勻。誰言一點紅，解寄無邊春。瘦竹如幽人，幽花如處女。低昂枝上雀，搖蕩花間雨。雙翎決將起，衆葉紛自舉。可憐採花蜂，清蜜寄兩股。若人富天巧，春色入毫楮。懸知君能詩，寄聲求妙語。

昨見韓丞相言王定國今日玉堂獨坐有懷其人

晝臥玉堂上，微風舉輕紈。銅餅下碧井，百尺鳴飛瀾。俛仰清夢餘，愛此一掬寒。似予平生友，苦語涼肺肝。秀眉玉兩頰，矯矯如翔鸞。置之江淮交，清詩洗江湍。紅鱗對白酒，信美非所安。丞相功業成，還家酒盃寬。人間有此客，折簡呼不難。相將扣東閣，起舞盡餘歡。

和張耒高麗松扇

可憐堂堂十八公，老死不入明光宮。萬牛不來難自獻，裁作團團手中扇。屈身蒙垢君一洗，挂名君家詩集裏。猶勝漢宮悲婕妤，網蟲不見乘鸞子。

故李承之待制六丈挽詞

青青一寸松，中有梁棟姿。天驥墮地走，萬里端可期。世無阿房宮，可建五丈旗。又無穆天子，西征燕瑤池。材大古難用，老死亦其宜。丈夫恐不免，豈患莫已知。公如松與驥，少小稱偉奇。俯仰自廊廟，笑談無羗夷。清朝竟不用，白首仍憂時。願斬橫行將，請烹乾沒兒。言雖不見省，坐折姦雄窺。嗟我去公久，江湖生白鬣。歸來者舊盡，零落存者誰。比公楛中散，龍性不可羈。疑公李北海，慷慨多雄詞。淒涼五君詠，沉痛八哀詩。邪正久乃明，人今屬公思。九原不可傳，千古有餘愆。

次韻孔常父送張天覺河東提刑

送君應典鶴鷗裘，憑仗千鍾洗別愁。脫帽風流餘長史，君喜草書而不工，故以爲戲。埋輪家世本留侯。
張朝子房，七世孫也。樞爲武陽人，墓在今彭山。君登其後塋。子河駿馬方爭出，麟府馬出于河洛。昭義疲兵亦少休，唐稱昭義步兵，蓋澤潞弓箭手。定向秋山得嘉句，故關黃葉滿行驄。

送張天覺得山字

西登太行嶺，北望清涼山。晴空浮五髻，曠藹卿雲間。餘光入巖石，神草出茅菅。何人相指似，稍稍落人寰。能念墜指兒，虬髯茁冰顏。祝君如此草，爲民已痼癩。我亦老且病，眼花腰脚頑。念當勤致此，莫作河東慳。

次韻王定國倂揚州

此身江海寄天遊，一落紅塵不易收。未許相如還蜀道，空教何遜在揚州。又驚白酒催黃菊，尙喜朱顏映黑頭。火急著書千古事，虞卿應未厭窮愁。

詩八十八首

贈李道士并敘

鸞部員外郎李君宗固，景祐中良吏也。守漢州，有道士尹可元，精練善畫，以遺火得罪當死，君緩其獄，會赦獲免。時可元年八十一，自誓且死，必爲李氏子以報。可元既死二十餘年，而君子世昌之婦夢可元入其室，生子曰得柔，小名蜀孫，幼而善畫，既長讀莊老喜之，遂爲道士，賜號妙應，事母以孝謹聞，其寫真蓋妙絕一時云。

世人只數曹將軍，誰知虎頭非癡人。腰間大羽何足道，頰上三毛自有神。平生狎侮諸公子，戲著幼輿巖石裏。故教世世作黃冠，布襪青鞋弄雲水。千年鼻祖守關門，一念還爲李耳孫。香火舊緣何日盡，丹青餘習至今存。五十年初過二，衰顏記我今如此。他時要指集賢人，知是香山老居士。

次韻張舜民自御史出倅虢州留別

玉堂給札氣如雲，初喜湘纍復佩銀。樊口淒涼已陳迹，昔與張同游武昌。樊口來詩中及之，班心突兀見長身。臺吏謂御史立處爲班心，江湖前日真成夢，鄂杜他年恐卜鄰。此去若容陪坐嘯，故應客主盡詩人。

次韻米黻二王書跋尾二首

三館曝書防蠹毀，得見來禽與青李。秋地春蚓久相雜，野鷺家雞定誰美。玉函金籀天上來，紫衣敕使親臨啓。紛綸過眼未易識，磊落挂壁空雲委。歸來妙意獨追求，坐想蓬山二十秋。怪君何處得此本，上有桓玄寒具油。巧偷豪奪古來有，一笑誰似癡虎頭。君不見長安永寧里，王家破垣誰復修。

元章作書日千紙，平生自苦誰與美。畫地爲餅未必似，要令癡兒出餽水。錦囊玉軸來無趾，粲然奪真疑聖智。忍飢看書淚如洗，至今魯公餘乞米。

次韻宋肇惠澄心紙二首

詩老囊空一不留，自番曾作百金收。永叔以澄心百幅遺聖俞，聖俞有詩，知君也厭雕肝腎，分我江南數斛愁。

君家家學陋相如，宜與諸儒論石渠。古紙無多更分我，自應給札奏新書。

郭熙秋山平遠二首

目盡孤鴻落照邊，遙知風雨不同川。此間有句無人見，送與襄陽孟浩然。木落騷人已怨秋，不堪平遠發詩愁。要看萬壑爭流處，他日終煩虬虎頭。

送歐陽辯監澶州酒

汗血駕鼓車，何從致千里。紛紛精麴間，欲試賢公子。君家江南英，濯足滄浪水。竭渡舊黃河，漲沙埋馬耳。由來付造物，倚伏何窮已。當念楚子文，三仕無愠喜。

九月十五日，邇英講論語終篇，賜執政講讀史官燕于東宮。又遣中使就賜御書詩各一首，臣軾得紫薇花絕句，其詞云：絲綸閣下文書靜，鐘鼓樓中刻漏長。獨坐黃昏誰是伴，紫薇花對紫薇郎。翌日各以表謝，又進詩一篇，臣軾詩云：

繡裳畫袂雲垂地，不作成王翦桐戲。日高黃繖下西清，風動槐龍舞交翠。邇英閣前有雙槐，櫻枝屬地如

體形張中蠶簡今千年。漆書蝌蚪光射天。諸儒不復憂吻燥。東宮賜酒如流泉。酒酣復拜千金賜。一紙驚鸞回鳳字。蒼顏白髮便生光。袖有驪珠三十四。臣所賜詩并題日及臣姓名凡三十四字。歸來車馬已喧闐。爭看銀鉤墨色鮮。人間一日傳萬口。喜見雲章第一篇。上前此未嘗以御書賜羣臣。玉堂畫掩文書靜。鈴索不搖鐘漏永。莫言弄筆數行書。須信時平由主理。犬羊散盡沙漠空。捷烽夜到甘泉宮。似聞指麾籤上郡。已覺談笑無西戎。時熙河新獲鬼章。是日溼原復奏夏賊數十萬人皆遁去。文思天子師文母。終閉玉關辭馬武。小臣願對紫薇花。試草尺書招贊普。謹按唐制翰林學士帶知制誥。許緘中書舍人班。今區區以知制誥待罪禁林。故得以紫燕爲故事。

和王晉卿并敘

駢馬都尉王。誥晉卿。功臣金彬之後也。元豐二年。予得罪貶黃岡。而晉卿亦坐累遠謫。不相聞者七年。予既召用。晉卿亦還朝。相見殿門外。感歎之餘。作詩相屬。託物悲慨。阨窮而不怨。泰而不驕。憐其貴公子。有志如此。故次其韻。

先生飲東坡。獨舞無所屬。當時挹明月。對影三人足。醉眠草棘間。蟲虺莫子毒。醒來送歸鴈。一寄千里目。悵焉懷公子。旅食久不玉。欲書加餐字。遠託西飛鶴。謂言相濡沫。未足救溝瀆。吾生如寄耳。何者爲禍福。不如兩相忘。昨夢那可逐。上書得自便。歸老湖山曲。躬耕二頃田。自種十年木。豈知垂老眼。卻對金蓮燭。公子亦生還。仍分刺史竹。賢愚有定分。尊俎守尸祝。文章何足云。執技等醫卜。朝廷方西顧。羌虜驕未伏。遙知重陽酒。白羽落黃菊。羨君真將家。浮面氣可掬。寰天網羅費。轉君語則赤氣浮。面爲將。勿多殺人。何

當請長纓一戰河湟復。

謝王澤州寄長松兼簡張天覺二首

莫道長松浪得名，能教覆額兩眉青。便將徑寸同千尺，知有奇功似伏苓。

憑君說與埋輪使，速寄長松作解嘲。送張天覺詩有埋輪及河東擊之語，無復青黏和漆葉，枉將鍾乳敵

仙茅。

次韻劉貢父所和韓康公憶持國二首

夢覺真同鹿覆蕉，相君脫隴自參寥。顏紅底事髮先白，室邇何妨人自遙。狂似次公應未怪，醉推東閣不須招。援毫欲作衣冠表，盛事終當繼八蕭。唐蕭氏白珣及遵八宰相。

閉戶端居念獨深，小軒朱檻憶同臨。燈須誰識英公意，英公爲其姊作粥糜須，曰吾與姊皆老矣，能幾進粥。黃髮聊知子建心。子建與楚王彪別詩云：王共愛玉體，共享黃髮期。已託西風傳絕唱，且邀明月伴孤

斟。他年內集應呼我，下客先判平醉陪。

次韻劉貢父叔姪屬

玉堂孤坐不勝清，長羨枚鄒接長卿。只許隔牆聞爵酒，時因議事得聯名。機雲似我多遺俗，廣受如君不治生。共託屬車塵土後，鈞天一餉夢中榮。

次韻韓康公置酒見留

庭下黃花一醉同，重來雪嶽已穹窿。不應屢費譏安石，但使毋多酌次公。鍾乳金斂人似玉，鷓鴣絃鐵撥坐

生風少卿尙有車茵在。頗覺寬容勝弱翁。

次韻王都尉偶得耳疾

君知六鑿皆爲贅。我有一言能決疣。病客巧聞牀下蟻。癡人強覷棘端猴。聰明不在根塵裏。樂餌空爲婢僕憂。但試周郎看鬢否。曲音小誤已回頭。

送喬全寄賀君六首并敘

舊聞靖長官。賀水部。皆唐末五代人。得道不死。章聖皇帝東封有謁於道左者。其謁云。晉水部員外郎。賀元再拜而去。上不知也。已而閱謁。見之大驚。物色求之。不可得。天聖初。又使其弟子喻澄者。詣闕進佛道像。直數千萬張。公安道與澄遊。具得其事。又有喬全者。少得大風疾。幾死。賀使學道。今年八十。益壯盛。人無復見賀者。而全數見之。元祐二年十二月。全來京師。十許日。予留之。不可曰。賀以上元期。我於蒙山。又曰。吾師嘗遊密州。識君於常山道上。意若喜君者。作是詩以送之。且作五絕句以寄賀。

君年二十美且都。初得惡疾墮眉須。紅顏白髮驚妻孥。覽鏡自嫌欲棄軀。結茅窮山啖松腴。路逢逸秦博士盧。方瞳照野清而臞。再拜未起煩一呼。覺知此身了非吾。爛然蓮花出泥塗。隨師東遊渡濰都。濰都齊州。二水名。山頭見我兩輪朱。豈知仙人混屠沽。爾來八十胸垂胡。上山如飛驢。人扶東歸有約不敢渝。新年當參老仙儒。秋風西來下雙鳧。得棗如瓜分我無。

生長兵間早脫身。晚爲元祐太平人。不驚渤嶼桑田變。來石龜蒙漏澤春。曾謁東封玉輅塵。幅巾短褐亦逡巡。行宮夜奏空名姓。悵望雲霞縹緲人。

垂老區區豈爲身。微言一發重千鈞。始知不見高皇帝。正是商山四老人。
舊聞父老晉郎官。已作飛騰變化看。聞道東蒙有居處。願供薪水看燒丹。
千古風流賀季真。最憐嗜酒誦仙人。狂吟醉舞知無益。粟飯藜羹問養神。

送家安國教授歸成都

別君二十載。坐失兩鬢青。吾道雖艱難。斯文終典刑。屢作退飛鶴。羞看乾死螢。
一落戎馬間。五見霜葉零。夜談空說劍。春夢猶橫經。新科復舊貫。童子方乞靈。
須煩凌雲手。去作入蜀星。蒼苔高殿室。古柏文翁庭。初聞編簡香。始覺鋒鏑腥。
岷峨有雛鳳。梧竹養脩翎。嗚呼應澗律。飛舞集虞廷。吾儕便歸老。亦足慰餘齡。

和子由除夜元日省宿致齋三首

江湖流落豈關天。禁省相望亦偶然。等是新年未相見。此身應坐不歸田。
白髮蒼顏五十三。家人強遣試春衫。朝回兩袖天香滿。頭上銀幡笑阿咸。
當年踏月走東風。坐看春闈鎖醉翁。白髮門生幾人在。卻將新句調兒童。

次韻答張天覺二首

車輕馬穩轡銜堅。但有蚊虻喜撲緣。截斷口前君莫怪。人間差樂勝巢仙。
馭風騎氣我何勞。且要長松作土毛。亦如訶佛丹霞老。卻向清涼禮白毫。

次韻黃魯直畫馬試院中作

少年鞍馬勤遠行。臥聞齧草風雨聲。見此忽思短策橫。十年髀肉磨欲透。
那更陪君作詩瘦。不如芋魁歸

飯豆門前欲嘶御史聽，詔恩三日休老翁。羨君懷中雙橘紅，黃有老母。

余與李鷹方叔相知久矣，領貢舉事而李不得第，愧甚，作詩送之。

與君相從非一日，筆勢翩翩疑可識。平時說古戰場，過眼終迷日五色。我慚不出君大笑，行止皆天子何責。青袍白紵五千人，知子無怨亦無德。買羊沽酒謝玉川，爲我醉倒春風前。歸家但草凌雲賦，我相夫子非癡仙。

和下晉卿送梅花次韻

東坡先生未歸時，自種來禽與青李。五年不踏江頭路，夢逐東風泛蘋芷。江梅山杏爲誰容，獨笑依依隨野水。此間風物君未識，花浪翻天雪相激。明年我復在江湖，知君對花三嘆息。

和宋肇遊西池次韻

漢皇慈儉不開邊，尚教千艘下瀟船。貧看鱉鱉飛鬪艦，不知鼉鼉舞鈞天。故山西望三千里，往事回思二十年。自笑區區足官府，不如公子散神仙。

書艾宣畫四首

竹鶴

此君何處不相宜，況有能言老令威。誰識長身古君子，猶將縞布綠深衣。

黃精鹿

太華西南第幾峯，落花流水自重重。幽人只取黃精去，不見春山鹿養茸。

杏花白鷗

天工翦刻爲誰妍，袍裳游蜂自作團。把酒惜春都是夢，不如閑客此閑看。

蓮龜

半脫蓮房露壓欹，綠荷深處有游龜。只應翡翠闌苔上，獨見玄夫曝日時。

僕領貢舉未出錢穆父雪中作詩見及三月二十日同游金明池始見其詩次韻爲答

雪知我出已全消，花待君來未敢飄。行避門生時小飲，忽逢騎吏有嘉招。魚龍絕技來千里，斑白遺民數四朝。知有黃公酒壚在，蒼顏華髮自相遙。

次韻子由五月一日同轉對

跪奉新書笏在腰，談王正欲伴耕樵。晉陽豈爲一門事，唐高祖謂溫大推兄弟云：我起義晉陽止爲卿一門耳。宣政聊同五月朝。正元中詔曰：自今後五月一日，御宣政殿與文武百僚相見。憂患半生聯出處，歸休上策早招要。後生可畏吾衰矣，刀筆從來錯料堯。

韓康公挽詞三首

故國非喬木，興王有世臣。嗟予後死者，猶及老成人。德業經文武，風流表縉紳。空餘行樂地，處處泣遺民。再世忠清德，三朝翼贊勳。功成不歸國，就訪敢忘君。舊學嚴詩律，餘威靖塞氛。何當繼韓奕，故吏總能文。西第開東閣，初筵點後塵。笙歌邀白髮，燈火樂青春。扶路三更罷，回頭一夢新。賦詩猶墨溼，把卷獨沾巾。

柏石園詩并敘

陳公弼家藏柏石圖。其子樾季常傳寶之。東坡居士作詩以爲之銘。

柏生兩石間。天命本如此。雖云生之艱。與石相終始。韓子俯仰人。但愛平地美。土膏雜糞壤。成壤幾何耳。君看此槎牙。豈有可移理。蒼龍轉玉骨。黑虎抱金柅。畫師亦可人。使我毛髮起。當年落筆意。正欲譏韓子。慶源宣義王丈以累舉得官爲洪雅主簿雅州戶掾遇吏民如家人安樂之既謝事居眉之青神瑞草橋放懷自得。有書來求紅帶。旣以遺之。且作詩爲戲。請黃魯直學士秦少游賢良各爲賦。

一首爲老人光華

青衫半作霜葉枯。遇民如兒吏如奴。吏民莫作官長看。我是識字耕田夫。妻啼兒號刺史怒。時有野人來。挽須拂衣自注下。下考芋魁飯豆吾豈無。歸來瑞草橋邊路。獨游還佩平生壺。慈母巖前白喚渡。青衣江上人爭扶。今年蠶市數州集。中有遺民懷袴襦。邑中之黔相指似。白髯紅帶老不癯。我欲西歸卜鄰舍。隔牆拊掌容歌呼。不學山王乘驢馬。回頭空指黃公壚。

次許冲元韻送成都高士敦鈐轄

移中老監本虛名。懶作燕山萬里行。金與高君奉使。忽丹辭竟不行。坐看飛鴻迎使節。歸來駿馬換傾城。高才本不緣勳閥。餘力還思治蜀兵。西望雪山烽火盡。不妨樽酒寄平生。

次前韻送程六表弟

君家兄弟真連璧。門下朱輪家萬石。竹使猶分刺史符。尚方行賜尚書鳥。前年持節發倉廩。到處賣刀收。賢粟歸來閉口不論功。卻是渡江誰復惜。君才不用如澗松。我老得全猶社櫟。青衫莫厭百僚底。白首上。

有千薪積。憶昔江湖一釣舟。無數雲山供點筆。未應便障西風扇。只恐先移北山檝。憑君寄謝江南叟。念我空見長安日。浮江汜蜀有成言。江水在此吾不食。

和王晉卿題李伯時畫馬

督郵有良馬。不爲君所奇。顧收紙上影。駿骨何由歸。一朝見繁策。蟻封驚肉飛。豈惟馬不遇。人已半生癡。送錢穆父出守越州絕句二首

簿書常苦百憂集。樽酒今應一笑開。京兆從教思廣漢。會稽聊喜得方回。若耶溪水雲門寺。賀監荷花空自開。我恨今猶在泥滓。勸君莫棹酒船回。

戲書李伯時畫御馬好頭赤

山西戰馬飢無肉。夜嚼長韉如嚼竹。蹶問三丈是徐行。不信天山有坑谷。豈如廐馬好頭赤。立仗歸來臥斜日。莫教優孟卜葬地。厚衣薪楛入銅歷。

送程七表弟知泗州

江湖不在眼。塵土坐滿顏。繫舟清洛尾。初見淮南山。淮山相媚好。曉鏡開煙鬟。持此娛使君。一笑簿領閒。使君如天馬。朝燕莫荆蠻。時無王良手。空老十二閑。聊當出毫末。化服狡與頑。勿謂無人知。古佛臨清澗。赤子視萬類。流萍聞人寰。但使可此人。餘事真茆菅。

送曹輔赴闕漕

曹子本儒俠。筆勢翻濤瀾。往來戎馬間。邊風裂儒冠。詩成橫槊裏。楮墨何曾乾。一日事遠遊。紅塵隔巖巖。

平生羊炙口，並海搜鹹酸。一從荔枝飲，豈念苜蓿槃。我亦江海人，市朝非所安。常恐青霞志，坐隨白髮闌。淵明賦歸去，談笑便解官。今我何爲者，索身良獨難。憑君問清漣，秋水今幾竿。我舟何時發，霜露日已寒。

次韻王郎子立風雨有感

百年一俯仰，寒暑相主客。稍增裘褐氣，已覺團扇厄。不須計榮辱，此喪彼有獲。我翠終不改，無懼故無釋。後生不自牧，呻吟空挾策。握苗不待長，賣菜苦求益。此郎獨靜退，門外無行迹。但恐陶淵明，每爲飢所迫。淒風弄衣結，小雪穿門席。願君付一笑，造物亦戲劇。朝來賦雲夢，筆落風雨疾。爲君裁春衫，高會開桂籍。

次韻黃魯直嘲小德小德魯直子其母微故其詩云解著潛夫論不妨無外家

進饌客爭起，小兒那可泮。莫欺東方星，三五自橫斜。名駒已汗血，老蚌空泥沙。但使伯仁長，還與絡秀家。

書林次中所得李伯時歸去來陽關二圖後二首

不見何戡唱渭城，舊人空數米嘉榮。龍眠獨識慙慙處，畫出陽關意外聲。

兩本新圖寶墨香，樽前獨唱小秦王。爲君翻作歸來引，不學陽關空斷腸。

送塞道士歸廬山

物之有知蓋恃息，孰居無事使出入。心無天遊室不容，六鑿相攘婦爭席。法師逃入廬山，山中無人自往還。往者一空還者失，此身正在無還間。緜緜不絕微風裏，內外丹成一彈指。人間俯仰三千秋，騎鶴歸來與子游。

臥病逾月請郡不許復直玉堂十一月一日鑲院是日苦寒詔賜官燭法酒書呈同院

微霰疎疎點玉堂，詞頭夜下攬衣忙。分光御燭星辰爛，拜賜官壺雨露香。醉眼有花書字大，老人無睡漏聲長。何時卻逐桑榆暖，社酒寒燈樂未央。

送周朝議守漢州

茶爲西南病，氓俗記二李。杞與釋也，何人折其鋒。矯矯六君子，思道與廷正。稱張永徽，笑醇翁。呂元鈞，宋文輔也。君家尤出力，流落初坐此。謂當收桑榆，華髮君劍履。胡爲犯風雪，歲晚行未已。念歸誠得計，願自爲謀耳。吾聞江漢間，瘡痍有未起。莫輕襲遂老，君王付尺箠。召還當有詔，挽袖謝鄰里。猶堪作水衡，供張園林美。

木山并敘

吾先君子嘗蓄木山三峯，且爲之記與詩。詩人梅二丈聖俞見而賦之，今三十年矣，而猶子千乘又得五峯，益奇。因次聖俞韻，使并刻之其側。

聖俞詩

空山枯楠大蔽牛，霹靂夜落魚鳧洲。魚鳧水射幾千秋，蠶飢爛隨沙蕩流。惟存堅骨蛟龍鏤，形侔三山中。雄酋左右兩峯相挾翼，尊奉君長無慢尤。蘇夫子見之驚且喜，買於谿叟憑貂裘。因嗟大不爲梁棟，又歎殘不爲薪樵。南侵薜蘿得石瘦，宜與夫子歸隱丘。

次韻

木生不願回萬牛，願終天年仆沙洲。時來幸逢河伯秋，掀然見怪推不流。蓬婆雪嶺巧雕鏤，蟄蟲行蟻爲

豪酋阿咸大膽忽持去。河伯好事不汝尤。城中古沼浸坤軸。一林瘦竹吾菟裘。二頃良田不難買。三年糧木行可樞。會將白髮對蒼嫗。魯人不厭東家丘。

送千乘千能兩姪還鄉

治生不求富。讀書不求官。譬如飲不醉。陶然有餘歡。君若龐德公。白首終泥蟠。豈無子孫念。願獨遺以安。鹿門上冢回。牀下拜龍巖。躬耕竟不起。耆舊節獨完。念汝少多難。冰雪落綺紈。五子如一人。奉養真色難。烹雞獨餽母。自饗苜蓿盤。口腹恐累人。寧我食無肝。西來四千里。敝袍不言寒。秀眉似我兄。亦復心闊寬。忽然捨我去。歲晚留餘酸。我豈軒冕人。青雲意先闌。汝歸蒔松菊。環以青琅玕。禮陰三年成。可以挂我冠。清江入城郭。小圃生微瀾。相從結茆舍。曝背談金鑾。

送周正孺知東川

得郡養生榮。還家昔人重。而況東西川。千騎許上冢。里門下車入。父老白鷺筮。端如何武賢。不事長卿寵。清時養材傑。杞梓方培擁。未應遺合抱。取用及把拱。如君尙出麾。顧我宜耕隰。告歸謝先手。求去悔不勇。豈云慕廉退。實自知衰冗。爲君掃棠陰。畫像或相踵。蜀中太守無不畫像者。

題李伯時畫趙景仁琴鶴圖二首

清獻先生無一錢。故應琴鶴是家傳。誰知默鼓無絃曲。時向珠宮舞幻仙。醜石寒松未易親。聊將短曲調長人。乘軒故自非明眼。終日微微舞麤薪。

次前韻再送周正孺

東川得望郎，半與西爭重。高風傾石室，舊學鄙文冢。蜀人安使君，所至野不聳。竹馬迎細侯，大錢送劉龍。遙知句谿路，老穉相扶擁。看畫古叢祠，百怪朝幽拱。牛頭與兜率，雲木蔚堆壘。醉鄉追舊游，筆陣賈餘勇。聊將詩酒樂，一掃簿書冗。西風吹好句，珠玉本無踵。劉說文冢銘在梓州。

書王定國所藏煙江疊嶂圖王君伯恭

江上愁心千疊山，浮空積翠如雲煙。山耶雲耶遠莫知，煙空雲散山依然。但見兩崖蒼蒼暗絕谷，中有百道飛來泉。繁林絡石隱復見，下赴谷口爲奔川。川平山開林麓斷，小橋野店依山前。行人稍度喬木外，漁舟一葉江吞天。使君何從得此本，點綴毫末分清妍。不知人間何處有此境，徑欲往買二頃田。君不見武昌樊口幽絕處，東坡先生留五年。春風搖江天漠漠，暮雲捲雨山娟娟。丹楓翻鴉伴水宿，長松落雪驚鷗眠。桃花流水在人世，武陵豈必皆神仙。江山清空我塵土，雖有去路尋無緣。還君此畫三歎息，山中故人應有招我歸來篇。

次韻王定國會飲清虛堂

何遜揚州又幾年，官梅詩興故依然。何人可復問季孟，與子不妨中聖賢。卜築君方淮上郡，歸心我已劍南川。此身正似蠶將老，更盡春光一再眠。

輿罷節侍宴前，一日微雪與子由同訪王定國小飲清虛堂定國出數詩皆佳而五言尤奇子由又言昔與孫巨源同過定國感念存沒悲歎久之夜歸稍醒各賦一篇明日朝中以示定國也

天風漸漸飛玉沙，詔恩歸沐休早衙。遙知清虛堂裏雪，正是籬菊林中花。出門自笑無所詣，呼酒持勸惟

君家踏冰凌，競戰疲馬。扣門剝啄，驚寒鴉羨君五字入詩律。欲與六出爭天葩。頭風已倩檄手愈。背癢恰得仙爪爬。銀餅瀉油浮蟻酒。紫盃鋪粟盤龍茶。幅巾起作鳴鶴舞。疊鼓誰摻漁陽撾。九衢燈火雜夢寐。十年聚散空咨嗟。明朝握手殿門外。共看銀闕瞰晨霞。

王晉卿所藏著色山二首

縹渺營丘水墨仙。浮空出沒有無間。爾來一變風流盡。誰見將軍著色山。
摩訶何人似退之。意行無路欲從誰。宿雲解駁晨光滯。獨見山紅澗碧時。

次韻黃魯直效進士作歲寒知松柏詩

龍蟄雖高臥。雞鳴不廢時。炎冷徒自變。茂悅兩相知。已負棟梁質。肯爲兒女姿。那憂霜質贊。未喜日遲遲。
難與夏蟲語。永無秋實悲。誰知此植物。亦解乘天驂。

王晉卿作煙江疊嶂圖僕賦詩十四韻晉卿和之語特奇麗因復次韻不獨紀其詩畫之美亦爲道其出處契闊之故而終之以不忘在莠之戒亦朋友忠愛之義也

山中舉頭望日邊。長安不見空雲煙。歸來長安望山上。時移事改應潸然。管絃去盡賓客散。惟有馬埒編金泉。滌注故自千里足。要飽風雪輕山川。屈居華屋唱棗脯。十年俯仰龍旂前。却因病瘦出奇骨。鹽車之厄寧非天。風流文采磨不盡。水墨自與詩爭妍。畫山何必山中人。田歌自古非知田。鄭虔三絕君有二。筆勢挽回三百年。欲將巖谷亂窈窕。眉峯脩嫵誇連娟。人間何有春一夢。此身將老蠶三眠。山中幽絕不可久。要作平地家居仙。能令水石長在眼。非君好我當誰緣。願君終不忘在莠。樂時更賦囚山篇。柳子厚有

四山賦

夜直玉堂攜李之儀端叔詩百餘首讀至夜半書其後

玉堂清冷不成眠，伴直難呼孟浩然。暫借好詩消永夜，每逢佳處輒參禪。愁侵硯滴初含凍，喜入燈花欲鬪妍。寄語君家小兒子，他時此句一時編。

景仁和賜酒燭詩復次韻謝之時公方遊新樂

笙磬分均上下堂，舊說堂上之樂皆受笙均，堂下之樂皆受磬均。游魚舞獸自奔忙，朱絃初識孤桐韻。巽樂金石聲高而絲聲微，今樂金石與絲聲皆著。玉瑄猶聞柷黍香，舊法以尺生律，今以黍定律，以律生尺。萬事今方啓伯始，一斑我亦愧真長。此生會見三雍就，無復寥寥歎未央。

次韻劉貢父春日賜嬭勝

寬詔隨春出內朝，二軍喜氣挾狐貂。鏤銀錯落翻斜月，翦綵繽紛舞慶霄。臘雪強飛纔到地，前日微雪曉風偷轉不驚條。脫冠徑醉應歸臥，便腹從人笑老詔。是日奉次賜酒。

再和

與君流落偶還朝，過眼紛紛七葉貂。莫笑華顛飄彩勝，幾人黃壤隔青霄。行吟未許窮騷雅，坐嘯猶能出教條。記取明年江上郡，五更春枕夢春韶。

葉公秉王仲至見和次韻答之

衫緜方暑亦堪朝，歲晚淒風憶阜貂。共喜鸞鷲歸禁籞，心知日月在重霄。君如老驥初遭絡，我似枯桑不

受條強，鑷霜須，簪彩勝。蒼顏得酒尚能韶。

再和

衰遲何幸得同朝，溫勁如君合珥貂。謹惜異材蒙徑寸，自慚枯枿借凌霄。光風泛泛初浮水，紅糝離離欲綴條。後日一樽何處共，奉常端冕作咸韶。

次韻王晉卿惠花栽栽所寓張退傅第中

坐來念念失前人，共向空中寓一塵。若問此花誰是主，天教閑客管青春。

次韻王晉卿上元侍燕端門

月上九門開，星河繞露臺。君方枕中夢，我亦化人來。光動仙毬綉，香餘步屐回。相從穿萬馬，衰病若爲陪。

王鄭州挽詞克臣

羨君華髮起琳宮，右輔初還鼓角雄。千里農桑歌子產，一時冠蓋慕蕭嵩。那知聚散存糧外，便有悲歡過隙中。京兆同僚幾人在，猶思對案筆生風。子爲開封幕與子難同齡。

書王定國所藏王晉卿畫著色山二首

白髮四老人，何曾在商顏。頰君紙上影，照我胸中山。山中亦何有，木老土石頑。正賴天日光，澗谷紛爛斑。我心空無物，斯文何足關。君看古井水，萬象自往還。

君歸嶺北初逢雪，我亦江南五見春。寄語風流王武子，三人俱是識山人。

送呂昌朝知嘉州

不羨三刀夢蜀都。聊將八詠繼東吳。臥看古佛凌雲閣。勅賜詩人明月湖。得句會應緣竹鶴。思歸寧復爲
尊鱸。橫空好在脩眉色。頭白猶堪乞左符。

次韻黃魯直寄題郭明父府推穎州西齋二首

樹頭啄木常疑客。客去而墮定不然。脫轄已應生井沫。解衣聊復起庖煙。平生詩酒真相汙。此去文書恐
獨賢。早晚西湖映華髮。小舟翻動水中天。
寂寞東京月旦州。德星無復綴珠旒。莫嗟平輿空神物。尙有西齋接勝流。春夢屢尋湖十頃。家書新報橘
千頭。雪堂亦有思歸曲。爲謝平生馬少游。與音預。

卷十八

詩一百一十七首

次韻秦少章和錢蒙仲

碧畦黃隴稻如京。歲美人和易得情。鑑裏移舟天外思。地中鳴角古來聲。山圍故國城空在。潮打西陵意
未平。二子有如雙白鷺。隔江相照雪衣明。

次韻錢越州

鬢尹超然定逸羣。南遊端爲訪雲門。謫仙歸侍玉皇案。老鶴來乘刺史轎。已覺簿書哀老子。故知籩豆有
司存。年來齒頰生荆棘。習氣囚君又一言。

同秦仲二子雨中遊寶山

平明已報百吏散，半日來陪二子閑。立鵲低昂煙雨裏，行人出沒樹林間。

去杭十五年復游西湖用歐陽察判韻

我識南屏金鯽魚，重來拊檻散齋餘。還從舊社得心印，似省前生覓手書。葑合平湖久蕪漫，人經豐歲尚凋疎。誰憐寂寞高常侍，老去狂歌憶孟諸。

與莫同年雨中飲湖上

到處相逢是偶然，夢中相對各華顛。還來一醉西湖雨，不見跳珠十五年。

送子由使契丹

雲海相望寄此身，那因遠適更沾巾。不辭驛騎凌風雪，要使天驕識鳳麟。沙漠回看清禁月，湖山應夢武林春。單于若問君家世，莫道中朝第一人。

次韻答劉景文左藏

我老詩壇仆鼓旗，借君佳句發良時。但空賀監杯中物，莫示孫郎帳下兒。夜燭催詩金燼落，秋芳壓帽露華滋。故應好語如爬癢，有味難名只自知。

坐上復借韻送寄嵐軍通判葉朝奉

雲間踏白看纓旗，莫忘西湖把酒時。夢裏吳山連越嶠，樽前羌婦雜胡兒。夕烽過後人初醉，春鴈來時雪未滋。爲問從軍真樂否，書來粗遣故人知。

賦始於文登海上得白石數升如芡實可作枕聞梅丈嗜石故以遺其子子明學士子明有詩次其韻

海隅荒怪有誰珍。零落珊瑚泣季倫。法供坐令微物重。賦書有怪石供。色難歸致孝心純。只疑蒼莖來交趾。未信蠙珠出泗濱。願子聚爲江夏枕。不勞麾扇自寧親。

次韻錢越州見寄

莫將牛弩射羊羣。臥治何妨畫掩門。稍喜使君無疾病。時因送客見車轡。搔頭白髮秋無數。閉眼丹田夜自存。欲息波瀾須引去。吾儕豈獨坐多言。

文登蓬萊閣下有石壁千丈爲海浪所戰時有碎裂淘漉歲久皆圓熟可愛土人謂此彈子渦也取數百枚以養石菖蒲且作詩遺垂慈堂老人

蓬萊海上峯。玉立色不改。孤根捍滔天。雲骨有破碎。陽侯殺廉角。陰火發光采。纍纍彈丸間。瑣細成珠琲。閭浮一漚耳。真妄果安在。我持此石歸。袖中有東海。垂慈老人眼。俯仰了大塊。置之盆盎中。日與山海對。明年萬蒲根。連絡不可解。儻有蟠桃生。且莫猶可待。

次韻毛滂法曹或雨詩

江南佳公子。遺我錦繡端。攬之温如春。公子焉得寒。興雨自有時。磨寸便濛濛。斂藏以自潤。牛斗何足干。空庭月與影。強結三友歡。我豈不足歟。要此清團團。所歡在一醉。常恐樽中乾。捨酒尙可樂。明珠如彈丸。但恐千仞雀。忽忽發虛彈。迨子閑暇時。種子田中丹。一朝涉世故。空腹容欺謾。我頃在東坡。秋菊爲夕餐。

永愧坡間人，布褐爲我完。雪堂初覆瓦，上簾無下莞。時時亦設客，每醉筒輒殫。一笑使傾倒，五年得輕安。公子豈我徒，衣鉢傳一簞。定非郊與島，筆勢江河寬。悲吟古寺中，穿帷霽漫漫。他年記此味，芋火對懶殘。

送鄧宗古還鄉

廣漢有姜子，孝弟行里閭。赤眉雖豺虎，弛兵過其墟。至今空清泉，無復雙鯉魚。南鄭有李郃，得妙甘公書。夜坐指流星，驚倒兩使車。抱關不肯仕，布褐蒙璠璣。西南固多士，君得二子餘。凜凜忠文公，搜士及樵漁。潤谿有幽討，類董真嘉蔬。歲晚終不食，心惻當何知。

參寥上人初得智果院會者十六人分韻賦詩軾得心字

潏水返蕩整，飛雲思故岑。念君忘家客，亦有懷歸心。三間得幽寂，數步藏清深。攢金盧橘塢，散火楊梅林。茶筍盡禪味，松杉真法音。雲崖有淺井，玉醴常半尋。遂名參寥泉，可濯幽人襟。相攜橫嶺上，未覺衰年侵。一眼吞江湖，萬象涵古今。願君更小築，歲晚解我簪。

哭王子立次兒子迨韻三首

彭城初識子，照眼白而長。異夢成先兆，子爲密州。子立未嘗相識，忽告同會生曰：吾夢爲密州，堪何也。已而果以子由之子妻之。清言得未嘗，豈惟知禮意。遂欲補詩亡，子立能詞而有禮學。咄咄真相逼，諸生敢厲行。

非無伯鸞志，獨有子雲悲。恨子非天合，猶能使我思。兒曹莫淒慟，老眼欲枯萎。會哭皆豪傑，誰爲感舊詩。子立與黃魯直、張文潛、晁無咎、秦少游、陳無已、皆友善。

龍困管魚服，羊僂或虎蒙。忽忽成鬼錄，憤憤到天公。偶落藩牆上，同游羿穀中。回看十年事，黃葉卷秋風。

異鶴并敘

熙寧中，柯侯仲常通守漳州，以救飢得民，有二鶴栖其廳，事訖俟之去，鶴亦送之。漳人異焉，爲賦此詩。昔我先君子，仁孝行於家。家有五畝園，么鳳集桐花。是時烏與鶴，巢穀可俯拏。憶我與諸兒，飼食觀羣呀。異人驚瑞異，野老笑而嗟。云此方乳哺，甚畏薦與她。手足之所及，二物不敢加。主人若可信，衆鳥不我遐。故知中孚化，可及與魚鰕。柯侯古循吏，惻愍真無華。臨漳所全活，數等江干沙。仁心格異族，兩鶴栖其衙。但恨不能言，相對空楂楂。善惡以類應，古語良非夸。君石彼酷吏，所至號鬼車。

次韻詹適宣德小飲巽亭

君方夢謫仙，來詩記李白郎官湖我亦弔文園。江上同三黜，天涯又一樽。濤雷殷白晝，梅雪耿黃昏。歸去多情雨，應隨御史軒。詹爲御史主簿。

東川清絲寄魯冀州戲贈

鵝溪清絲清如水，上有千歲交枝藤。藤生谷底飽風雪，歲晚忽作龍蛇升。嗟我雖爲老侍從，骨寒只受布與緡。牀頭錦衾未還客，坐覺芒刺在背膺。豈如髯卿晚乃貴，福祿正似川方增。醉中倒着紫綺裘，下有半臂出縹緲。封題不敢妄裁翦，刀尺自有佳人能。遙知千騎出清曉，積雪未放游塵興。白須紅帶柳絲下，老弱空巷人相登。但放奇紋出領袖，吾輩雖老無人憎。

怡然以垂雲新茶見餉報以大龍團仍戲作小詩

妙供來香積，珍烹具太官。揀芽分雀舌，賜茗出龍團。曉日雲庵暖，春風浴殿寒。聊將試道眼，莫作雨般看。
次韻王忠玉遊虎丘絕句三首

當年太白此相浮，老守娛賓得二丘。郡人有問丘公太守，王規父嘗云：不謂虎丘卽謂開丘。規父忠玉伯父也。白髮重來故人盡，空餘叢桂小山幽。

青蓋紅旗映玉山，新詩小草落玄泉。風流使者人爭看，知有真娘立道邊。虎丘中路有真娘墓。
舞衣歌扇轉頭空，只有青山杏靄中。若共吳王圖百草，使君未敢借鶯鴻。

寄蔡子華

故人送我東來時，手栽荔子待我歸。荔子已丹吾髮白，猶作江南未歸客。江南春盡水如天，腸斷西湖春水船。想見青衣江畔路，白魚紫筍不論錢。霜鬢三老如霜檜，舊交零落今誰輩。莫從唐舉問封侯，但道麻姑更爬背。

和錢四寄其弟蘇

再見濤頭涌玉輪，煩君久駐浙江春。年來總作維摩病，堪笑東西二老人。

臥病彌月聞垂雲花開順閣梨以詩見招次韻答之

道人心似水，不礙照花妍。燕坐春強半，清陰月屢遷。平生無起滅，一念有陳鮮。嫋嫋風枝舉，離離日萼蒸。病吟終少味，老醉不成顛。何必邀頭出，湖中有散仙。

故周茂叔先生濂谿路在廬山下

世俗眩名實，至人疑有無。怒移水中蟹，愛及屋上烏。坐令此溪水，名與先生俱。先生本全德，廉退乃一隅。因拋彭澤米，偶似西山夫。遂卽世所知，以爲溪之呼。先生豈我輩，造物乃其徒。應同柳州柳，聊使愚溪愚。

次韻子由使契丹至涿州見寄四首

老人癯鈍已逃寒，子復辭行理亦難。要到盧龍看古塞，投文易冰弔燕丹。余昔年辭免使北。

胡羊代馬得安眠，窮髮之南共一天。又見子卿持漢節，遙知遺老泣山前。

氈毳年來亦甚都，時時鳩舌問三蘇。予與子由入京時，北使已問所在。後余館伴北使，屢誦三蘇文，那知老病渾無用，欲問君王乞鏡湖。

始憶庚寅降屈原，旋看蠟鳳戲僧虔。隨翁萬里心如鐵，此子何勞爲買田。時猶子遲待行。

雪後便欲與同僚，尋春一病彌。月雜花都盡，獨牡丹在耳。劉景文左藏和順園梨詩見贈，次韻答之。

殘花怨久病，剩雨泣餘妍。不見雙旌出，空令九陌塵。開園市井皆入，知君苦寂寞。妙語嚼芳鮮，淺紫從爭發。浮紅任早薦，天葩尙青萼。國色待華顛，我酒邀詩將。醜儒不是仙。

次韻劉景文周次元寒食同遊西湖

絮飛春減不成年，老境同乘下瀨船。藍尾忽驚新火後，樂天寒食詩云：三盃薄尾酒，一搥膠牙餠。遨頭要及浣花前。成都太守白正月二日出游，至四月十九日浣花乃止。山西老將詩無敵，洛下書生語更妍。共向北山尋二士，畫樓鼙鼓聒清眠。

連日與王忠玉張全翁游西湖訪北山清順道潛二詩僧登垂雲亭飲參寥泉最後過唐州陳使君夜飲忠玉有詩次韻答之

北山非自高千仞付我足。西湖亦何有萬象生我日。雲深人在塢風靜響應谷。與君皆無心信步行看竹。竹間逢詩鳴眼色奪湖綠。百篇成俯仰二老相追逐。故應千頃池養此一雙鷓。山高路已斷亭小膝屢促。夜尋三尺井渴飲半甌玉。明朝隔絲管寒食雜歌哭。使君坐無聊狂客來不速。載酒有鴟夷扣門非啄木。浮蛆澀金盃翠羽出華屋。須臾便陳迹覺夢那可續。及君未渡江過我勸秉燭一笑換人爵百年終鬼錄。新茶送簽判程朝奉以餽其母有詩相謝次韻答之

縫衣付與溧陽尉捨肉懷歸穎谷封。閒道平反供一笑會須難老待千鍾。火前試焙分新勝雪裏頭網輟賜詔從此升堂是兄弟一甌林下記相逢

次韻送張山人歸彭城

羨君飄蕩一虛舟來作錢塘十日遊。水洗禪心都眼淨山供詩筆總眉愁。雪中乘興真聊爾春盡思歸却罷休。何日五湖從范蠡種魚萬尾橘千頭

次韻林子中王彥祖唱鷓

早知身寄一瀛中晚節尤驚落木風。近聞幸老公擇皆遊故有此句。昨夢已論三世事歲寒猶喜五人同。賦與子中彥祖子敦完夫同試舉人景德寺今皆健雨餘北固山圍座春盡西湖水映空。差勝四明狂監在更將老眼犯鹿紅

壽星院寒碧軒

清風肅肅搖窗扉，窗前修竹一尺圍。紛紛蒼雪落夏簾，冉冉綠霧霑人衣。日高山嶽抱葉響，人靜翠羽穿林飛。道人絕粒對寒碧，爲問鶴骨何緣肥。

書劉景文所藏王子敬帖絕句

家雞野鶩同登俎，春蚓秋蛇總入奩。君家兩行十二字，氣壓鄴侯三萬籤。

書劉景文所藏宗少文一筆畫

宛轉回紋錦，參差連理花。何須郭忠恕，匹素畫纒車。

直覺院有洛花花時不暇往四月十八日與劉景文同往賞枇杷

綠暗初迎夏，紅殘不及春。魏花非老伴，盧橘是鄉人。井落依山盡，巖崖發興新。歲寒君記取，松雪看蒼鱗。

又和劉景文韻

牡丹松檜一時栽，付與春風自在開。試問曠間題字客，幾人不爲看花來。

西湖壽星院此君軒

臥聽謾說碎龍鱗，俯看蒼蒼立玉身。一舸鷗夷江海去，尙餘君子六千人。

仲天貺王元直自眉山來見余錢塘留半歲既行作絕句五首送之

仲君豈弟多學，王子清修寡言。病後空驚鶴瘦，時來或作鸚鵡。

海角煩君遠訪，江源與我同來。剩作數詩相送，莫教萬里空回。

三人一旦同行，二子與秦少章同寓高齋，復同舟北行，留下高齋月明，遙想扁舟京口，尙餘孤枕潮聲。更欲留君久住，念君去國彌年，空使犀顛玉頰，長懷髯舅悽然。爲予遠致慇懃，瑞草橋邊老人，紅帶雅宜華髮，白醪光泛新春。老人王慶源也。

贈善相程傑

心傳異學不謀身，自要清時閱搢紳。火色上騰雖有數，急流勇退豈無人。書中苦覓元非訣，醉裏微言却近真。我似樂天君記取，華顛貧遍洛陽春。

次韻林子中蒜山亭見寄

奇逸多聞老敬通，何人慷慨解憐翁。十年簿領催衰白，一笑江山發醉紅。聞道賦詩臨北固，未應舉扇向西風。叩頭莫喚無家客，歸掃眠峨一畝宮。

再和并答楊次公

毗盧海上妙高峯，二老遙知說此翁。聊復纈舟尋紫翠，不妨持節散陳紅。高懷却有雲門興，好句真傳雪竇風。唱我三人無譜曲，馮夷亦合舞幽宮。

次韻劉景文送蒙仲三首

誰識天閑老驥，不爭日暮長途。送盡青雲九子，歸去扁舟五湖。寄語竹林社友，同書柱籍天倫。王郎獨爲鬼錄，世間無此玉人。五字古原春草，千金漢殿長門。經緯尙餘三策，典刑留與諸孫。

菩提寺南漪堂杜鵑花

南漪杜鵑天下無，披香殿上紅氍毹。鶴林兵火真一夢，不歸闌苑歸西湖。

題楊次公春蘭

春蘭如美人，不採羞白獻。時聞風露香，蓬艾深不見。丹青寫真色，欲補離騷傳。對之如靈均，冠佩不敢燕。

題楊次公蕙

蕙本蘭之族，依然臭味同。曾爲水仙佩，相識楚詞中。幻色雖非實，真香亦竟空。云何起微馥，鼻觀已先通。

次韻曹輔寄整源試焙新芽

仙山靈雨溼行雲，洗遍香肌粉未勻。明月來投玉川子，清風吹破武林春。要知玉雪心腸好，不是膏油首面新。激作小詩君一笑，從來佳茗似佳人。

次韻袁公濟謝芍藥詩

燥吻時時著酒濡，要令臥疾致文殊。河魚潰腹空號楚，汗水流骸始信吳。吳異君服椒法云：半年脚心汗如水，自笑方求三歲艾，不如長作獨眠夫。羨君清瘦真仙竹，更助飄飄鶴背驅。

次韻和楊次公惠徑山龍井水龍井水洗病眼有效

漏盡雞號厭夜行，年來小器盜餅罍。棄官縱未歸東海，罷郡猶堪作水衡。幻色將空眼先暗，勝游無礙脚殊輕。空煩遠致龍瀾水，寧復臨池似伯英。

次韻劉景文登介亭

澤國梅雨餘。衰年困蒸溽。高堂磨新塼。頗覺利腰足。松根百尺井。兩綆飛淨淥。流觴聚兒童。一笑爲捧腹。清風信可取。剛氣在巖麓。始知共此世。物外無三伏。長歌入雲去。不待絃管逐。西湖真西子。煙樹點眉目。濤江少鹽藉。高浪翻雪屋。俛仰拊四海。百世飛鳥速。遠追錢氏餘。近弔祖侯躅。吾生如寄耳。寸晷輕尺玉。誰似劉將軍。逸韻謝邊幅。千言一揮手。五車不再讀。春巖彩雞舞。月峽哀猿哭。朝先啼鳩起。莫與寒蟻續。我老廢吟哦。賴君時擊觸。從今事遠覽。發軔此幽谷。清游得三昧。至樂謝五欲。莫作狂道士。氣壓劉師服。

袁公濟和劉景文登介亭詩復次韻答之

昏昏墮醉夢。奈此六月溽。君詩如清風。吹我朝睡足。登臨得佳句。江白照湖淥。袖手獨不言。默藁已在腹。是時風雨過。藹藹雲歸麓。疏星帶微月。金火爭見伏。惜哉此清景。變滅不可逐。歸來讀君詩。耿耿猶在目。却思少年日。聲價爭場屋。文如翻水成。賦作叉手速。秋風起鴻鴈。我亦繼華躅。那知君贈蹬。獨泣荆山玉。相見南新道。青衫垂破幅。早知事大繆。恨不十年讀。莫嫌馮唐老。終勝賈誼哭。今年復爲僚。舊好許重續。升沈何足道。等是蠻與觸。共爲湖山主。出入窮澗谷。衆馳君不爭。人棄我所欲。何時神武門。相約挂冠服。

介亭餞楊傑次公

籃輿西出登山門。嘉與我友尋仙村。丹青明滅風篁嶺。環珮空響桃花源。鄙人謂介亭山下爲桃源。踏前朝欲上已蠟屐。黑雲白雨如傾盆。今晨積霧卷千里。豈畏觸熱生病根。在家頭。隨無爲子。久與青山爲弟兄。狐峯盡處亦何有。西湖鏡天江抹坤。臨高壓手謝好佳。清風萬壑整傳其言。風回響答君聽取。我亦到處隨君軒。

次京師韻送表弟程懿叔赴鄂州運判

與子甥舅氏，摧頽各蒼顏。並爲東諸侯，長此佳江山。寒松無時花，安得插髻鬢。惟將老不死，一笑榮枯間。我甚似樂天，但無素與蠻。桂冠及未老，常獲一紀閑。子亦拙進取，才高命堅頑。譬如萬斛舟，行此九折灣。仲氏新得道，一漚口塵寰。君之兄德彌，自曾遊於德法，有得歲晚家鄉路，莫遺生榛菅。

葉教授和澗字韻詩復次韻爲戲記龍井之游

先生魯諸儒，飲食清不澗。空腸出秀句，吟嚼五味足。華堂鬧絲管，眸子漲春綠。先生疾走避，面冷毒在腹。歸來煮瓠葉，弟子歌旱旄。聲淫及靈臺，中有應鹿伏。功名一走兔，何用千人逐。故應容我輩，清座時閉目。高亭石排衙，木杪挂飛屋。我來無時節，客亦不待速。似聞雪巒叟，西嶺訪遺躅。朝陽入潭洞，金碧涵水玉。泉扉夜不扃，雲袂本無幅。慈皇付寶劍，神侶得幽讀。訥庵有老人，宴坐天魔哭。時來獻纓絡，法供燈相續。吾儕詩酒汗，欲住無乃觸。齋廚費晨炊，車騎滿山谷。願聞第一義，鉢飯非所欲。便投切雲冠，子幼好奇服。

次韻林子中見寄

飄零洛社數遺民，詩酒當年困惡賓。元亮本無適俗韻，孝章要是有名人。蒜山小隱雖爲客，江水西來亦帶岷。卷却西湖千頃葑，笑看魚尾更莘莘。

安州老人食蜜歌贈僧仲殊

安州老人心似鐵，老人心肝小兒舌。不食五穀惟食蜜，笑指蜜蜂作檀越。蜜中有詩人不知，千花百草爭含姿。老人咀嚼時一吐，還引世間癡小兒。小兒得詩如得蜜，蜜中有藥治平百病。正當狂走促風時，一笑

君詩百髮失。東坡先生取人廉。幾人相歡幾人嫌。恰似飲茶甘苦雜。不如食蜜中邊甜。佛云。善言譬如食蜜。中邊皆甜。因君寄與雙龍餅。鏡空一照雙龍影。三吳六月水如湯。老人心似雙龍井。

次韻錢穆父紫薇花二首

虛白堂前合抱花。秋風落日照橫斜。閱人此地知多少。物化無涯生有涯。虛白堂前紫薇兩株。俗云樂天所種。

折得芳蕤兩眼花。題詩相報字傾斜。鏡中尚有絲綸句。坐覺天光照海涯。樂天詩云。絲綸閣下文書。綸。鼓樓中刻。滿長。菊。全黃。昏。誰是伴。紫薇花對紫微郎。上書書此詩以賜賦。

送張嘉州

少年不願萬戶侯。亦不願識韓荆州。頗願身爲漢嘉守。較酒時作凌雲遊。虛名無用今白首。夢中却到龍泓口。浮雲軒冕何足言。惟有江山難入手。峨眉山月半輪秋。影入平羌江水流。謫仙此語誰解道。請君見月時登樓。笑談萬事真何有。一時付與東巖酒。佛映人家白酒舊有名。歸來還受一大錢。好意莫違黃髮叟。

次韻蘇伯固主簿重九

雲間朱袖拂雲和。知是長松挂女蘿。培重不嫌黃菊滿。手香新喜綠橙搓。墨翻衫袖吾方醉。紙落雲煙子惠多。只有黃雞與白髮。玲瓏應識使君歌。

送李陶通直赴清溪

忠文文正二大老。司馬溫公。范蜀公。君之師友。蘇李廣平三舍人。蘇子容。宋次道。與先公才元。熙寧中封。遷李定。詞頭。天下謂之三舍人。喜見通家賢子弟。自言得邑少風塵。從來勢利關心薄。此去溪山琢句新。肯向西湖留數月。錢塘初識小麒麟。

次韻楊公濟奉議梅花十首

梅梢春色弄微和。作意南枝翦刻多。月黑林間逢縞袂。霜陵醉尉誤誰何。相逢月下是瑤臺。藉草清樽連夜開。明日酒醒應滿地。空令飢鶴啄莓苔。綠髮尋春湖畔回。萬松嶺上一枝開。而今縱老霜根在。得見劉郎又獨來。月地雲堦漫一樽。玉奴終不負東昏。臨春結綺荒荆棘。誰信幽香是返魂。日出冰湖散水花。野梅官柳漸欹斜。西郊欲就詩人飲。黃四娘東子美家。君知早落坐先開。莫著新詩句句催。嶺北霜枝最多思。忍寒留待使君來。冰盤未薦含酸子。雪嶺先看耐凍枝。應笑春風木芍藥。豐肌弱骨要人醫。寒雀喧喧凍不飛。透林空啞未開枝。多情好與風流伴。不到雙雙燕語時。蛟銷翦碎玉簪輕。檀暈粧成雪月明。肯伴老人春一醉。懸知欲落更多情。縞裙練帔玉川家。肝膽清新冷不邪。禮李爭春猶辦此。更教踏雪看梅花。

贈劉景文

荷盡已無擎雨蓋。菊殘猶有傲霜枝。一年好處君須記。最是橙黃橘綠時。

謝關景仁送紅梅栽二首

年年芳信負紅梅，江畔垂垂又欲開。
珍重多情關令尹，直和根撥送春來。
爲君栽向南堂下，記取他年著子時。
酸醜不堪調衆口，使君風味好攪眉。

辯才老師退居龍井不復出入，軾往見之，常出至風篁嶺，左右驚曰：遠公復過虎溪矣。辯才笑曰：杜子美不云乎？與子成二老來，往亦風流。因作亭嶺，上名之曰過溪。亦曰二老。謹次辯才韻賦詩一首。

日月轉雙轂，古今同一丘。惟此鶴骨老，凜然不知秋。
去住兩無礙，人大爭挽留。去如龍出山，雷雨卷潭湫。
來如珠還浦，魚鼈爭駢頭。此生暫寄寓，常恐名實浮。
我比陶令愧，師爲遠公優。送我還過溪，溪水當逆流。
聊使此山人，永記二老遊。大千在掌握，寧有離別憂。

送程之邵簽判赴闕

夜光不自獻，天驥良難知。從來一狐腋，或出五羖皮。
賢哉江東守，收此幕中奇。無華豈易識，既得不自隨。
留君望此府，助我憐其衰。二年促膝語，一旦長挹辭。
林深伏猛在，岸改潛珍移。去此當安從，失君徒自悲。
念君珊瑚質，當今臺閣宜。去矣會有合，豈常懷其私。

寄題梅宣義園亭

仙人子真後，遠隱吳市門。不惜十年力，治此五畝園。
初期橘爲奴，漸見桐有孫。清池壓丘虎，異石來湖鼃。
敲門無貴賤，遂性各琴尊。我本放浪人，家寄西南坤。
敵廬雖尙在，小圃誰當樊。羨君欲歸去，奈此未報恩。

愛子幸僚友，久要疑弟昆。明年過君西，飲我空罍盆。

熙寧中，軾通守此郡，除夜直，郡廳囚繫皆滿，日莫不得返舍，因題一詩于壁。今二十年矣，病之餘，復忝郡寄，再經除夜，庭事蕭然，三囚皆空，蓋同僚之力，非拙朽所致，因和前篇呈公濟子，侔二通守。

前詩

除日常早歸，官事乃見留。執筆對之泣，哀此繫中囚。小人營喉糧，墮網不知羞。我亦戀薄祿，因循失歸休。不須論賢愚，均是爲食謀。誰能暫縱遣，閔默愧前修。

今和

山川不改舊，歲月逝肯留。百年一俯仰，五勝更平王。囚同僚比岑范，德業前人羞。坐令老鈍守，嘯諾獲少休。却思二十年，出處非人謀。齒髮付天公，缺壞不可修。

遊寶雲寺得唐查嶽爲杭州日送客舟中手書一絕句云：山雨霏微不滿空，畫船來往疾輕鴻。誰知獨臥朱簾裏，一榻無塵四面風。明日送查嶽之子壻赴鄂州舟中遇微雨感歎前事因和其韻作兩首送之，且歸其書唐氏。

二妙凋零筆法空，忽驚雲海戲羣鴻。清詩不敢私囊篋，人道黃門有父風。黃門，衛恆也。

出處榮枯一笑空，十年社燕與秋鴻。誰知白首長河路，還臥當時送客風。

送江公著知吉州

三吳行盡千山水，猶道桐廬更清美。豈惟濁世隱狂奴，時平亦出佳公子。初冠惠文讀城旦，晚入奉常陪劍履。方將華省起彈冠，忽憶釣臺歸洗耳。未應良木棄大匠，要使名駒試千里。奉親官舍當有擇，得郡江南差可喜。白粲連檣一萬艘，紅粧執樂三千指。簿書期會得餘閑，亦念人生行樂耳。二耳義不同，故得重

聞錢道士與越守穆父飲酒送二壺

龍根爲脯玉爲漿，下界寒醅亦漫嘗。一紙鵝經逸少醉，他年鵬賦謫仙狂。金丹自足留衰鬢，苦淚何須點別腸。吳越舊邦遺澤在，定應符竹付諸郎。

次韻劉景文路分上元

華燈闕艱歲，冷月挂空府。三吳重時節，九陌自歌舞。云從月幾望，遂至一百五。嘉辰可屈指，樂事相繼武。今宵掃雲陣，極目淨天宇。嬉遊各忘歸，闌咽頃未覩。飛毬互明滅，激水相吞吐。老去反兒童，歸來尙饒鼓。新年消暗雪，舊歲添絲纒。何時九江城，相對兩漁父。予舊欲卜居廬山，景文近買宅江州。

再和楊公濟梅花十絕

一枝風物便清和，看盡千林未覺多。結習已空從著袂，不須天女問云何。天教桃李作煥臺，故遣寒梅第一開。憑仗幽人收艾納，國香和雨入青苔。白髮思家萬里回，小軒臨水爲花開。故應剩作詩千首，知是多情得得來。人去殘英滿酒樽，不堪細雨溼黃昏。夜寒那得穿花蝶，知是風流楚客魂。

春入西湖到處花。裙腰芳草抱山斜。盈盈解佩臨煙浦。脈脈當壚傍酒家。
莫向霜晨怨未開。白頭朝夕自相催。斬新一朵含風露。恰似西廂待月來。
洗盡鉛華見雪肌。要將真色鬪生枝。檀心已作龍涎吐。玉頰何勞蠟髓醫。
湖面初驚片片飛。尊前吹折最繁枝。何人會得春風意。怕見梅黃雨細時。
長恨漫天柳絮輕。只將飛舞占清明。寒梅似與春相避。未解無私造物情。
北客南來豈是家。醉看參月半橫斜。他年欲識吳姬面。乘燭三更對此花。

與葉淳老侯敦夫張秉道同相視新河秉道有詩次韻二首

君不見元帥府前羅萬戟。講頭未順千弩射。至今鳳皇山下路。長借一箭開兩翼。
我鑿西湖遠舊觀。一眼已盡西南碧。又將回輦浮山險。千艘夜下無南北。坐陳三策本人謀。
惟留一諾待我畫。老病思歸真暫寓。功名如幻終何得。從來白笑畫地足。此事何殊食雞肋。憐君嗜好更迂闊。
得我新詩喜折屐。江湖粗了我徑歸。餘事後來當潤色。一庵閑臥洞霄宮。并有丹沙水長赤。

荆溪父老愁三害。下斬長蛟本無賴。平生倔強韓退之。文字猶爲鱗魚戒。
石門之役萬金耳。首鼠不爲吾已隘。江湖開塞古有數。兩鵠飛來告成壞。勸農使者非常人。一言已破黎民駭。
上使使君更超逸。坐睨浮山如累塊。鬚張乃我結機生。詩酒淋漓出狂怪。我作水衡生作丞。他日歸朝同此拜。

櫻筍并敘

櫻筍狀如魚。剖之得魚子。味如苦筍而加甘芳。蜀人以饌佛僧甚貴之。而南方不知也。筍生膚殼中。蓋花

之方孕者。正二月間可剝取。過此苦澀不可食矣。取之無害於木。而宜於飲食。法當蒸熟。所施略與筍。蜜裹酢浸。可致千里外。今以餉殊長老。

贈君木魚三百尾。中有鵝黃子魚子。夜叉割瘦欲分甘。鱗龍藏頭敢言美。願隨蔬果得自用。勿使山林空老死。問君何事食木魚。烹不能鳴固其理。

次韻曹子方龍山真覺院瑞香花

幽香結淺紫。來自孤雲岑。骨香不自知。色淺意殊深。移栽青蓮宇。遂冠薜蘿林。緝爲楚臣佩。散落天女襟。碧持風霜節。耳冷歌笑音。一逢蘭蕙質。稍回歲石心。置酒要妍暖。養花須晏陰。及此陰暗開。恐致慳吝霖。縹雲知易散。鸚鵡憂先吟。明朝便陳迹。試著丹青臨。

次韻曹子方運判雪中同游西湖

詞源灑灑波頭展。清唱一聲巖谷滿。未容雪積句先高。豈獨湖開心自遠。雲山已作歌眉淺。山下碧流清似眼。尊前侑酒只新詩。何異書魚餐畫簡。

次韻仲殊雪中游西湖二首

夜半幽夢覺。稍聞竹葦聲。起續凍折絃。爲鼓一再行。曲終天自明。玉樓已崢嶸。有懷二三子。落筆先飛翼。共爲竹林會。身與孤鴻輕。秀語出寒餓。身窮詩乃亨。禪老復何爲。笑指孤煙生。我獨念衆者。誰與予目成。寶雲樓閣闢千門。林靜初無一鳥喧。閉戶莫教風掃地。卷簾疑有月臨軒。水光瀲灩猶浮碧。山色空濛已欲昏。乞得湯休奇絕句。始知鹽絮是陳言。

次韻參寥同前

朝來處處白氈鋪。樓閣山川盡一如。總是爛銀并白玉。不知奇貨有誰居。

送小本禪師赴法雲

寓形天宇間。出處會有役。澹然都無營。百年何由畢。山林等憂患。軒冕亦戲劇。我未卽歸休。師寧便安逸。王城滿豪傑。議論分黑白。聖諦第一義。對面誰不識。師來亦何事。孤月挂空碧。是身如浮雲。安可限南北。出軸本無心。既雨歸亦得。珠泉有舊約。何年挂錡錫。

書渾令公燕魚朝恩圖

威寧英氣似汾陽。夜飲軍容出紅粧。不須纏頭萬匹錦。知卿未辦作呂強。

卷十九

詩三首

息壤詩并敘

淮南子曰。鯀壅洪水。盜帝之息壤。帝使祝融殺之于羽淵。今荊州南門外。有狀若屋宇。陷入地中。而猶見其脊者。旁有石。記云不可犯。舂鍤所及。輒復如故。又頗以致雷雨。歲大旱。屢發有應。予感之。乃爲作詩。其詞曰。

帝息此壤。以藩幽臺。有神司之。隨取而培。帝勅下民。無敢或開。惟帝不言。以雷以雨。惟民知之。幸帝之慈。

帝茫不知，誰敢以告。帝怒不常，下土是震。使民前知，是役于民。無是填者，誰取誰干。惟其的之，是以射之。

新渠詩并敘

庚子正月，予過唐州。太守趙侯始復三陂，疏召渠，招懷遠人，散耕於唐。予方爲旅人，不得親執壺漿，簞食以與。侯勸逆四方之來者，獨爲新渠詩五章，以告于道路，致侯之意。其詞曰：

新渠之水，其來舒舒，溢流于野。至于通衢，渠成如神。民始不知，問誰爲之。邦君趙侯，新渠之田，在渠左右。渠來奕奕，如赴如湊，如雲斯積。如屋斯溜，嗟唐之人，始識稼穡。新渠之民，自淮及潁，挈其婦姑，或走而順。王命趙侯，宥我新民，無與王事。以訖七年，侯謂新民，爾旣來止，其歸爾邑。告爾鄰里，良田千萬。爾擇爾取，爾耕爾食。遂爲爾有，築室于唐。孔碩且堅，生爲唐民，飽粥與醴。死葬于唐，祭有雉豚。天子有命，我惟爾安。

顏樂亭詩并敘

顏子之故居，所謂陋巷者，有井存焉，而不在顏氏久矣。膠西太守孔君宗翰始得其地，浚治其井，作亭於其上。命之曰顏樂。昔夫子以簞食瓢飲賢顏子，而韓子乃以爲哲人之細事。何哉。蘇子曰：古之觀人也，必於其小焉觀之。其大者容有僞焉，人能碎千金之璧，不能無失聲於破釜；能搏猛虎，不能無變色於纛。豈孰知簞食瓢飲之爲哲人之大事乎。乃作顏樂亭詩，以遺孔君。正韓子之說，且以自警云。

天生蒸民，爲之鼻口。美者可嚼，芬者可嗅。美必有惡，芬必有臭。我無天遊，六鑿交困。驚而不反，跬步商受。偉哉先師，安此微陋。孟賁股髀，虎豹卻走。眇然其身，中亦何有。我求至樂，千載無偶。執瓠從之，忽焉在後。

詞十三首

太白詞五首并敘

岐下頻年大旱，麟於太白山輒應，故作迎送神詞一篇五章。

雷闔闔，山畫晦，風振野，神將駕，載雲罕，從玉料，早既甚，厥往救，道阻修兮，
旌旗翻，異有無，口慘變，神在塗，飛赤篆，許闔闔，走陰傳，行羽檄，萬靈集兮，
風爲幄，雲爲蓋，滿堂爛，神既至，紛醉飽，錫以兩百川，溢施溝渠，歌且舞兮，
騎裔裔，車班班，鼓蕭悲，神欲還，轟振凱，隱林谷，執妖厲，歸獻馘，千里肅兮，
神之來，悵何晚，山重複，路曲遠，神之去，飄莫追，德未報，民之思，永萬祀兮。

上清辭以宮名名篇

君胡爲乎山之幽，願宮殿兮久淹留，又曷爲一朝去此而不顧兮，悲此空山之人也，來不可得而知兮，去固不可得而訊也，君之來兮，天門空，從千騎兮，駕飛龍，隸辰星兮，役太歲，儼晝降兮，雷隆隆，朝發兮，帝庭夕弭節兮，山宮懽有妖兮，唐下土，精爲星兮，氣爲虹，愛流血兮，滂沛兮，又嗜瘡痍與螟蟲，矚盲風而涕淫雨兮，時又吐旱火之燼融，銜帝命以下討兮，建千仞之修鋒，乘飛靈而追逸景兮，歛去捕滅而無蹤，忽崩播其來會兮，走海嶽之神公，龍車獸鬼不知其數兮，旗霧晦而冥蒙，漸俯偃以旅進兮，鏘劍佩之相轟，司殺生之必信兮，知上帝之不汝容，既約束以反職兮，退戰慄而愈恭，澤充塞於四海兮，獨澹然其無功，君之去兮，天門閉，款闔闔兮，朝玉臺，羣仙迎兮，塞雲漢，儼前導兮，紛後陪，歷玉階兮，帝迎勞，君良苦兮，馬厯，願閔人世兮，迫隘，陳下土兮，帝所哀，返瓊宮之嵯峨兮，役萬靈之喧騰，默清靜以無爲兮，時節紆於斗

魁詣通明而獻黜陟兮，軼蕩蕩其無回。忽表裏之煥霍兮，光下燭於九陔。時遊目以下覽兮，五嶽爲豆四溟爲盃。俯故宮之千柱兮，若毫端之集埃。來非以爲樂兮，去非以爲悲。謂神君之既返兮，曾顏咫尺之不違。陞秘殿以內悸兮，魂凜凜而上馳。忽寤寐以有得兮，敢沐浴而獻辭。是邪非邪，臣不可得而知也。

歸來引王子立歸蜀州

歸去來兮，世不汝求，胡不歸。湖北望之橫流兮，涉西顧之塵霏。紛野馬之決驟兮，幸余首之未耄。出彭城而南，驚兮，脊丘壠而增欵。亂清淮而俯睇兮，驚昔容之是非。念東坡之遺老兮，輕千里而款余扉。共雪堂之清夜兮，攬明月之餘輝。曾雞黍之未熟兮，歎空室之蟬蟻。我挽袖而莫留兮，僕夫在門歌式微。歸去來兮，路渺渺其何極。將稅駕於何許兮，北江之南，南江之北。於此有人兮，儼峨峨其豐碩。孰居約而爾肥兮，非糠覈其何食。久抱一而不試兮，愈溫溫而自克。吾居世之荒浪兮，視昏昏而聽默默。非之子莫振吾過兮，久不見恐自賊。吾欲往而道無由兮，子何畏而不卽。將以彼爲玉人兮，以子爲之璞也。

黃泥坂詞

出臨臯而東，驚兮，並蕞詞而北轉。走雪堂之坡陁兮，歷黃泥之長坂。大江洶以左，繚兮，渺雲濤之舒卷。草木層累而右附兮，蔚柯丘之蔥蒨。余旦往而夕還兮，步徙倚而盤桓。雖信美不可居兮，苟娛余於一眎。余幼好此奇服兮，襲前人之詭幻。老更變而自哂兮，悟驚俗之來忠。釋寶璫而被緡絮兮，雜市人而無辨。路悠悠其莫往來兮，守一席而窮年。時游步而遠覽兮，路窮盡而旋反。朝嬉黃泥之白雲兮，莫宿雪堂之青煙。喜魚鳥之莫余驚兮，幸樵蘇之我媿。初被酒以行歌兮，忽放杖而醉偃。草爲茵而塊爲枕兮，穆華堂之

清晏紛墜露之溼衣兮。升素月之團圓。感父老之呼覺兮。恐牛羊之子踐。於是蹶然而起。起而歌曰。月明兮星稀。迎余往兮餞余。歸歲既晏兮。草木腓。歸來歸來兮。黃泥不可以久嬉。

清溪詞

大江南兮九華西。泛秋浦兮亂清溪。水渺渺兮山無蹊。路重複兮居者迷。爛青紅兮繁高低。松十里兮稻千畦。山無人兮雲朝躋。鶴濛濛兮滄淒淒。嘯林谷兮號水泥。走鸚鵡兮下鳧鷖。忽孤壘兮隱重堤。杳冥茫兮聞犬雞。鬱萬瓦兮鳥翼齊。浮軒楹兮飛棋枰。鴈南歸兮寒蠍嘶。弄秋水兮挹玻璃。朝市合兮雜耄覲。挾箠兮佩鋤犁。鳥獸散兮相扶攜。隱鷲兮驚長霓。望翠微兮古招提。挂木杪兮翔雲梯。若有人兮悵幽栖。石爲門兮雲爲闥。塊虛堂兮法喜妻。呼猿狙兮子鹿麋。我欲往兮奉杖藜。獨長嘯兮謝阮嵇。

李仲蒙哀詞

河南李君仲蒙。以司封郎直史館爲記室。岐王府熙寧二年七月丙戌。終於京師。家貧喪不時舉。其僚相與賻之。旣斂而歸。十月丙申。葬於緱氏柏峴山西。其孤顛使來告。賦曰。嗚呼。吾先友人也。哭之。其可無辭。昔吾先君始仕於太常。君以博士朝夕往來相好。先君於人少所與。獨稱君爲長者。君爲人敦朴愷悌。學博而通。長於毛氏詩。司馬氏史。善與人交。雖見犯不報。嘗有與君爲姻者。無故決去。聞者爲之不平。君恬不以爲意。先君以是稱其難。始舉進士甲科。爲毫潤邠三郡職官。後爲應天府錄曹。勳力趨事。長吏有不喜者。欲以事困之而不能。旣爲博士。議禮據正不屈。晚入岐府。以經術輔導。篤實不阿。其言多驗。於後君諱育其先。河內人自高祖徙於緱氏。沒時年五十。辭曰。中心樂易。氣淑均兮。內外純一言可信兮。無怨無

惡善友人兮，舉詩達禮敏而文兮。翱翔王藩仕弗振兮，宜壽黃耆隕中身兮。兩不一獲歸怨神兮，我懷先君涕酸辛兮。顧嗟衆人誕失真兮，矯矯榮華自貴珍兮。欺世幻俗內弗安兮，久而不堪厭則遁兮。或者冰解明者晒兮，嗟卒不悟惟彼賢兮。渾朴簡易棄弗申兮，往者不還我思君兮。

饒君倚哀詞

大江之南兮，震澤之北。吾行四方而無歸兮，逝將此焉止息。豈其土之不足食兮，將其人之難偶。非有食無人之爲病兮，吾何適而不可。獨裴回而不去兮，眷此邦之多君子。有美一人兮，瞭然而清。頎然而亮，直多聞兮。古之益友，帶規矩而蹈繩墨兮。佩芝蘭而服明月，載而之世之人兮。世擇堅而不答，雖不答其何喪兮。超方揚而自得，吾將觀子之進退以自卜兮。相行止以效清濁，子奄忽而不返兮。世混混吾焉則，升空堂而挹遺像兮。弔凝塵於几席，苟律我者之信亡兮。吾居此其何益，行徬徨而無徒兮。悼捨此而奚，豈存者之舉無其人兮。遼遼如晨星之相望，吾比年而三哭。首堂堂皆國之英，苟處世之特交兮。巽如是而吾不亡，臨大江而長嘆兮。吾不濟其有命。

傷春詞并敘

去歲十二月，虞部郎呂君文甫，喪其妻安氏。二月以書遺余曰：安氏甚美，而有賢行，念之不忘。思有以爲不朽之託者，願求一言以弔之。余悲其意，乃爲作傷春詞云。

佳人與歲皆逝兮，歲既復而不返。付新春於居者兮，獨安適而愈遠。晝昏昏其如醉兮，夜耿耿而不眠。居兀兀不自覺兮，粉過前之物變。雪霜盡而鳥鳴兮，陂塘泣其流暖。步荒園而訪遺迹兮，蕪百草之生滿。風

泛泛而微度兮，日遲遲而愈妍。眇飛絮之無窮兮，爛天桃之欲然。燕曉曉而稚嬌兮，鳩穀穀其老怨。蝶飛而相值兮，蜂抱蕊而更平。讓善萬物之得時兮，痛伊人之罹此冤。衆族出而侶游兮，獨向壁而永歎。凝葵葵而棲睫兮，花搖目而增眩。查出門而不敢歸兮，畏空室之漫漫。忽入門而欲語兮，嗟猶憶其今存。役魂魄於宵夢兮，追髣髴而無緣。訪臨邛之道士兮，從稠桑之老人。縱可得而復見兮，恐荒忽而非真。求余文以寫哀兮，余亦愴恨而不能言。夫既其身之不顧兮，尚安用於斯文。

蘇世美哀詞

有美一人，長而髯兮。厥歛歷落，進趨稽兮。達於從政，敏而廉兮。如求與由，藝果兼兮。魁然丈夫，色悍嚴兮。奮須抵几，走羣讖兮。聞名見像，已癘疢兮。敬事友生，小心謙兮。誨養貧弱，語和甜兮。剛柔適中，畏愛愈兮。孤直無依，衆枉嫌兮。何辜於神，壽復殲兮。死無甌石，突不黔兮。孰爲故人，孰視怙兮。我竄于黃，歲將淹兮。于後八年，夢復覘兮。曰：吾子鈞，甘糲鹽兮。冬月負薪，衣不緜兮。覺而長吁，涕流沾兮。永言告鈞，守窮潛兮。苦心危腸，自磨礪兮。天不吾欺，有速淹兮。豈若人子，老閭闔兮。生歎死忘，我言砭兮。

賦七首

灤頰堆賦并敘

世以瞿唐峽口灤頰堆爲天下之至險。凡覆舟者，皆歸咎於此石。以余觀之，蓋有功於斯人者。夫蜀江會百水而至於夔，瀾漫浩汗，橫放於大野。而峽之小大，曾不及其十一。苟先無以齟齬於其間，則江之遠來，奔騰迅快，盡銳於瞿唐之口。則其險悍可畏，當不啻於今耳。因爲之賦，以待好事者，試觀而思之。

天下之至信者。唯水而已。江河之大。與海之深。而可以意揣。唯其不自爲形。而因物以賦形。是故千變萬化。而有必然之理。掀騰勃怒。萬夫不敢前兮。宛然聽命。惟聖人之所使。子泊舟乎瞿唐之口。而觀乎灩澦之崔嵬。然後知其所以開峽而不去者。固有以也。蜀江遠來兮。浩漫漫之平沙。行千里而未嘗齟齬兮。其意驕逞而不可摧。忽峽口之逼窄兮。納萬頃於一盃。方其未知有峽也。而戰乎灩澦之下。喧騰震掉。盡力以與石鬪。勃乎著萬騎之西來。忽孤城之當道。鉤援臨衝。畢至於其下兮。城堅而不可取。矢盡劍折兮。逼邊循城而東去。於是滔滔汨汨。相與入峽。安行而不敢怒。嗟夫物固有以安而生。變兮。亦有以用危而求安。得吾說而推之兮。亦足以知物理之固然。

屈原廟賦

浮扁舟以適楚兮。過屈原之遺宮。覽江上之重山兮。曰惟子之故鄉。伊昔放逐兮。渡江濤而南遷。去家千里兮。生無所歸。而死無以爲墳。悲夫人固有一死兮。處死之爲難。徘徊江上。欲去而未決兮。俯千仞之驚湍。賦懷沙以自傷兮。嗟子獨何以爲心。忽終章之慘烈兮。逝將去此而沉吟。吾豈不能高舉而遠游兮。又豈不能退默而深居。獨嗷嗷其怨慕兮。恐君臣之愈疎。生既不能力爭而強諫兮。死猶冀其感發而改行。苟宗國之顛覆兮。吾亦獨何愛於久生。託江神以告冤兮。馮夷教之以上訴。歷九關而見帝兮。帝亦悲傷而不能救。懷瑾佩蘭而無所歸兮。獨惇惇乎中浦。峽山高兮。崔嵬故居廢兮。行人哀。子孫散兮。安在。况復見兮高臺。自子之逝兮。千載兮。世愈狹而難存。賢者畏譏而改度兮。隨俗變化。斷方以爲圓。黽勉於亂世而不能去兮。又或爲之臣佐。變丹青於玉璽兮。彼乃謂子爲非智。惟高節之不可以企及兮。宜夫人之不

吾與遠國去俗死而不顧兮。豈不足以免於後世。嗚呼。君子之道。豈必全兮。全身遠害。亦或然兮。嗟子區區。獨爲其難兮。雖不適中。要以爲賢兮。夫我何悲。子所安兮。

昆陽城賦

漢平野之竊竊。忽孤城之如塊。風吹沙以蒼莽。恨樓櫓之安在。橫門豁以四達。故道宛其未改。彼野人之何知。方偃僕而畦菜。嗟夫。昆陽之戰。屠百萬於斯須。曠千古而一快。想尋邑之來陣。兀若驅雲而擁海。猛士扶輪以蒙茸。虎豹雜沓而橫潰。罄天下於一戰。謂此舉之不再。方其乞降而未獲。固已變色而驚悔。忽千騎之獨出。犯初鋒於未艾。始憑軾而大笑。旋棄鼓而投械。紛紛籍籍。死於溝壑者。不知其何人。或金章而玉佩。彼狂童之僭竊。蓋已旋踵而將敗。豈豪傑之能得。盡市井之無賴。頁符獻瑞。一朝而成羣兮。紛就死之何怪。獨悲傷於嚴生。懷長才而自洩。豈不知其必喪。獨徘徊其安待。過故城而一弔。增志士之永慨。

後杞菊賦并敘

天隨自言常食杞菊。及夏五月。枝葉老硬。氣味苦澁。猶食不已。因作賦以自廣。始余嘗疑之。以爲士不遇窮約可也。至於飢餓。嚼齧草木。則過矣。而余仕宦十有九年。家日益貧。衣食之奉。殆不如昔者。及移守膠西。意且一飽。而齋廚索然。不堪其憂。日與通守劉君廷式。循古城廢圃。求杞菊食之。捫腹而笑。然後知天隨之言。可信不繆。作後杞菊賦以自嘲。且解之云。

吁嗟先生。誰使汝坐堂上。稱太守。前賓客之造請。後掾屬之趨走。朝衙遠午。夕坐過酉。曾盃酒之不設。攫草木以誑口。對案饜饜。舉箸噎嘔。昔陰將軍。設麥飯與葱葉。井丹推去而不餽。怪先生之眷眷。豈故山之

無有先生听然而笑曰。人生一世。如屈伸肘。何者爲貧。何者爲富。何者爲美。何者爲陋。或糠粃而瓢肥。或
梁肉而墨瘦。何侯方丈。庾郎三九。較豐約於夢寐。卒同歸於一朽。吾方以杞爲糧。以菊爲糗。春食苗。夏食
葉。秋食園實。而冬食根。庶幾乎西河南陽之壽。

服胡麻賦并敘

始余嘗服伏苓。久之良有益也。夢道士謂余伏苓燥。當雜胡麻食之。夢中問道士何者爲胡麻。道士言脂
麻是也。旣而讀本草云。胡麻一名狗蘇。一名方莖。黑者爲巨勝。其油正可作食。則胡麻之爲脂麻信矣。又
云性與伏苓相宜。於是始異斯夢。方將以其說食之。而子由賦伏苓以示余。乃作服胡麻賦以答之。世間
人聞服脂麻以致神仙。必大笑求胡麻而不可得。則妄指山苗野草之實以嘗之。此古所謂道在邇而求
諸遠者歟。其詞曰。

我夢羽人頎而長兮。惠而告我藥之良兮。喬松千尺。老不僵兮。流膏入土。龜蛇藏兮。得而食之。壽莫量兮。
於此有草。衆所嘗兮。狀如狗蘇。其莖方兮。夜炊晝曬。久乃藏兮。伏苓爲君。此其相兮。我興發書。若合符兮。
乃淪乃蒸。甘且腴兮。補填骨髓。流髮膚兮。是身如雲。我何居兮。長生不死。道之餘兮。神藥如蓬。生爾廬兮。
世人不信。空自劬兮。搜抉異物。出怪迂兮。槁死空山。固其所兮。至陽赫赫。發自坤兮。至陰肅肅。躋於乾兮。
寂然反照。珠在淵兮。沃之不滅。又不燔兮。長虹流電。光燭天兮。嗟此區區。何與於其間兮。譬之膏油。火之
所傳而已耶。

赤壁賦

壬戌之秋。七月既望。蘇子與客泛舟遊於赤壁之下。清風徐來。水波不興。舉酒屬客。誦明月之詩。歌窈窕之章。少焉。月出於東方之上。徘徊於斗牛之間。白露橫江。水光接天。縱一舸之所如。凌萬頃之茫然。浩浩乎。如馮虛御風。而不知其所止。飄飄乎。如遺世獨立。羽化而登仙。於是飲酒樂甚。扣舷而歌之。歌曰。桂棹兮蘭漿。擊空明兮泝流光。渺渺兮予懷。望美人兮天一方。客有吹洞簫者。倚歌而和之。其聲嗚嗚然。如怨如慕。如泣如訴。餘音嫋嫋。不絕如縷。舞幽壑之潛蛟。泣孤舟之嫠婦。蘇子愀然。正襟危坐。而問客曰。何為其然也。客曰。月明星稀。烏鵲南飛。此非曹孟德之詩乎。西望夏口。東望武昌。山川相繚。鬱乎蒼蒼。此非孟德之困於周郎者乎。方其破荊州。下江陵。順流而東也。軸轅千里。旌旗蔽空。酺酒臨江。橫槊賦詩。固一世之雄也。而今安在哉。況吾與子漁樵於江渚之上。侶魚蝦而友麋鹿。駕一葉之扁舟。舉匏尊以相屬。寄蜉蝣於天地。渺滄海之一粟。哀吾生之須臾。羨長江之無窮。挾飛仙以遨遊。抱明月而長終。知不可乎驟得。託遺響於悲風。蘇子曰。客亦知夫水與月乎。逝者如斯。而未嘗往也。盈虛者如彼。而卒莫消長也。蓋將自其變者而觀之。則天地曾不能以一瞬。自其不變者而觀之。則物與我皆無盡也。而又何羨乎。且夫天地之間。物各有主。苟非吾之所有。雖一毫而莫取。惟江上之清風。與山間之明月。耳得之而為聲。目遇之而成色。取之無禁。用之不竭。是造物者之無盡藏也。而吾與子之所共食。客喜而笑。洗盞更酌。肴核既盡。杯盤狼籍。相與枕藉乎舟中。不知東方之既白。

後赤壁賦

是歲十月之望。步自雪堂。將歸於臨皋。二客從予過黃泥之坂。霜露既降。木葉盡脫。人影在地。仰見明月。

顧而樂之。行歌相答。已而歎曰。有客無酒。有酒無肴。月白風清。如此良夜。何客曰。今者薄暮。舉網得魚。巨口細鱗。狀似松江之鱸。顧安所得酒乎。歸而謀諸婦。婦曰。我有斗酒。藏之久矣。以待子不時之須。於是攜酒與魚。復遊於赤壁之下。江流有聲。斷岸千尺。山高月小。水落石出。曾日月之幾何。而江山不可復識矣。子乃攝衣而上。履巉巖。披蒙茸。踞虎豹。登虬龍。攀栖鶴之危巢。俯馮夷之幽宮。蓋二客不能從焉。劃然長嘯。草木震動。山鳴谷應。風起水涌。子亦悄然而悲。蕭然而恐。凜乎其不可留也。反而登舟。放乎中流。聽其所止。而休焉。時夜將半。四顧寂寥。適有孤鶴。橫江東來。翅如車輪。玄裳縞衣。戛然長鳴。掠子舟而西也。須臾客去。子亦就睡。夢二道士。羽衣翩僊。過臨臯之下。揖子而言曰。赤壁之遊樂乎。問其姓名。僂而不答。嗚呼。噫嘻。我知之矣。疇昔之夜。飛鳴而過我者。非子也耶。道士顧笑。子亦驚悟。開戶視之。不見其處。

卷二十

銘二十首

卻鼠刀銘

野人有刀。不愛遺余。長不滿尺。劍鉞之餘。文如連環。上下相繆。錯之則見。或漫如無。昔所從得。戒以自隨。畜之無害。暴鼠是除。有穴于垣。侵堂及室。跳床撼幕。終夕窅窅。叱訶不去。啖齧棗栗。掀盃砥缶。去不遺粒。不擇道路。仰行躡壁。家爲兩門。窳則旁出。輕趨捷猾。忽不可執。吾刀入門。是去無跡。又有甚者。聚爲怪妖。盡出羣鬪。相視睚眦。舞于端門。與王雜居。貓見不噬。又乳于家。狃於永氏。謂世皆然。亟磨吾刀。槃水致勸。

炊未及熟，肅然無蹤。物豈有是，以爲不誠。試之彌旬，爲凍以驚。夫縮鷲禽，夜巡晝伺，拳腰弭耳，目不及顧。鬚搖于穴，走赴如霧。碎首屠腸，終不能去。是獨何爲，宛然尺刀，匣而不用。無有爪牙，彼孰爲畏。相率以逃，嗚呼嗟夫，吾苟有之，不言而諭，是亦何勞。

硯銘九首

玉堂鼎硯銘

文同與可將赴陵州，孫洙巨源以玉堂大硯贈之，與可屬蘇軾子瞻爲之銘曰：坡陁瀾漫，天闔海淺，巨源之硯，淋漓蕩溢，神沒鬼出，與可之筆，燼南山之松，爲煤無餘，涸陵陽之水，維以濡之，豈獨在高山，上至巖得水。

鼎硯銘

鼎無耳，槃有趾，鑑幽無見，几不倚，鳴蟲隕，琴喪厥喙，羽淵之化，帝祝尾，不周僭裂，東南圯，黜然而深，維水委，誰乎爲此，昔未始，戲名其髻，加幻詭。

王平甫硯銘

玉德金聲，而寓於斯，中和所熏，不水而滋，正直所冰，不寒而澌，平甫之硯，而軾銘之。

鄧公硯銘并敘

王鞏魏國文正公之孫也，得其外祖張鄧公之硯，求銘於軾，銘曰：

鄧公之硯，魏公之孫，允也其物，展也其人，思我魏公文而厚，思我鄧公德而壽，三復吾銘，以究令名。

端硯銘

千夫挽綆，百夫運斤，篝火下緇，以出斯珍。一噓而泫，歲久愈新。誰其似之，我懷斯人。

孔毅甫龍尾硯銘

澀不留筆，滑不拒墨。爪膚而毅理，金聲而玉德。厚而堅，足以閱人於古今。朴而重，不能隨人以南北。

鳳味硯銘

帝規武夷作茶園，山爲孤鳳翔且喚。下集芝田啄瓊玖，玉乳金沙發靈寶。殘境斷壁澤而黝，治爲書硯美無有。至珍驚世初莫售，黑眉黃眼爭妍陋。蘇子一見名鳳味，坐令龍尾羞牛後。

米黻石鍾山硯銘

有盜不禦，探奇發瑰。攘于彭蠡，斷鍾取追。有米楚狂，惟盜之隱。因山作研，其詞如雲。

輔硯銘

龍尾輔硯，章聖皇帝所嘗御也。乾興升遐，以賜外戚劉氏。而永年以遺其舅王齊愈，臣弒得之以遺臣宗孟。且銘之曰：黻之珍，匪斯石也。輔形而毅理，金聲而玉色也。雲蒸露湛，祥符之澤也。二臣更寶之，見者必作也。

金星洞銘

寶山南麓，鳳左翅。驚雷劃石，通蚪起。凝陰噓，堅出怪璋。是生神草，肖蒼虺。離離赤志，挾脊尾。飛流丹石，決難病。金星非實，特取似。施及山石，亦見謂。凡名相因，皆此比。

文與可琴銘

擢之幽然如水赴谷。釋之蕭然如葉脫木。按之噫然。應指而長言者似君。置之愕然。遺形而不言者似僕。

山堂銘并敘

熙寧九年夏六月大雨。野人來告。故東武城中溝瀆圯壞。出亂石無數。取而儲之。因守居之北塘爲山五成列。植松柏桃李其上。且開新堂北向。以遊心寓意焉。其銘曰：謹真斯堅。土伯所儲。潦流發之神。以畀予。因廡爲堂。踐城爲山。有喬蒼蒼。俯仰百年。

遠遊庵銘并敘

吳復古子野吾不知其何人也。徒見其出入人間。若有求者而不見其所求。不喜不憂。不剛不柔。不惰不惰。吾不知其何人也。昔司馬相如有言。列仙之儒。居山澤間。形容甚癯。乃取屈原遠遊。作大人賦。其言宏妙。不遺而放。今子野行於四方。十餘年矣。而歸於南海之上。必將俯仰百世。奄忽萬里。有得於屈原之遠遊者。故以名其庵。而銘之曰：

悲哉世俗之迫隘也。願從子而遠遊。子歸不來。而吾不往。使罔象乎相求。問道於屈原。借車於相如。忽焉不自知。歷九疑而過崇丘。宛兮相逢乎南海之上。裾龜殼而食蛤梨者。必子也。庶幾爲我一笑而少留乎。

徐州蓮華漏銘并敘

故龍圖閣直學士禮部侍郎燕公肅。以創物之智。聞於天下。作蓮華漏。世服其精。凡公所臨。必爲之。今州郡往往而在。雖有功者。莫敢損益。而徐州獨用。譬人衛朴所造。廢法而任意。有壺而無箭。自以無目而廢。

天下之視。使守者伺其滿。則決之而更注。人莫不笑之。國子博士傅君。揚公之外曾孫。得其法。爲詳其通守是邦也。實始改作。而請銘於賦。銘曰。

人之所信者。手足耳目也。目識多寡。手知重輕。然人未有以手量而目計者。必付之於度量。與權衡。豈不自信而信物。蓋以爲無意無我。然後得萬物之情。故天地之寒暑。日月之晦明。昆侖旁薄於三十八萬七千里之外。而不能逃於三尺之箭。五斗之餅。雖疾雷霾風雨雪晝晦。而遲速有度。不加虧贏。使凡爲吏者。如餅之受水。不過其量。如水之浮箭。不失其平。如箭之升降也。視時之上下。降不爲辱。升不爲榮。則民將靡然心服。而寄我以死生矣。

三槐堂銘并敘

天可必乎。賢者不必貴。仁者不必壽。天不可必乎。仁者必有後。二者將安取衷哉。吾聞之申包胥曰。人衆者勝天。天定亦能勝人。世之論天者。皆不待其定而求之。故以天爲茫茫。善者以怠。惡者以肆。盜賊之毒。孔顏之厄。此皆天之未定者也。松柏生於山林。其始也困於蓬蒿。厄於牛羊。而其終也。貫四時閱千歲而不可改者。其天定也。善惡之報。至於子孫。而其定也久矣。吾以所見所聞。所傳聞考之。而其可必也審矣。國之將興。必有世德之臣。厚施而不食其報。然後其子孫能與守文。太平之主。其天下之福。故兵部侍郎晉國王公顯於漢周之際。歷事太祖太宗。文武忠孝。天下望以爲相。而公卒以直道不容於時。蓋嘗手植三槐於庭曰。吾子孫必有爲三公者。已而其子魏國文正公相真宗皇帝。於景德祥符之間。朝廷清明。天下無事之時。享其福祿榮名者。十有八年。今夫寓物於人。明日而取之。有得有否。而晉公脩德於身。實報於

天取必於數十年之後。如持左契。交手相付。吾是以知天之果可必也。吾不及見魏公。而見其子懿敏公。以直諫事仁宗皇帝。出入侍從。將帥三十餘年。位不滿其德。天將復興王氏也。歟。何其子孫之多賢也。世有以晉公比李栖筠者。其雄才直氣。真不相上下。而栖筠之子吉甫。其孫德裕。功名富貴。略與王氏等。而忠信仁厚。不及魏公父子。由此觀之。王氏之福。蓋未艾也。懿敏公之子蒙與吾遊。好德而文。以世其家。吾是以錄之。銘曰。

嗚呼休哉。魏公之業。與槐俱萌。封植之勤。必世乃成。既相真宗。四方砥平。歸視其家。槐陰滿庭。吾儕小人。朝不及夕。相時射利。皇卹厥德。庶幾僥倖。不種而獲。不有君子。其何能國。王城之東。曾公所廬。鬱鬱三槐。惟德之符。嗚呼休哉。

菩薩泉銘并跋

陶侃爲廣州刺史。有漁人每夕見神光海上。以白氈。僞使迹之。得金像。視其款識。阿育王所鑄。文殊師利像也。初送武昌寒溪寺。及侃遷荊州。欲以像行。人力不能動。益以牛車三十乘。乃能至船。船復沒。遂以還寺。其後惠遠法師迎像歸廬山。了無艱礙。山中世以二僧守之。會昌中。詔毀天下寺。二僧藏像錦繡谷。比釋教復興。求像不可得。而谷中至今有光景。往往發見。如峨眉五臺所見。蓋遠師文集載處士張文逸之文。及山中父老所傳如此。今寒溪少西數百步。別爲西山寺。有泉出於嵌竇間。色白而甘。號菩薩泉。人莫知其本末。建昌李常謂余。豈昔像之所在乎。且屬余爲銘。銘曰。

像在廬阜。宵光屬天。旦朝視之。寥寥空山。誰謂寒溪。尙有新泉。盍往察之。文殊了然。

石鼎銘并敘

張安道以遺子由。子由以爲軾生日之餽。銘曰。石在洛書。蓋隸從革。矢弩齧砭。皆金之職。有堅而忍。爲釜爲鬲。居焚不炎。允有三德。

六一泉銘并敘

歐陽文忠公將老。自謂六一居士。予普通守錢塘。見公於汝陰。而南。公曰。西湖僧惠勤甚文。而長於詩。吾昔爲山中樂三章以贈之。子閒於民事。求人於湖山間而不可得。則往從勤乎。予到官三日。訪勤於孤山之下。抵掌而論。人物曰。公天人也。人見其暫寓人間。而不知其乘雲馭風。歷五嶽而跨滄海也。此邦之人。以公不一來爲恨。公壓斥八極。何所不至。雖江山之勝。莫適爲主。而奇麗秀絕之氣。常爲能文者用。故吾以謂西湖蓋公几案間一物耳。勤語雖幻怪。而理有實然者。明年公薨。予哭於勤舍。又十八年。予爲錢塘守。則勤亦化去久矣。訪其舊居。則弟子二仲在焉。畫公與勤之像。事之如生。舍下舊無泉。予未至數月。泉出講堂之後。孤山之趾。汪然溢流。甚白而甘。卽其地鑿巖架石爲室。二仲爲予師。聞公來。出泉以相勞苦。公可無言乎。乃取勤舊語。推本其意。名之曰六一泉。且銘之曰。泉之出也。去公數千里。後公之沒。十有八年。而名之曰六一。不幾於誕乎。曰君子之澤。豈獨五世而已。蓋得其人。則可至於百傳。嘗試與子登孤山。而望吳越。歌山中之樂。而飲此水。則公之遺風餘烈。亦或見於斯泉也。

大覺鼎銘

樂全先生遺我鼎甌。我復以餉大覺老禪。在昔宋魯取之以兵。書曰。郟鼎。以器從名。樂全東坡。予之以義。書曰。大覺之鼎。以名從器。挹山之泉。烹以其薪。爲苦爲甘。咨爾學人。

頌一首

仁宗皇帝御書頌并敘

天禧中。仁宗皇帝在東宮。故太傅鄧國張文懿公諱士遜爲太子諭德。帝親書十二字以賜之。曰。寅亮天地。弼余一人。又曰。日新其德。公之曾孫假承務郎臣欽。臣以屬翰林學士。臣蘇軾爲之頌二篇。其一曰。天地不言。付之人君。明其德。刑物自秋。春人君無心。屬之輔弼。信其賞罰。身爲衡石。惟天惟君。與相爲三。孰能俛仰。其德不慚。於皇仁宗。恭己無爲。以天爲心。以民爲師。其相鄧公。履信思順。天下頌之。以退爲進。壽考百年。以沒元身。嗚呼休哉。寅亮天地。弼余一人。其一曰。聖人如天。時殺時生。君子如水。因物賦形。天不違仁。水不失平。惟一故新。惟新故一。一故不流。新故無斁。伊尹暨湯。咸有一德。周雖舊邦。其命維新。孰知此言。若出一人。小臣稽首。敬頌遺墨。嗚呼休哉。日新其德。

贊十七首

孔北海贊并敘

文舉以英偉冠世之資。師表海內。意所予奪。天下從之。此人中龍也。而曹操陰賊險狠。特鬼蜮之雄者耳。其勢決不兩立。非公誅操。則操害公。此理之常。而前史乃謂公負其高氣。志在靖難。而才疎意廣。訖無成功。此蓋當時奴婢小人論公之語。公之無成。天也。使天未欲亡漢。公誅操如殺狐兔。何足道哉。世之稱人。

豪者才氣各有高庫。然皆以臨難不懼。談笑就死爲雄。操以病亡。子孫滿前而啜嚶涕泣。留連妾婦。分香賣履。區處衣物。平生姦僞。死見真性。世以成敗論人物。故操得在英雄之列。而公見謂才疎意廣。豈不悲哉。操平生畏劉備。而備以公知天下有己爲喜。天若胙漢。公使備備誅操。無難也。子讀公所作揚四公贊。歎曰。方操害公。復有魯國一男子。慨然爭之。公庶幾不死。乃作孔北海贊曰。稱有艱奴盜賊之靡。欺孤如操。又羈所恥。我書春秋。與齊豹齒。文舉在天。雖亡不死。我宗若人。尙友千祀。視公如龍。視操如鬼。

王元之畫像贊并敘

傳曰。不有君子。其能國乎。予常三復斯言。未嘗不流涕太息也。如漢汲黯。蕭望之。李固。吳張昭。唐魏鄭公。狄仁傑。皆以身殉義。招之不來。麾之不去。正色而立。于朝則豺狼狐狸。自相吞噬。故能消禍於未形。救危於將亡。使皆如公孫丞。相張禹。胡廣。雖累百千。緩急豈可望哉。故翰林王公元之。以雄文直道。獨立當世。足以追配此六君子者。方是時。朝廷清明。無大姦慝。然公猶不容於中。耿耿如秋霜夏日。不可狎玩。至於三黜以死。有如不幸。而處於衆邪之間。安危之際。則公之所爲。必將驚世絕俗。使斗筭穿窬之流。心破膽裂。豈特如此而已乎。始余過蘇州虎丘寺。見公之畫像。想其遺風餘烈。願爲執鞭而不可得。其後爲徐州而公之曾孫汾爲兗州。以公墓碑示余。乃追爲之贊。以附其家傳云。

維昔聖賢。患莫己知。公遇太宗。允也其時。帝欲用公。公不少貶。三黜窮山之死。靡憾。咸平以來。獨爲名臣。一時之屈。萬世之信。紛紛鄙夫。亦拜公像。何以占之。有泚其頰。公能泚之。不能已之。茫茫九原。愛莫起之。

王仲儀真贊并敘

孟子曰。所謂故國者。非謂有喬木之謂也。有世臣之謂也。又曰。爲政不難。不得罪於巨室。巨室之所慕。一國慕之。一國之所慕。天下慕之。夫所謂世臣者。豈特世祿之人。而巨室者。豈特修富之家也哉。蓋功烈已著於時。德望已信於人。譬之喬木。封殖愛養。自拱把以至於合抱者。非一日之故也。平居無事。商功利。課殿最。誠不如新進之士。至於緩急之際。決大策。安大衆。呼之則來。揮之則散者。惟世臣巨室爲能。余嘉祐中。始識懿敏王公於成都。其後從事於岐。而公自許州移鎮平涼。方是時。虜大舉犯邊。轉運使攝帥事。與副總管議不合。軍無紀律。邊人大恐。聲搖三輔。及聞公來。吏士踴躍。傳呼。旗幟精明。鼓角鏗亮。虜卽日解去。公至。燕勞將佐而已。余然後知老臣宿將。其功用蓋如此。使新進之士當之。雖有韓白之勇。良平之奇。豈能坐勝。默成如此之捷乎。熙寧四年秋。余將往錢塘。見公於私第。佚老堂。飲酒至莫。論及當世事。曰。吾老矣。恐不復見。子厚自愛。無忘吾言。旣去二年而公薨。又六年乃作公之真贊。以遺其子。鞏。詞曰。堂堂魏公。配命召祖。顯允懿敏。維周之虎。魏公在朝。百度維正。懿敏在外。有聞無聲。高明廣大。宜公宜相。如木百圍。宜宮宜堂。天旣厚之。又貴富之。如山如河。維安有之。彼窶人子。旣陋且寒。終勞永憂。莫知其賢。曷不觀此。佩玉劍履。晉公之孫。魏公之子。

王定國真贊

溫然而澤者。道人之腴也。凜然而清者。詩人之癯也。雍容委蛇者。貴介之公子。而短小精悍者。游俠之徒也。人何足以知之。此皆其膚也。若人者。泰不驕。困不撓。而不枯也。

秦少游真贊

以君爲將仕也。其服野。其行方。以君爲將隱也。其言文。其神昌。置而不求。君不卽。卽而求之。君不藏。以爲將仕。將隱者。皆不知君者也。蓋將挈所有而乘所遇。以游於世。而卒反於其鄉者乎。

參寥子真贊

東坡居士曰。維參寥子。身寒而道富。辯於文而訥於口。外尪柔而中健武。與人無競。而好刺譏朋友之過。枯形灰心。而喜爲感時玩物不能忘情之語。此子所謂參寥子。有不可曉者五也。

徐大正真贊

賢哉徐子。溫文而毅。儒不亂法。俠不犯忌。求之古人。尙論其世。登唐滅漢。三國之士。我非北海。安識子義。願觀伯符。擊戟爲戲。

文與可畫墨竹屏風贊

與可之文。其德之精。柏與可之詩。其文之毫末。詩不能盡。溢而爲書。變而爲畫。皆詩之餘。其詩與文。好者益寡。有好其德。如好其畫者乎。悲夫。

戒壇院文與可畫墨竹贊

風梢雨擲。上傲冰雹。霜根雪節。下貫金鐵。誰爲此君。與可姓文。惟其有之。是以好之。

石室先生畫竹贊并敘

與可文翁之後也。蜀人猶以石室名其家。而與可自謂笑笑先生。蓋可謂與道皆逝。不留於物者也。願嘗

好畫竹。客有贊之者曰。

先生閒居獨笑不已。問安所笑。笑我非稱物之相物。我爾一也。先生又笑笑。笑所笑者。笑之餘。以竹發妙。竹亦得風。天然而笑。

文與可飛白贊

嗚呼哀哉。與可豈其多好奇也歟。抑其不試故藝也。始予見其詩與文。又得見其行草篆隸也。以爲止此矣。既沒一年。而復見其飛白。美哉多乎。其盡萬物之態也。霏霏乎。其若輕雲之蔽月。繚繚乎。其若長風之卷旆也。猗猗乎。其若遊絲之縈柳絮。窈窕乎。其若流水之舞荇帶也。離離乎。其遠而相屬。縮縮乎。其近而不隘也。其工至於如此。而余乃今知之。則余之知與可者。固無幾。而其所不知者。蓋不可勝計也。嗚呼哀哉。

郭忠恕畫贊并敘

右張夢得所藏郭忠恕畫山水屋木一幅。忠恕字恕先。以字行。洛陽人。少善屬文。及史書小學。通九經。七歲舉童子。漢湘陰公辟從事。與記室董喬爭事。謝去。周祖召爲周易博士。國初與監察御史符昭文爭。參朝堂貶乾州司戶。秩滿遂不仕。放曠岐雍。陝洛間。逢人無貴賤。口稱貓。遇佳山水。輒留旬日。或絕粒不食。盛夏暴日中。無汗。大寒鑿冰而浴。尤善畫。妙於山水屋木。有求者必怒而去。意欲畫。卽自爲之。郭從義鎮岐下。延止山亭。設絹素粉墨於坐。經數月。忽乘醉就圖之一角。作遠山數峯而已。郭氏亦寶之。岐有富家子喜畫。日給淳酒待之甚厚。久乃以情言。且致匹素。恕先爲畫小童持線車。放風鳶。引線數丈。滿之富家。

子大怒遂絕時與役夫小民入市肆飲食曰吾所與游皆子類也太宗聞其名召赴闕館于內侍省押班寶神與舍惣先長髯而美忽盡去之神與驚問其故曰聊以效顰神與大怒除國子監主簿出館於太學益縱酒肆言時政頗有謗譏語聞決杖配流登州至齊州臨清謂部送吏曰我逝矣因捨地爲穴度可容面俯窺焉而卒藁葬道左後數月故人欲改葬但衣衾存焉蓋尸解也贊曰長松撥天蒼壁插水憑欄飛觀縹緲誰子空蒙寂歷煙雨滅沒惣先在焉呼之或出

黃庭經贊并敘

予既書黃庭內景以贈葆光道師而龍眠居士復爲作經相其前而畫予二人像其後筆勢雋妙遂爲希世之寶嗟歎不足故復贊之曰

太上虛皇出靈篇黃庭真人舞胎仙髯者兩卿相後前弗妙使侍清且妍十有二神服銳堅巍巍堂堂人中天問我何修果此緣是心朝空夕了然恐非其人世莫傳殿以二十蒼鶴窳南隨道師歷山澗山人迎笑喜我還問誰遣化老龍眠

興國寺浴室院六祖畫贊并敘

予嘉祐初舉進士館於興國浴室老僧德香之院浴室之南有古屋東西壁畫六祖像其東刻木爲樓閣堂宇以障之不見其全而西壁三師皆神字靖深中空外夷意非知是道者不能爲此書其上曰蜀僧令宗筆子初不聞宗名而家有僞蜀待詔丘文播筆畫相似殆不可辨曰宗豈師播者耶已而問諸蜀父老曰文播漢州人弟曰文曉而令宗其異父弟或曰其表弟也皆善畫山水人物竹石其品在黃筌句龍爽

之間而文播之子仁慶尤長於花實羽毛。蜀人趙昌所師者。予去三十一年。而中書舍人彭君器資亦歸予。是予往見之。則院中人無復識予者。獨主僧惠汶。蓋當時堂上侍者。然亦老矣。導予觀令宗畫。則三祖依然尚在。蔭翳閒。予與器資相顧太息。汶曰。嘻。去是也。何有。乃徙置所謂樓閣堂宇者。北向而出之。六師相視。如言如笑。如以法相授。都人聞之。觀者日衆。汶乃作欄楯以護之。而器資請予爲贊之曰。少林侯壁。不以爲礙。彌天同輦。不以爲泰。稽首六師。昔晦今明。不去不來。何損何增。俯仰屈信。三十一年。我雖日化。其孰能遷之。

韓幹畫馬贊

韓幹之馬四其一在陸。驤首奮鬣。若有所望。頓足而長鳴。其一欲涉水。高首下擇。所由濟。踟躕而未成。其二在水前者。反顧。若以鼻語。後者不應。欲飲而留行。以爲廐馬也。則前無羈絡。後無筆策。以爲野馬也。則矚目聳耳。豐脰細尾。皆中度程。蕭然如賢大夫貴公子。相與解帶脫帽。臨水而濯纓。遂欲高舉。遠引。友麋鹿而終天年。則不可得矣。蓋優哉游哉。聊以卒歲而無營。

師子屏風贊并敘

潤州甘露寺。唐有李衛公所留陸探微畫師子板。余自錢塘移守膠西。過而觀焉。使工人摹之。置蓋公堂中。且贊之曰。

圓其目。仰其鼻。奮鬣吐舌。威見齒舞。其足前。其耳左。顧右。躑躅喜見尾。雖猛而和。蓋其戲。嚴嚴高堂。護藏鼻。啼呼顛沛。走百鬼。嗟乎妙哉。古陸子。

石菖蒲贊并敘

本草菖蒲味辛溫無毒。開心補五藏。通九竅。明耳目。久服輕身。不忘延年。益心智。高志不老。注云生石磯上。藪節者良。生下溼地。大根者。乃是昌陽。不可服。韓退之進學解云。譬醫師以昌陽引年。欲進其稀苓。不知退之。卽以昌陽爲昌蒲耶。抑謂其似是而非。不可以引年也。凡草木之生石上者。必須微土。以附其根。如石菖石斛之類。雖不待土。然去其本處。輒槁死。惟石昌蒲并石取之。濯去泥土。漬以清水。置盆中。可數十年不枯。雖不甚茂。而節葉堅瘦。根須連絡蒼然。於几案間。久而益可喜也。其輕身延年之功。既非昌陽之所能及。至於忍寒苦。安澹泊。與清泉白石爲伍。不待泥土而生者。亦豈昌陽之所能髣髴哉。余游慈湖山中。得數本。以石盆養之。置舟中間。以文石。石芙蓉。翠芬郁。意甚愛焉。顧恐陸行不能致也。乃以遺九江道士胡洞微。使善視之。余復過此。將問其安否。贊曰。清且泚。惟石與水。託於一器。養非其地。瘠而不死。夫孰知其理不如此。何以輔五藏而堅髮齒。